

Aposolo

Alu Aotage Avamu'mo'a amaya hige'ya Aposolo vayala alimainaya ali'yafe Luku'a kaemalene. Luku'a hagoteno Yisasife avona kaemalenegeno Yisasi'a faliteno hetino ikapinaga haitekeno Luku'a foti'a (40) kafu agava maineno mani avona kaemalene. Aposolo vaya'mo'ya (Yisasi kema nehavigeno humatenea vaya'mo'ya) Yisasina kanale ke'a ali'ya alu kote kotega vaya'mogamina mo hamapai-mainae. Pitana ali'yama'a Sapta 1 leti 12 le hane. Polo ali'yamo'a Sapta 13 leti 18 le hanegi hapalika havio.

Yisasi'a "Alu Aotage Avamula tamamigahue." huno hulokiya vaino hamapai-mainae.

¹⁻² Tiofilasigae hagote'na kaemalenoa auta'mafina Yisasi'ma aepa heno ali-mainae ali'ya'ene humaveli-mainae kene Anumaya Kotina Alu Aotage Avamu'mo tokiyaleti "Na'a ma'a kava hiho." huno Aposolo vayala* (agai kema nehavigeno humatenea vayala)* hamapaiteno ikapinaga haimainae yafe'ene ago kae'na kahapai-mainoe.

³ Yisasi'a tusi'a augafa agataiya alino faliteno hetino Aposolo vaya'mogami amaulagale efalote huno fali-mainefiti'ma hetino mainae yafena havise huno kasago'ya tokiya kava'age humaine. Foti'a (40) yupa mopafina maineno efalote huno

amaveliteno amataleno uteno eteno efalote huno Anumaya Koti¹ma kava yagaisia yafena hamapai-mainene.

⁴⁻⁵ Amakai¹enema mainea kanafina mage huno hamapai-mainene “Tamakaya Yelusalemu kumala ataletama o¹viho. Nenafa¹ma ‘Nago kanoa tamamigahue.’ huno¹ma humainea kanoa avaletetama viho. Nagaya ani kanohena ago tamahapai-mainoane. Yoni¹a titeti falelamateneanagi tamakaya aupa kana kano¹a maisayana Nenafana Alu Aotage Avamu¹amoteti falelamategahie.” huno humaine.

Yisasi¹a eteno ikapinaga haimaine.

⁶ Ani yupa Aposolo anaga¹mo¹ya alitalu hu¹ya maine¹ya Yisasifena mage hu¹ya havinegae “Alatimogae menia ma kanafina Lomu kamani vaya¹mogami amayapitila Isaleli vaya¹mogati hafaleka kagaika¹a kava yagailatesanageno tokiya¹age hisifi?” hu¹ya havinegae.

⁷ Havigageno Yisasi¹a mage huno hie “Nenafa¹a agai¹a tokiyaleti ‘Ma kanaene muki¹a kanafi¹ene ma¹a kava hugahue.’ huno huteno yagai-mainene agayama hisia yana tamakaya havisaya yana omalene.

⁸ Omalenege Anumaya Kotina Alu Aotage Avamu¹amo¹ma tamakaite¹ma esiana tokiya¹a tamamisigetama nagai kea Yelusalemuene muki¹a Yutia kotegaene Samelia kotegaene muki¹a ma mopamo atupale mainaya vea¹nenena nagai fena hamapaigahae.” huno humaine. Yisasi¹a ikapinaga haimaine.

9 Mani kea huno ha'no huteno age'ya mainageno mopaleti haino haino haigeno nako sia'mo'a melino aiso hulino avaleno haimaine.

10 Haige'ya amakaya ikapinaga agesaga hu'ya age'ya maiya anayufi tole kanolatana efe'age kena faili'ana efalote hu'ana amakai'ene anile heti-maina'e.

11 Heti'ana mage hu'ana ha'e "Kalili kumate vea'mogatama na'a higetama heti-mainetama ikatela aulula maitama nehae? Yisasi'a tamataleno ikapinaga ago haiyanagi manima ikapinaga haiya avamete huno eteno elavisigetama agega-hae." hu'ana hamapai-maina'e.

Yutasi kuma alisie hu'ya nago kanoa hapalite-nae.

12 Amakaya Olivi yosa hanea ago'yaleti tavite'ya aupa'ale lagi'ya vani kilomita vaya'amo'ya Yelusalemua uva'yi humainae.

13 Uva'yi hute'ya nemaiya nona folamo hu'ya ana yapi kimale nopi hai'ya mainae. Hai'ya mainaya vaya'mogami amakia Pita'e Yoni'e Yemesi'e Etalu'e Filipi'e Tomasi'e Patolomiu'e Matiu'e Alafusi nafa'nea Yemesi'e Saimoni'e kanomona nako agia Seloti'e Yutasi'a Yemesi nafa'nene hai'ya mainae.

14 Ani vaya'ene a'neyagaene Malia'a Yisasina ita'amo'ene Yisasina agana'amo'yaene nagoke amaku amakesale maine'ya muki'a yupa Anu-mayamotega muse hu'ya nunamu humainae.

15 Ani kanafina Yisasifema havi'ya amakupi male'ya amametiti humainaya veala, vani hataleti tueti'a (120) vea'ne, mainageno Pita'a

amakai amu'nopi heti-maineno mage huno humaine.

¹⁶ “Nafu'naganagatama Anumaya Kotina Alu Aotage Avamu'amo'a Teviti avayafiti hufalote huno nayona Yutasife humaine. Yisasima atafa hisaya kama amavelisia kanohe, aune laga humaine. Ani kemo'a ago falote huno tamage humaine.

¹⁷ Ani kanoa, Yutasi'e, Yisasi'enema tokaeta nemauna anagapi maineno Yisasi kea nehavigeno ali'yatela hutenea kano maine.

¹⁸ Ani kanoa, Yutasi'e, kefo yama hia yamo anona'a mone aliteno mopa miya humaleteno ani mopafi ago'ya faigeno aipamo'a aitalaga higeno muki'a aipamo'a helafi lavi-maine.

¹⁹ Helafi lavige'ya muki'a Yelusalemuma mainaya vea'mo'ya ani kea havite'ya ani mopamo agia amakai'ami kefina 'Akelatama.' hu'ya humainae. Tagai kefina ani agia 'Kolama lavi-mainea kumale.' hu'ya humainae.

²⁰ Teviti'ma yagamema humainea auta'mafina, Samupina, mage huno kae-maleneane

'Agai'ama nemaiya kumala vaya omaino yu kuma hapaesie.'

huno kae-maleneane. Ani kemo'a nago kaiyaga mage huno humaineane

'Alu kanomo'a agai ali'yatela alisie.' huno humaineane.

²¹⁻²² Ani yafe nago kanomo'ma Yoni'a tima falematenea kanaleti aepa heno Anumayatia Yisasi'ene tagai'enema vaiyatete huno huno egeno'ma Yisasi'a ikapinaga haimainea yupa

tagai'enema nemaiya vayapiti nago kanoa Yisasi'ma fali-mainefiti'ma hetii-mainea kema hamapaisiafe ani ali'yatela alita hetitesune.” huno Pita'a humaine.

²³ Hige'ya amakaya tole kanolafe “Anakayae.” hu'ya hage'ana nago kanoa, Yosefe Pasapasi'e kanomona, nago agia Yasatusi'e, nago kanoa Matiasi'e hu'ya anakia ayemainae.

²⁴⁻²⁵ Ayete'ya Anumayamotega mage hu'ya havinegae “Anumayamoga kagaya muki'a vaya'mogami amaku'afina ago age-mainane. Yutasi'ma haiya kava'ma huteno tataleno havi kapi umainea yafe anona'ale alu kanomo'a hetino Aposolo kano maisie huta nehune. Kagaya ani kanolatapitila hana kano ago hapalika hune'atane? Hune'atana kanoa tavelio.” hu'ya havinegae.

²⁶ Nunamuna hute'ya anakia aote yate kaete'ya yopafi malene'ya nagoke avayu hu'ya agayana Matiasi agi avayu hute'ya ani kanoa avale'ya hetitageno Aposolo vayapi maine.

2

Alu Aotage Avamula amakaite elavi-maine.

¹ Yisasi'a ago falitege'ya seveni'a (7) sota maite'ya vitimo afulea kanahe muse haya imu kiya kanafina muki'a Yisasi veala nago nopi al-italu hu'ya mainae.

² Mainageno aupa'a ikapinagati ala age ne'aino ala yasimo'ma huhu huhu nehia kava huno age

ne'aino anima mainaya nopina me hiya humaine.

³ Hiya hige'ya agayana atamo anefe kana yamo'a hamaote hamaote amaugafale mo ka'maemaine.

⁴ Mo ka'mae-mainegeno Alu Aotage Avamu'mo'a eno muki'amogami amakupina me hiya hige'ya amakaya aepa he'ya Alu Aotage Avamu'mo hamapaige'ya amaku amakesafiti nohaviya kea alu ke alu ke humainae.

⁵ Nehage'ya ani yupa kasago'ya Anumaya Koti kema nehaviya Yuta vaya'yaga muki'a kotegati e'ya Yelusalemu melitalu humainae.

⁶ Ani vaya'mo'ya ikapinagati'ma ala agegefa aige'ya havite'ya melitalu hu'ya haviyana ani nopima mainaya vea'mo'ya alu ke alu ke mai'ya nehage'ya alu kotegati'ma emainaya vea'mo'ya mage hae “Nagai ke nehie. Nagai ke nehie.” hu'ya tusi'a amama'yo aimainae.

⁷⁻⁸ Amama'yo ne'ai'ya amakesa havi havi hu'ya mage hae “Mani kema nehaya vaya'mo'ya Kalili vaya mainayanagi hana'a hu'ya tagaiti itatimo'ya nelafa'ya nehageta nehavuna kefitila hageta nehavune.

⁹⁻¹¹ Tagaya ma kuma'yagaleti emainone Patia'ene Mitia'ene Elamiene Mesopotemia'ene Yutia'ene Kapatosiene Potusiene Esia'ene Fili-gia'ene Pamafilia'ene Isipiene Sailinia aupale Lipia kotegati'ene Lomuene Kalitiene Alepia'ene na'a kotegati emainonagi Yuta vaya'ene Yuta vaya'mogami Anumaya Koti'amimo ke havili-

naya vaya'ene emainonagi tahaote tahaote keti-
fiti Anumaya Koti tokiyaleti humainea kavafe
tahapai-mainae.” hu'ya hae.

¹²⁻¹³ Hage'ya muki'a vea'mo'ya tusi'a
amama'yo ne'ai'ya tusi'a amakesa nehavi'ya
nago'a vea'mo'ya mage hu'ya hae “Ani
kava'mona aepa'a na'ane?” hu'ya hayanagi
nago'a vea'mo'ya havigu ke nehu'ya mage hae
“Amakaya havilina vaini nofi alagamo tima'a
nete'ya aneginagi nehae.” hu'ya humainea.

Pita'a ke huhaleno humaine.

¹⁴ Pita'a aleveni'a (11) Aposolo vaya'ene heti-
maineno ala kefiti mage huno humaine Yuta
nafu'naganagatamaene Yelusalemuma mainaya
vea'nene nago ke tamahapaigahugi haviho.

¹⁵ Tamakaya tamakesa haviyana mani
vea'mo'ya havilina vaini li ne'ya aneginagi
nehae hutama nehafi? A'ao menia natekefa
naeni kiloki nehigi havilina onenae.

¹⁶ Onenagi menima agaya yafena nayona Anu-
maya Koti aune kanomo'a Yoeli'ma humainea
kemo'a mage huno humaineane.

¹⁷ Anumaya Koti'a mage huno humaine “Mani
kanamo'a aupa'ama ha'no hugahema
hisia kanafina nagaya Alu Aotage
Avamu'nimona muki'a vea'nemogamina
amamigahue. Amamisuge'ya tamakai
nafa'nemo'ene muna'nemo'ene
Anumayamo avayafiti hamapai-mainea
kea hisage'ya neya'vetamimo'ya himona

kana ya'yaga feluga ne'agesage'ya kosunatamimo'ya himona agegahae.

18 He, nagaya Alu Aotage Avamula ali'ya vea'nimogamina vene a'nene amamisuge'ya Anumayamo avayafiti'ma hamapai-mainea kea tamahapaigahae.

19 Nagaya ikate'ene ma mopafi'ene tokiya avame'yama hisua yana kola'ene ataene halinaene tamaveligahue.

20 Tamavelitesugeno yagemo'a ayesu hinageno ika'mo'a kolama'age hisigeno Anumayamo'ma esia kanafina tusi'a tokiya'aene hale yama'aene efalote hugahie.

21 Efalote'ma hinage'ya muki'a vea'mo'ya Anumayamo agi ne'aye'ya 'Kalagi ailato.' hu'ya nehisageno Anumaya Koti'a amaku amamena aligatigahie." huno kae-maleneane.

22 Isaleli vaya'mogatama nago kea tamahapaigahugi haviho "Nasaleti Yisasi'e, Anumaya Kotitegati emainea kano maine." hutama havisaya yafe Anumaya Koti'a aya higeno tusi'a tokiya avame yana tamakaipina ago ali falote higetama age-mainae.

23 Agayanagi Anumaya Koti'a nayona havino "Na'a ma'a hugahue." huno ha'ya kimaleteno tamayapi ategetama Anumaya Koti'a hutenea kava hutama ani kanoa, Yisasina, kefo vaya'ene yafaga yosalela nilia hetama asaitetama hayageno fali-maine.

24 Falimaineanagi falimainea yamo'a atafa huno atakalo ohune. Anumaya Koti'a anima agata

yama alino falimainea yapitila kalu heno ali hetitene.

²⁵ Nayona Teviti'a Yisasi'ma falimainesifiti'ma alino heti-tesia yafena mage huno humaineane

“Muki'a kanafina Anumayani'amo'a nagai'ene maineno tamaga nayategama mainea yafena kolia ohugahue.

²⁶ Nagai'enema nemaiya yafena nagu nafa'nemo'a tusi'a muse nehige'na agia alisaga nehue. Yoka falite'na hetigahue hu'na nametititia nehue.

²⁷ Anumaya Kotigae 'Alu aotage kanoe.' huka hunatenana kanomonia naugafa kasalisia yafe fali-mainaya vea'ne mainaya kumatela natalesanage'na o'visua yafe nametititia nehue.

²⁸ Kagaya agola maige maige hisua kana ago navelinage'na age-mainoafe kagai'enema maisua yafena aluya hu'na musena hugahue.” Teviti mani kea humaineane.

²⁹ Pita'a nago'ene mage hie “Nenafugatama hufalote hu'na tamahapaisue taginagomo'a Teviti'a ago falige'ya hevaitenae. Hevaitenaya komua tagai amu'nopi hanegi akai'ahe mani kea ohuneane.

³⁰⁻³¹ Ohunegi Anumaya Koti'a agaife mage huno hulokiya vaino kea humaineane 'Kagai kaginagomopiti nago kanomo'a hetino eteno kagai kumate vea'nea kava yagaimategahie.' huno humaineane. Humaineanagi Teviti'a Anumaya Koti aune kano maineanagino Kalaisi'a, Anumaya Koti'ma taugafa aligatigahe huteneane kanoa, fali-mainefiti hetigahie huno aune laga huno

mage huno humaine. Kalaisife 'Augafa'a kasalisia yafe fali-mainaya vea'ne nemaiya kumatela o'ategane.' huno humaineane.

³² Ani kanoa, Yisasina, Anumaya Koti'a fali-mainefiti eteno ago alino hetitegeta age-mainona yafe tamahanepaune.

³³ Anumaya Koti'a ali hetiteno avalesaga huno agai'a tamaga aya kaiyaga'a uhagote mainaya vaya mainalega ateteno 'Tamamigahue.' huno'ma humainea kanoa, Alu Aotage Avamu'a, amigeno aliteno Yisasi'a ani Alu Aotage Avamula eteno lamigeta mani kavala hunagetama ne'agae.

³⁴⁻³⁵ Teviti'a mage huno humaineane Anumaya Koti'a Anumayani'amofena mage huno humaine 'Tamaga nayatega uhagote mainaya vaya mainalega mopale emainesanage'na kame vayaka'a kaiyafi amatesuge'ya ani kame vaya'mo'ya kagaifena ago tagasane.' hu'ya hugahae." huno humaineane.

Teviti'a Yisasi'ma humainea kava huno ikapinaga haino omainegi mani kea agai'ahena ohunegi Kalaisife humaineane.

³⁶ "Ani yafe Isaleli vaya'mogata havilama huta havisune. Ani Yisasina tamakayama yafaga yosalela nilia hetama asai-malenaya kanomofe Anumaya Koti'a mage huno humaine 'Ani kanomo'a Anumaya maineanagi nagaya hutogeno emainea kano maine.' huno humaine." huno nehie. Kasago'ya ve a'mo'ya amaku'a aiyahae hage'ya tina falematenae.

37 Pita¹ma hia kemo¹a amakupi ayege¹ya havite¹ya Pita¹ene nago¹a Aposolo vaya¹enefe mage hu¹ya hae “Nelafugatama menia hana¹a hisune?” hu¹ya hae.

38 Hageno Pita¹a mage huno hie “Tamakaya muki¹amogatama tamaku¹a aiyahae hutama egeta Yisasi Kalaisi agile tina falelamatano. Ani¹ama hisageno¹a Anumaya Koti¹a aigetamateno kefo yatamia atalelamateno Alu Aotage Avamula tamamigahie.

39 ‘Tamamigahue.’ huno humainea kea tamakaife nehigi tamakayaene nafa¹netamiene Yuta vea omainaya vea¹nenefe mani kea huno muki¹a Anumaya Koti¹a kema humatesia vea¹mogamife ‘Tamamigahue.’ humaineane.” huno Pita mani kea humaine.

40 Pita¹a mani kea nehuno alu ke alu ke huno kana¹ye kana¹ye huno mage huno hie “Meni kanafima mainaya vea¹mo¹ya tusi¹a kefo kava mai¹ya nehagi havigu tamakaya kefo kava huyafenagi atalegeno Anumaya Koti¹a tamaku tamamena aligatino.” huno humaine.

41 Hige¹ya nago¹a vea¹mo¹ya tali tauseni¹a (3,000) vea¹mo¹ya mani kea havite¹ya ali¹ya amakupi male¹ya amametiti hage¹ya ani yupa lina falematenae. Yisasife amakupi nemalaya vea¹mo¹ya tokae¹ya kanale kava nehae.

42 Lina falematage¹ya amakaya muki¹a yupa nago amaku amakesa havi¹ya Aposolo vaya¹mogami kea havi¹ya hame¹ya maya kofa hu¹ya nete nete nehu¹ya Anumayamotega muse

hu'ya nunamuna nehae.

⁴³ Nehage'ya muki'a vea'mo'ya tusi'a amama'yo ne'aige'ya Aposolo vaya'mo'ya kasago'ya tokiya avame yana nehae.

⁴⁴ Muki'a Yisasi kema havi'ya amakupi male'ya amametitima humainaya vea'mo'ya nagoke amaku amakesa havi'ya muki'a ya'yaga'amihena “Nagai'nige yane.” hu'ya ohunagi “Muki'a yana lagaiti ya hane.” hu'ya nehae.

⁴⁵ Mopaene afeno'ya'amienema hanea vea'mo'ya atalageno alu kanomo'a miya hige'ya monea alite'ya fako hute hute hu'ya kave'amima omaleneva veala amaminae.

⁴⁶⁻⁴⁷ Muki'a kanafina nagoke amaku amakesa havi'ya ala mono nopina ne'u'ya alu nopina alu nopina u'ya hame'ya maya kofa hu'ya kave'ene nete nete nehu'ya muse hu'ya Anumaya Koti agia alisaga nehage'ya muki'a vea'nemo'ya agete'ya “Kanale kava nehae.” hu'ya nehageno Anu-mayamo'a nago kanafina nago kanafina nago'a vea'nea amaku amamena aligatiteno “Nagai ke nehaviya vea'ene maiho.” huno humatene.

3

Pita'ene Yoni'ene nago aiya haviya humainea kanomona ali'ana kanale hutena'e.

¹ Nago yupa une kanalega tali (3) kiloki Pita'ene Yoni'ene nunamu hisaya kanamo'a aupa hige'ana ala mono notega umaina'e.

2 Ne'va'age'ya vava'mo'ya nagola kali kanoa, atenelegati aiyamo'a haviya humainea kanoa, avale'ya emainae. Muki'a kanafina anima aiyama haviya humainea kanomo'a ala mono nomo fiate mopale nemaiyane. Ani fiamo agia kogonali fiane hu'ya agia ne'ayaya fiate maineno ala mono nopima vava veafena “Monea namiho.” huno ayana ha'ya hulineno auka'ya nehia kanoe.

3 Ani kanomo'a ageana Pita'ene Yoni'ene ala mono nopi haigahe neha'ageno “Monea namite-tanao.” huno auka'ya hunatene.

4 Hunatege'ana Pita'ene Yoni'ene tokiya'age aulu hemaine'ana Pita'a mage hie “Ta'agaila ta'ago.” huno humaine.

5-7 Higeno ani kanomo'a “Nago ya namigahe neha'e.” huno anakaila anakeke huno anake-mainegeneno Pita'a mage huno hie “Mone'ni'a omalegi nagaipima hanea yana kamigahue Nasaleti Yisasi Kalaisi agile kahanepauve hetika ute ete huo.” huno nehuno tamaga ayate alino hetitegeno aupa'a aiyamo'ene ale'yamo'ene kanale hutegenno tokiya hau-maine.

8 Tokiya'age hautegenno hetino ute ete nehuno anakai'ene ala mono nopinaga nehaino haite asaga hulavite nehuno Anumaya Koti agia alisaga hume hume nehaiye.

9-10 Anumaya Koti agia alisaga huno haige'ya muki'a vea'mo'ya agayana hige'ya “Vae mani kanoa muki'a yupa ala mono nomona kogonali fiate maineno auka'ya nehia kanogi.” hu'ya nehu'ya alino kanale'ma hutenea yafena tusi'a

amama'yo aimainae.

Pita'a ala mono nopi maineno Yisasi kea hufalote humaine.

¹¹ Veamo'ya amama'yo ne'aigeno ani kanomo'a Pita'ene Yoni'ene anatafa huno ananukige'ya muki'a veamo'ya ala mono nomo haupale yasi alisia ya ayekalo humalenea nomo, agia Solomoni none hu'ya nehaya yate, amakaitega umainae.

¹² Vageno Pita'a ageteno mage huno humaine “Isaleli kumate vaya'mogatama na'a higetama atali talua nehae? Ta'agaya ta'agaiti'a tokiyaleti'ene fatago humaino'a au'ava yateti'ene ani kanoa alita'a kanale huto'ageno ute ete nehie hutama ta'agaila ta'agene'asagalifi?

¹³ A'ao. Taginagomogami Anumaya Koti'a, Apalahamu'ene Aisaki'ene Yekopuene Anumaya Koti'amimo'a, agai'a ali'ya kano'amona, Yisasi, tokiya hale ya amigahe ani kanomona alino kanale hutenege tamakaya ani Yisasina avaletama kame vaya'mogami amayapi atageno Pailati'a Yisasife 'Afa'a atalegahue.' huno nehiana tamakaya Pailati aulagafi 'Tagai kava kanoa omaigi agaya falisie.' hutama tamakave'no hutena.

¹⁴⁻¹⁵ Alu aotage kanoa fatago kava'age nehia kanomona tamakave'no hune'atetama vaya'ma hamaeno fali ne'amatea kanohe 'Atalegeno eno.' hutetama muki'a vea'mogami hamaimu'mona aepa'a mainea kanomona hayageno falianagi

Anumaya Koti'a fali-mainefiti alino hetitegeta'a ago ageteta'a mani kea tamahanepau'e.

¹⁶ 'Yisasi'a kanale hula'atesia tokiya hane.' huta'a ta'agupi maleno'a yafe manima ne'agaya kanomona ago kanale hutetegeneno aiyamo'a tokiya vaimaine. 'Yisasi'a kanale hutesia tokiya'a hane.' huta'a ta'agupi maleno'a yateti tamakai tamaulagafi ago kanale hutegeneno kanale huno maine.

¹⁷ Tamage nenafugatama nagaya havuana tamakai kava vayatamimo'yaene Yisasi'ma emainea aepa'aene havilama ohunetama Yisasina hae-mainae.

¹⁸ Hae-mainaya yafe Anumaya Koti aune vayamogami amavayafiti'ma humainaya kea mage humainayane 'Nagaya tamaugafa aligatigahe hutenoa kanomo'a tusi'a agataya aliteno faligahie.' hu'ya humainaya kemo'a efalote huno tamage humaine.

¹⁹ Ani yafe kefo yatamia ne'ataletama tamaku'a aiyahae hisageno Anumaya Koti'a kefo yatamia aye ha'mi-talegahie.

²⁰ Aye ha'miteno agai'alegati kanale'ma humatesia yana nelamamino Yisasina tamakaifema tamaugafa aligatigahie huno hutenea kanoa eteno tamakaitega hutengeneno egahie.

²¹ Hutegahianagi meni kanafina Yisasi'a ikapinaga maineno Anumaya Koti'ma muki'a yana eteno haegafa yama'age talo hisia yafe agava-mainae. Muki'a Anumaya Koti'ma nayoma mainaya amaune vaya'mo'ya humainaya kemo'a efalote huno tamage humaineafe Yisasi'a

eteno egahie.

22 Mosese¹a mage huno kaemaleneane ‘Anumaya Koti¹a tamakaipiti nagola aune laga hisia kanoa nagayama hua¹ya huno hisia kanoa ali hetitegahie. Hetitetenageno¹ma agayama hisia kea haviho.

23 Ani aune kanomo kema ohavisaya vea¹mogamina Anumaya Koti¹a hamaeno fali ha¹no hinage¹ya Isaleli veapina omaigahae.’ huno humaineane.

24 Muki¹a Anumaya Koti amaune vaya¹mo¹ya Samueli¹ene agai akavelegati¹ma falote humainaya amaune vaya¹yagaene menima mainona kanahe havi¹ya kae-malenayane.

25 Tamakaya Anumaya Koti amaune laga nehaya vaya¹mogami amakinagomogatama mainae. Anumaya Koti¹ma Apalahamufe hulokiya vaino alino hagelafi lamatenea kea* huno tamakai¹enefe mani kea humaine. Anima hulokiya vaimalenea kemo¹a mage huno humaineane ‘Nago tamakinagomo¹a esiana muki¹a ma mopafi vea¹mogamina kanale manua amamigahie.’ huno humaineane.

26 Muki¹a manima humainaya kemo¹a falote huno tamage hisia yafe Anumaya Koti¹a agai¹a ali¹ya nafa¹ne¹amona alino hetitegetama tamakaya kefo yatamihe tamaku¹a aiyahae hisigeno tamaya huno kanale manua tamamisia yafe hagoteno tamakaitela hutegeni emaine.” Pita¹a mage huno humaine.

4

Pitagani Yoniganina kina hunatenae.

¹⁻² Pitagani Yonigani yaufa mani kea hama-nepai'age'ya mono note kava vaya'ene mono note ati kava kanoene nago'a Satusi vaya'ene e'ya menakayana anakayama “Yisasi'ma fali-mainefitila ago ali hetiteneanagino muki'a vea'nea ani'a hu'ya fali-mainesafitila ete'ya hetigahae.” hu'ana hamapai'a yafe amaipa haviya nehae.

³ Amaipa haviya hute'ya anatafa hagi “Ago une kianagita ega kaiyekea hunategahune.” hu'ya kina nopi anavale'ya monatenae.

⁴ Monatayanagi kasago'ya vea'nemo'ya anakai kea havite'ya amakupi male'ya amametiti nehae. Faefu tauseni'a (5,000) vea'mo'ya Yisasi'ma hulatenea yafena havi'ya amakupi male'ya amametitia nehae.

Pitagani Yoniganina kanisole vayate kaiyeke hunatenae.

⁵⁻⁶ Faete'ya ko'ma neliana kava vaya'ene vayatamaene kahegi kema havilinaya anaga'ene Anasi'a ala mono note hagote kava kanomo'ene agai'a anaga'ene Kaiyafasi'ene Yoni'ene Alekasata'ene muki'amo'ya Yelusalemu alitalu humainae.

⁷ Alitalu hute'ya ani kanolatana anavale'ya amaufi hetinatene'ya mage hu'ya hanavigae “Tanakaya hana'a agimo tokiyaleti mani kavala humaina'e?” hu'ya hanavigae.

⁸ Hana-vigageno Alu Aotage Avamu'mo'a Pitana agupina hiya higeno mage huno humaine Kava vaya'mogatamaene vayatamaene haviho.

⁹ Mani aiyamo'a haviya humainea kanomona ali falu hutetana alitana kanale hutena'e kea havisune hutama kaiyekea hula'atetama na yateti mani kava neha'e hutama ta'ahavi-negapi?

¹⁰ Ta'a-havigayanagi muki'amogatamaene muki'a Isaleli vea'mo'yaene haviho. Nasaleti Yisasi Kalaisi agimo'a manima tamaufima hetimainea kanomona alino kanale hutene. Ani Yisasina tamakaya yafaga yosale nilia hetama asaigeno fali-maineanagi Anumaya Koti'a falimainefiti ago ali hetitene.

¹¹ Anumaya Koti kemo'a auta'mafina mage huno humaine

“Tamakaya yafa noma kiyana nago yafafena ‘Haviya hie.’ hutama atalayanagi menia ani yafamo'a tusi'a kanale yafane nomo ayetagenale ago malenae.” huno humaineane.

Ani yafana Yisasife humaine.

¹² Ani kanomo'a agai'age tagu tamena aligatihahie. Muki'a mopafi veapitila nago kanomo agileti tagu tamena aliokatigahigi Yisasina agai'age agileti tagu tamena aligatihahie huno humaine.

¹³ Pitagani Yonigania tokiya'age ke ha'age'ya havite'ya mage hae “Vae mani kanolatana afa kanolata maine'ana avo nopina o'una'a kanolanagi hana'a hu'ana tusi'a kanale kea neha'e?” hu'ya amakesa havi havi nehu'ya “Vae mani kanolatana Yisasi'ene nemai'a

kanolatane.” hu'ya humainae.

14 Hayanagi ali'ana kanale'ma hutena'a kanoa anakai'ene heti-mainege'ya agaya yafe nago'a havige havagea huo'anatenae.

15 “Kanisole vaya nopitila ataletana vi'o.” hu'ya hunatete'ya amakai'amifi kea huge havige humainae.

16 Mage hu'ya hae “Ani tole kanolatana hana'a hunatesune? Mama tokiya avame yana ha'age'ya muki'a Yelusalemu nemaiya vea'mo'ya ago age-mainagi hana'a huta ali falakisune?”

17 Havigu mani kemo'a alu kote kotega ute ete huyafenagi aluya huta 'Nago'ene mani agia o'aye'o.' huta kahegi-natesune.” hu'ya humainae.

18 Anakai'efe ke hage'ana a'age'ya mage hu'ya anaumonola malenae “Yisasifena nago'ene vea'mogamina hamapaitana humaveoti'o.” hu'ya hae.

19 Hage'ana Pita'ene Yoni'ene kenona'amia mage ha'e “Na tamakesa nehaviye Anumaya Koti aulagafi maino'agi ta kele akavela malesu'e? Tamakai kelepi Anumaya Koti kelele hutama nehafi na tamakesa nehaviye? Tamakaitami fako hutama haviho.

20 Ta'agaya Yisasi'ma humainea kavala ageta'a havimaino'a kava'yaga fala okigahu'e.” hu'ana neha'e.

21 Ha'age'ya anaikolisaya amakesa haviyanagi muki'a vea'mo'ya humaina'a kavala agete'ya Anumaya Koti agi alisaga nehage'ya mage hae

“Anaiko-lisunana vea'mo'ya kelama-kigahae.” hu'ya nago'ene anaumonola malet'e'ya anatalage'ana umaina'e.

²² Anima aiyama haviya humainea kanoma ali'ana kanale hutena'a kanomona kafu'a foti'a (40) kafu humainea kanogi'ya Anumaya Koti agi alisaga humainae. Yisasife amakupi malenaya vea'mo'ya tokiya vai'ya Yisasi kema hufalote hisaya yafe Anumayamotega havige-mainae.

²³ Anatalage'ana anaga'animo'ya mainalega ute'ana muki'a ala mono note ala kava vaya'yagaene vayatamaene hanapaiya kea mo hamapai-maina'e.

²⁴ Mo hamapai'age'ya havite'ya nagoke amakesa havi'ya Anumayamotega ke hu'ya mage hu'ya havige-mainae “Kava yagai Anumayatimogae mopaene ika'ene hage li'ene muki'a anifima hanea ya'yagaene talo humalenana kanomogae.

²⁵⁻²⁶ Kagaya kagai ali'ya kanoa, tototimo'a Teviti'ma avayafiti Alu Aotage Avamukaletila mage huka humainanane

‘Na'a hige'ya Isaleli nofi'ma omainaya vea'mo'ya ‘Anumaya Koti'ene tu hugahune.’ hu'ya havigu ke hu'ya amaipa kafa hemainae? Ma mopafi kava vaya'ene vayatamaene Anumayamofe'ene agai'a tagu tamema'a aligatigahe hutenea kanomofe'ene amaipa haviya nehu'ya kea ne'vaiye?’ huno humaineane.

²⁷ Mamona kelamage. Mani kumate alu aotage ali'ya kanoka'a kagaika'a taugafa aligatigahema hutenana kanomona kame hutesaya

yafe Heloti'ene Potiasi Pailati'ene Yuta vea omainaya vaya'yagaene Isaleli vaya'ene alitalu hu'ya mainae.

²⁸ Kagayama nayoma huka 'Na'a ma'a hugahae.' hukama havimainana kagesa ani'a hugahe alitalu humainae.

²⁹ Menia Anumayatimoga manima tagaifema hamae vainelate'ya hu kolima latesaya kema haya kea nehavika taha'mao. Tagaya kagai ali'ya vaya mainonagi kagaya taha'maegeta kolia ohuta kagai kea tokiya'age huta hamapaisune huta kahavinegone.

³⁰ Kayana maleka kali veala alika kanale hune'amateka kagaika'a alu aotage nafa'nekamo agile tokiya avame yama hisuna tokiyaka'a lamio." hu'ya Anumayamotega havinegae.

³¹ Havigageno Anumaya Koti'a amakayama mainaya nona alino kosi kosi hutegeno Alu Aotage Avamu'mo'a amakupina me hiya humainege'ya Anumaya Koti kema tokiya'age hu'ya hamapaisaya yafena kolia ohunae. Muki'a Yisasina amaku'ama aminaya vea'mo'ya nagoke amaipale maine'ya amaipa o'ami a'ami hu'ya mainae.

³² Muki'a Yisasi kema havi'ya amaku'ama aminaya vea'mo'ya nagoke amaku amakesale maine'ya nago kanomo'a agai'age yafena ageteno "Nagai'nige yane." huno ohunegi "Muki'a yana tagaiti yama'age hane." hu'ya humainae.

³³ Hageno tusi'a tokiya'a amamige'ya Aposolo

vaya'mo'ya “Yisasi'a fali-mainefitila ago hetimaine.” hu'ya hamane paigeno Anumaya Koti'a kayone hisaya yana ne'amamino amaya humaine.

³⁴⁻³⁵ Amaya hige'ya amakai amu'no'amifina kavefena kafua ohu vea'ne maine'ya mopa'amia hanea vea'nene no'amia hanea vea'nene “Alu kanomo miya hisie.” hu'ya hage'ya monea amamige'ya ali'ya Aposolo vaya'mogamina momamige'ya kave'amima omalenea vea'mogamina amaya hu'ya amamite amamite humainae.

³⁶⁻³⁷ Nago kanoa Yosefe'e, nago agia Aposolo vaya'mo'ya mage hu'ya malenae Panapasi'e hu'ya malenae. Ani agimo'a tagai kefina mage hie “Amaipa falu hisia ke nehia kanoe.” Ani kanomo'a Livai nofi kano maine. Saipalusi kumateti kanomo'a agai'a mopa alu kano amigeno monea eteno amigeno ani monea alino Aposolo vaya me ne'amamiane.

5

*Ananaiyasigani Safailagania Anumaya Koti au-
fina havige humaina'e.*

¹ Nago kanoa Ananaiyasi'e a'amo agia Safaila'e ani alavelatamogania nago mopa'ania alu kano ne'ami'ana mone ali-maina'e.

² Alite'ana Ananaiyasi'a kesi nago'a monea agai'a alino fala-kigeno a'amo'a anima alia monea ago age-maine. Ananaiyasi'a nago'a monea alino Aposolo vaya momamine.

³ Amamianagi Pita'a agaifena mage hie “Ananaiyasigae Satani'a* kefo kagu kagesa kamigeke kagaya ‘Muki'a monea mama hane.’ huka nehanagi nago'a monea ali fala-negika Alu Aotage Avamu'mofena havige huka ayevataga nehane.

⁴ Mani mopa kagaika mopagika ‘Alu kanomo alisie.’ huka monea ne'alika ani'a huka kagaika monegi na'a higeka ‘Havigea hu'na ayevataga hugahue.’ huka kagu kagesafinaga nehane? Vaya'mona ayevataga ohunanagi Anumaya Koti ayevataga humainane.” huno nehie.

⁵⁻⁶ Higeno Ananaiyasi'a ani kea haviteno ailakatino fali-mainie. Falige'ya neya'vemo'ya nago kena moli'ya ha'ya kitete'ya ali'ya komufi mo hevaitenae. Hevaitetage'ya ani kanoma fali-mainiea kea muki'a vea'mo'ya havite'ya tusi'a lagi tagi'ya amake-mainie.

⁷⁻⁸ Haenaga'a tali'a (3) aova ha'noma nehiana a'amo'a ani fali-mainiea kea ohavino egeno Pita'a agaife mage hie “Manima hanea monea mopaletila hai ani kano'a ali-maina'o?” huno higeno “Tamage ani kano'a al-imaino'e.” huno humaine.

⁹ Higeno Pita'a mage huno hie “Na'a hige-tana tanakaya tokaetana kea hutetana ‘Alu Aotage Avamu'mona ayevataga hugahu'e.’ hutana ha'ane? Agego anaukamoma ago'ma ali'ya mo hevaitaya vayala ete'ya fiata me heti-mainie'ya kagai'enena falisanage'ya ali'ya mo hevaigategahae.” huno humaine.

¹⁰ Nehigeno aupa'a ani a'mo'a Pita

aiyafi ailakatino ago'ya faiteno falige'ya neya'veyagamo'ya hai'ya mogayana ani ala ago fali-mainege'ya moli'ya anau'amoma hevaitale mo lokae'ya hevainatenaē.

¹¹ Hevainatage'ya Yisasina amaku'ama aminaya vea'ene muki'a ani kema haviya vea'mo'yaene tusi'a lagitagi'ya amake-mainē.

Tokiya avame ya'yaga alu ya alu ya humainaē.

¹² Aposolo vaya'mo'ya muki'a vea amu'nopi kasago'ya tokiya avame ya'yaga hage'ya age-mainaē. Agete'ya Yisasina amaku'ama aminaya vea'mo'ya nagoke amaku amakesale maine'ya ala mono nomo haupale yasi alisia ya ayekalo humalenea nomo agia Solomoni none ani nopi muki'a kanafina molitalu humai humai nehayane.

¹³⁻¹⁴ Nehage'ya nago'a vea'mo'ya kolima haya yafe amakai'enena mo lokae'ya uomainagi ani vea'mogami amaki alisaga humainaē. Muki'a vea'mo'ya Yisasi kema havi'ya amakupi male'ya amametitia hute'ya amakai'ene mainaē.

¹⁵ Tokiya avame'yama humainaē yafe muki'a kalima hamaeya veala amavale'ya kate amate'ya hagifanale maine'ya mage hae “Pita'ma esiana agai amemo me halatu hamaesigeno kanale humategahie.” hu'ya kate momatenaē.

¹⁶ Amatage'ya muki'a vea'mo'ya Yelusalemu aupate'ma hanea kuma'yagaleti kalima hamaeya vea'nene Satani avamu'mo'ma amakupi fale-mainea vea'nene amavale'ya ageno muki'a ago alino kanale humatene.

Aposolo vayala amavale'ya kina nopi amatenageno ensole kanomo'a memavaleno kumatega amatene.

17-18 Mono note'ma hagote kava kanomo'ene agai'enema lokae'ya mainaya vaya'ene Satusi vaya'mo'yaene amaipa haviya humatete'ya Aposolo vayala amatafa hu'ya amavale'ya kina nopi momatenae.

19-20 Amatenageno ani kegela Anumayamo ensole kanomo'a eno fita me yakino anifiti amavaleno kumatega ne'uno mage huno hie “Tamakaya utama ala mono nopi hetitama vea'mo'yama haegafa hu'ya agola maige maige hisaya hamaimula alisaya kea hamapaiho” huno humaine.

21 Hige'ya havite'ya natekefafi heti'ya u'ya ala mono nopi vea'mogamina mo hamane-paiye. Hamanepaigeno ala mono note hagote kava kanomo'ene agai'enema lokae'ya nemaiya vaya'ene ani kea ohavi'ya ne'atale'ya Kanisole vayafe'ene Isaleli nofi vayatamaenefe moge hage'ya ageno ati vayafe “Kinama humatenona vayala momavaletama eho.” hu'ya hama-paimainae.

22-23 Me hage'ya ati vayala kina nopi moyayana omaige'ya ne'atale'ya ete'ya mage mo hae “Tagaya mogonana fita tokiya'age alokileti hemalene'ya vayala kava yagai'ya kumate hetimainageta fita mo yakiteta kina nopima mogonana omainae.” hu'ya me humainae.

24 Mehage'ya ala mono note kava vaya'yagaene mono note ati kava kanoene mani

kea havite¹ya tusi¹a amakesa havi havi hu¹ya mage hae “Hana¹a hu¹ya kina nopitila fanane humainae? Hana¹a humainea ya falote hugahie.” hu¹ya hae.

²⁵ Hageno nago kanomo¹a mage huno me hamapaiye “Haviho kina nopima amataya vayala ala mono nopi heti¹ya maine¹ya vea¹mogamina humave-neliye.” huno me hie.

²⁶ Me hige¹ya mono note ati kava kanomo¹ene ati vaya¹aene u¹ya “Havigu amakai kema havimainesaya vea¹mo¹ya yafateti tahaesageta falisunagi.” hu¹ya amaikooti¹ya ako hu¹ya amavale¹ya emainae.

Aposolo vaya¹mo¹ya kolia ohu¹ya kanisole vaya¹mogami amaufina kea hufalote humainae.

²⁷ Amavale¹ya aya¹amo¹ya Kanisole vaya amu¹nopi me hetimatetageno ala mono note hagote kava kanomo¹a mage huno hie.

²⁸ “Tagaya Yisasife nago¹ene vea¹mogamina hamapaitama humaveotiho” huta tamakaila tamaumonola ago malonanagi tamakaya muki¹a Yelusalemu nemaiya vea¹mogamina mani kea hamapaitama tagaifena ‘Ago Yisasina hae-malenaya vaya mainae.’ hutama hamapai-mainae.” huno hie.

²⁹ Hianagi Pita¹a nago¹a Aposolo vaya¹ene mage hu¹ya nehae “Ma mopafi vaya¹mogami kemona akave omalegahunagi tagaya Anumaya Koti kemo akave malegahune.

30 Tamakaya Yisasina nagoke yafaga yosale asai-malageno fali-maineanagi Tototimo Anumaya Koti¹a fali-mainefiti ago ali hetitene.

31 Ali hetiteno avalesaga huno tamaga ayatega ategeno hagote kava kanoa tagu tamema aligatimainea kanoene mainea yafe tagaya Isaleli vea¹mogata tagu¹a aiyahae hisuna tagesa tamisigeta tagu¹a aiyahae hisunageno aigetateno kefo yatia atalelategahie.

32 Tagaya mani kea hisuna vaya mainonageno Alu Aotage Avamu¹mo¹a ani¹a huno mani kea humaine. Muki¹a Anumaya Koti kema akave mainaya vea¹mogamina Anumaya Koti¹a Alu Aotage Avamula ago amamine.” huno hie. Kamalieli¹a kanisole vaya¹mofe mage huno hie “Aposolo vaya¹mogamina ako hutama amateho.” huno humaine.

33 Hage¹yama mani kema haviya yafe amaipa amakata ai¹ya Aposolo vayala hamaesage¹ya falisaya amakesa nehaviye.

34 Hamaegahayanagi nagola Falasia kanomo agia Kamalieli¹e* mono humave-nelia kanogino Yuta vaya¹mogami Kanisolefi mainege¹ya muki¹a vea¹mo¹ya agima alisaga nehaya kanogino ani kanomo¹a hetino mage huno hie “Tahaote kea hugahunagi Aposolo vayala humatege¹ya kumatega hati-lavisageta kea hisune.” huno hie.

35 Hige¹ya hati-lavi¹ya vageno mage huno Kanisole vaya¹mogamife hie “Isaleli vaya¹nimogatama mani vaya¹mogamina nago yama humategahunema hinutama tamakesa

havilama hutetama ani'a hiho.

³⁶ Nayona nago kanomo agia Teutasi'e eva'yi huno 'Nagaya tokiya'ni'a hanea kano mainoe.' huno hige'ya fo hataleti'a (400) vaya'mo'ya akavela vayanagi kamani kava vayatimo'ya ago hayageno falige'ya akave'ma ne'vaya vayala atagufe'ya ute ete hageno ali'yama'amo'a afa ya kana humaine.

³⁷ Agai akavelega amakima negayaya kanafina Yutasi'e Kalili kanomo'a eva'yi huno kea hampaige'ya nago'a vayala akave ne'vageno kava vayatimo'ya Yutasina ago hayageno falige'ya akave'ma ne'vaya vayala atagufe'ya ute ete humainae.

³⁸⁻³⁹ Na'a humainaya yafe menia tamahapauve mani vayala amatalage'ya viho. Anima nehaya kea amakai'ami mopale vaya'mogami kema hanesigeno'a afa'a ha'no hugahianagi Anumaya Koti kema hanesigetama tamakayama ali haviyama hisaya amukotamia omalene. Havigu lamakaya Anumaya Kotina kame hutetama agai'ene tu hutesagi." huno humaine.

⁴⁰ Hige'ya Kamalieli ke havi'ya "Tamage hane." hute'ya Aposolo vayafe ke hage'ya age'ya nofi ka'yoteti haifu amamite'ya amaumono nemale'ya mage hae "Yisasifena nago'ene vea'mogamina hamaopaiho." hu'ya humatete'ya amatalage'ya umainae.

⁴¹ Ani Kanisole vayala amatalage'ya ne'u'ya "Anumaya Koti'a ago tamatea kava nehae." huno tagaifena nehuno "Yisasi agima ne'ayaya yafe tamakaye hisifa kavala hisagetama amukotamia

hanegahie.” huno humainea yafe tusi¹a muse hume hume umainae.

⁴² Muki¹a yupa ala mono nopi¹ene vea¹mogami nopi¹ene muki¹a vea¹mogamina Yisasifena hamapai-mainae. “Yisasina Anumaya Koti¹a taugafa aligatigahema hutenea kanoe.” hu¹ya hamapai-mainae.

6

Seveni¹a (7) vayafe Aposolo vaya amaya hiho hu¹ya humatenae.

¹ Kasago¹ya vea¹mo¹ya Yisasi kea havi¹ya amakupi malene¹ya amaku aminaya kanafina nago¹a ani vea¹mo¹ya Kaliki ke havilinaya vea mainagi nago¹a vea¹mo¹ya Hipalu ke havilinae. Kaliki kema havilinaya vea¹mo¹ya mage hae “Tagai megusa a¹neyaga havi kava hutama osi kano¹a kavela ne¹amamiyanagi Hipalu amakema ne¹aiya megusa a¹neyaga kasago¹ya kave ne¹amamiye.” hu¹ya amaipa haviya hu¹ya ke vai-mainae.

²⁻³ Kema vaiya yafe Yisasina tuelufu¹a (12) Aposolo anaga¹amo¹ya muki¹a Yisasina amaku¹ama aminaya veafe ke hage¹ya age¹ya mage hu¹ya hae “Havigu tagaya Yisasi ke hamanepauna ali¹yatia ataleta kave¹ma fako faka hisunana haviya huyafenagi nafu¹naganagatama tamakaitami amu¹notamifi atiyetama seveni¹a (7) kanale amaku amakesaene vaya¹ma, mainesigeno¹ma Alu Aotage Avamu¹mo¹a amakupima hiya

humainenage'ya vea'amimogami amaulagafima kanale kava'ma nehisaya vayafe atiyetama ani ali'yatela humatesune.

⁴ Humategahunanagi tagaya muki'a yupa nunamu huta havige havige nehuta Yisasi kea hamapaige hamapaige huta maigahune.” hu'ya humainae.

⁵ Hage'ya muki'a vea'mo'ya mani kea havite'ya muse nehu'ya ani vayala hapali'ya humataya vayala Sitiveni'a, Yisasi kea agu'afi tokiya'age huno malegeno Alu Aotage Avamu'mo'a agupina hiya humainea kanoene Filipi'ene Polokolasi'ene Nikana'ene Timoni'ene Pamenasi'ene Nikolasi'e. Nikolasi'a Atioku kanoa nayona Yuta nofi kanoa omaineanagi ea'yamo “Yuta vaya'mogami Anumaya Koti'amimo ke ali'na nagupi malegahue.” huno Isaleli nofi vayapi maineane.

⁶ Ani vayala amavalage'ya Aposolo vayatega age'ya ani vaya'mogami amanute amaya male'ya nunamuna humatenae.

⁷ Anumaya Koti kemo'a muki'a kotega ute ete hige'ya kasago'ya Yelusalemu nemaiya vea'mo'ya Yisasi kea havi'ya amakupina malenae. Kasago'ya mono note kava vaya'yagaene ani'a hu'ya Yisasi kea ali'ya amakupi male'ya amametiti humainae.

Yuta vaya'mo'ya Sitivenina kaiyeke hutenae.

⁸ Sitiveni'a tusi'a kanale kanogino kayone hisia ya'ene tokiya'aene agupina hiya humainegenon

tusiya huno ani vayapina tokiya avame yana humaine.

⁹ Ani'a nehianagi nago'a vaya'mo'ya heti'ya Sitiveni'ene ke ne'vaiye. Ani vayala miya o'ali vaya maite'ya ete'ya afa'a maine'ya nago mono nopi ne'vaya vayale. Sailinia vaya'ene Alekasatalia vaya'ene nago'a vayala Silisia vaya'ene Esia vaya'ene Sitivenina ke vaitenae.

¹⁰ Kea vaitayanagi Alu Aotage Avamumo'a ha'maegenon kanale agu agesaene kanomo kea amigeno humaine. Higeno amakai kemo'a Sitiveni kemona o'agasene.

¹¹ O'agasege'ya nago'a vayafe "Sitivenifena havige hutesageta mone lamamigahune." hu'ya hage'ya ani vayala mage mo hae "Mani kanomo'a Mosese'ene Anumaya Kotife'ene tusiya huno hu-haviya hunategeta havimainone." hu'ya mo humainae.

¹² Mani kema haya yafe muki'a vaya'mo'yaene vayatamaene kahegi kema havilinaya anaga'mogamina amaku'amo'a haviya hige'ya Sitivenina motafa hu'ya Kanisole vayate avale'ya umainae.

¹³ Ute'ya nago'a havigema nehaya vayala amavale'ya hetimatage'ya ani vaya'mo'ya mage hae "Mani kanomo'a muki'a yupa tagaila alu aotage mono notiene kahegi kene huno haviya hie.

¹⁴ Higeta havunana Yisasi'a Nasaleti kanomo'a ma ala mono nona ali'na laga'ya vaine'atale'na 'Mosese'ma tahapai-mainea kahegi kea atale-tama alu kava hiho.' huno higeta havimainone."

hu'ya hae.

¹⁵ Nehage'ya muki'a Kanisolefi mainaya vaya'mo'ya Sitivenina aulu hayana augosamo'a alave alave nehuno ensole vaya'mogami amaugosamo'ma nehia kava hige'ya age-mainae.

7

Sitiveni'a Kanisole vaya'mogami amaufi kea huno falote humaine.

¹ Ala mono note hagote kava kanomo'a Sitivenifena mage huno havige “Mani kema hugataya kea tamage nehao?” huno havige.

² Higeno Sitiveni'a mage huno humaine ne-nafagatamaene nagana'ni-mogatamaene haviho. Taginagomo'a Apalahamu'e yaufa Halani kotega o'uno Mesopotemia kotega mainegeni tokiya hale yama'aene Anumaya Koti'a Apalahamute efalote humaineane.

³ Efalote huteno mage huno hapaiye “Kagaika mopaka'aene vayakamogami'enena ne'amataleka kavelisua mopalega vuo.” huno humaineane.

⁴ Higeno Apalahamu'a anile Kalatia vaya'mogami mopa ne'ataleno Halani kotega umaineno anilega nefa'a falitegeno Anumaya Koti'a eteno hutegeni tamakayama menima mainaya mopalela emaineane.

⁵ Emaineanagi Anumaya Koti'a agai'a atafa hisia mopa nago atupa kano'a ani mopa nagoke aiya malesia mopa o'aminegi “Haenaga'a kami-gahue. Ani mopa atafa hulinesanage'ya kagaipiti

falote hisaya nafa¹neyagamo¹ya aligahae.” huno hianagi ani kanafina Apalahamu¹a namo kano maineane.*

⁶ Maineanagino Anumaya Koti¹a agaifena mage humaineane “Kagaika¹a kaginagomo¹ya Isaleli nofi¹ma omainaya vaya¹mogami mopale visage¹ya ani vaya¹mo¹ya amatafa hu¹ya ‘Ali¹yatia aliho.’ hu¹ya tusi yate ali haviya humatesage¹ya ani mopalela fo hataleti¹a (400) kafu maigahae.*

⁷ Maigahayanagi amatafama hu¹yama ‘Ali¹yatima aliho.’ hu¹ya humainaya vaya¹mogamina nagaya kaiyeke humatete¹na ali¹na haviya humatesuge¹ya kagai kaginagomo¹ya ani kotegatila ete¹ya ma mopale emaine¹ya nagai nagia alisaga hugahae.” huno humaineane.

⁸ Anumaya Koti¹a mage huno humaine “Nagai anaga¹ma maisaya yafe hagelafita maisuna kavala nafa¹nekamogamina amakoya ano¹ya taga huo.” huno higeno Apalahamu¹a Aisakina nafa¹ne¹a ateteno napa eiti¹a (8) kana maiteno agoya ano¹ya taga humaineane. Haenaga¹a Aisaki¹a nafa¹ne¹a Yekopuna ategeni Yekopu¹a haenaga¹a tuelufu¹a (12) nafa¹neyaga tagai taginagomogamina amatene.

⁹⁻¹⁰ Ani Yosefena nepu¹amo¹ya Yosefefe tusi¹a amaipa kafa hetete¹ya avale¹ya alu vaya¹mogami ne¹amami¹ya mone alige¹ya Isipi kotega avale¹ya vayanagi Anumaya Koti¹a agai¹ene maineno kanama haiya yana alitaleno kanale agu agesa

amigeno Isipi sauve kanoa, Felona, aulagale hetigeno Felo'a muse huno “Hagote kava kano maineka nagai no'yagaene muki'a Isipi kotega kava yagaigane.” huno hutene.

¹¹ Hutetegenog mainegenog Isipi kotegaene Kenani kotegaene nagola tusi'a kafu haya kana efalote hige'ya tototimogamina kave'amia omalege'ya tusiya huno amakala lemainer.

¹² Amakala legeno Yekopu'a “Isipi kote'ma kavela hanema.” hu'ya haya kea haviteno nafa'neyaga'a hagoteno humatege'ya kave'ma hanelega umainer.

¹³ Haenaga'a ete'ya anile vageno Yosefe'a “Nagayae tamakanatamimo'na mainoe.” huno higeno Felo'a Yosefe afamofena havimainer.

¹⁴⁻¹⁵ Havitegenog Yosefe'a nefafena Yekopufe'ene muki'a anaga'a sevete faefu'a (75) anaga'aene ke hige'ya Isipi kotega umainergenog Yekopu'a anile falige'ya nafa'neyaga'aene tototimo'ya fali-mainayer.

¹⁶ Falige'ya ete'ya ali'ya Sekemu kumala, Apalahamu'a moneleti Hamolo nafa'neyagamogami mopa miya higeno amigeno ali-mainea mopafi mo hevaitenae.

¹⁷⁻¹⁸ Anumaya Koti'a Apalahamufema hulokiya vai-malenea kemo'a fatago huno efalote hisia kanamo'a aupa hige'ya tagai taginagomo'ya Isipi kumatela falote hu'ya kasago humainergenog alu sauve kanoa, Yosefefena o'agenea kanomo, eteno sauvea alino humainerene.

¹⁹ Falote huno maineno tagai nofi vayala

ayemavataga huno huhaviya hune'amateno
 “Nafa'neya-gatamia hamaesunage'ya faligahae.”
 huno tokiya'age ke humaineane.

²⁰ Higeno ani kanafina Mosesena ita'amo'a
 atetegeni Anumaya Koti'a hau-mainea
 nafa'negino ita'amogani nefagania tali'a (3)
 ikana no'anifinaga kava hu'ana ata'ageno
 maina'e.

²¹ Kava hutete'ana kumate atena'ageno Felo
 muna'mo'a ani nafa'nea avaleno agai'a nafa'ne
 kana huno yagai-maine.

²² Yagaiteno avo nopi ategeni Isipi
 vaya'mo'yama havilinaya yana Mosesena huve-
 ligeno aliteno tusiya huno tokiya'a haneteno
 kanale kea nehuno nehia kano maine.

²³ Maineanagino foti'a (40) kafu huteno mage
 hie “Isaleli vaya'nimogamina momakegahue.”
 huno agesa havimaine.

²⁴ Haviteno mogeana nago Isipi kote kanomo'a
 Isaleli kanomona aiko-neligeno Mosese'a moli-
 ne'ataleno anona'a ani Isipi kote kanoa haegeni
 fali-maine.

²⁵ Faligeni Mosese'a ma agesa havimaine
 “Vaya'nimo'ya mage hu'ya hugahae ‘Anumaya
 Koti'a Mosese ayapiti taugafa aligatigahie.’ hu'ya
 hugahae.” huno agesa havianagi vaya'amo'ya
 ani amakesa ohavinae.

²⁶ Ohavigeni Mosese'a faeteni mogeana
 tole Isaleli kanolatana tu neha'ageni
 monaketeni moli-ne'anataleno mage huno hie
 “Nenafugatanae tanakaya nagoke konagalata
 maina'agi na'a higetana tua neha'e?” huno hie.

27 Higeno anima tuma aepa heno¹ma agana¹amoma aiko-lia kanomo¹a Mosesena ayetu-nefeno mage huno hie “Kagaila tagaite kava kano maika kaiyeke fatago hu kano maiyo kea ta kahapaigeka ani¹a nehane?

28 Kagayama egama Isipi kanoma hayana kava huka nahaegahe nehano?” huno hie.

29 Higeno ani kema hia kehe Moses¹a faleno Mitiani kotega mo maineno ala aliteteno maineno haenaga¹a tole ne nafa¹nelata anatene.

30 Anilegama maiyana foti¹a (40) kafu maiteno Moses¹a ka¹me kotega Sainai ago¹yafi haino mainegeni nago osi yosalela ala ata anefela nelea yapiti nago ensole kanomo¹a eva¹yi higeno age-maini.

31-32 Ageteno ama¹yo ne¹aino agelama hisue huno nehuno avate ne¹egeni Anumayamo¹a anileti age aino mage huno hie “Nagaya kaginagomogamina Anumaya Koti¹ami mainoe. Apalahamu¹agi Aisaki¹agi Yekopugami Anumaya Koti¹ami mainoe.” huno higeno Moses¹a atali talu huteno ani yama nago¹ene agesia yafena tusi koli huno o¹agene.

33 Koli nehigeno Anumayamo¹a mage huno hie “Mamona alu aotage mopa nagai¹ni¹a mopagika kaiya anona asagika maletekao.

34 Nagayama nagai nofi vaya¹ma Isipi ne-maiya vea¹nimoga-mina ali haviyama humataya kavala ago age-mainoe. Avima atayana ago havimaine¹na amaugafa aligatigahe emainogi. Kagaya eno Isipi kotega hugategahue.” huno

Mosesefena hapai-mainea ke huno Sitiveni'a hamapai-mainae.

³⁵ Mani Mosesefena nayona mage hu'ya humainae “Kagaila kava kano maineka kaiyekea ali fatago hugane hu'ya kea ta kahapaigeka ani'a nehane?” hu'ya amakave'no hutena. Anima amakave'no hutaya kanomona osi yosale'ma va'yima humainea ensole kanomo'a aya higeno Anumaya Koti'a kava humateno amaugafama aligatisia yafe huteneane.

³⁶ Hutegeni Mosesi'a Isipi kotega umaineno ani kotegati amavaleno foti'a (40) kafu Isipi kumate'ene haesa tite'ene ka'me kotegaene kasago'ya tokiya avame ya'yaga humaineane.

³⁷ Ani Mosesi'a Isaleli vea'mogamife mage huno hamapai-mainae “Anumaya Koti'a tamakai vayapiti nagayama hua'ya huno aune laga hisia kanoa avaleno hetitegahie.” huno hamapai-mainaeane.

³⁸ Ani Mosesi'a ka'me kotega maineno mono kema havigahema melitalu humainaya taginagomo'yaene maiteno Sainai ago'yafi haitegeni nago ensole kanomo'a eva'yi huno Anumaya Kotina tahaimu'ma lamisia mono kea Mosesena hapaigeno Mosesi'a taginagomogamina hamapai-mainaeane.

³⁹⁻⁴⁰ Hamapai-mainegi taginagomo'ya “Mosesi kea akave omalegahune.” hu'ya amakave'no hutete'ya Isipi kotega ete'ya visaya amakesa nehavi'ya Elonife mage hu'ya humainae “Kategama lavaleno visia yana Anumaya

Kotitima maisia yana talo hulato. Mosese¹a, Isipi kotegati¹ma lavaleno¹ma emainea kanoa hanatepi vigeta no¹agone.” hu¹ya humainae.

⁴¹ Mani kea hute¹ya nagola pulamakamo nafa¹nea amayateti talo humaletē¹ya “Anumaya Kotitia ma maine.” hu¹ya anima amayateti¹ma talo humalaya yafena tusi¹a muse hu¹ya afua he¹ya kaete¹ya ali¹ya mominae.

⁴² Ani kava¹ma haya yafena Anumaya Koti¹a akave¹no humateteno amatalege¹ya yagama ka¹nefi¹ma ikama na¹a yama hanea yate “Anumayati mainae.” hu¹ya muse nehu¹ya amaku¹a amitafa hu¹ya ani ya¹ayagamogami amaki alisaga humainaya yafe Anumaya Kotina aune vaya¹mo¹ya kae-malenaya auta¹mafina mage hu¹ya humainae “Tamakaya Isaleli nofi vea¹mogatama foti¹a (40) kafu ka¹me kotega umainetama pulamakaene sipi sipiene hetama kae sala¹mana humainayanagi nagaifena muse hutama mani kavala nehafi alu kanomofe musena nehae?

⁴³ Tama¹a omalenea Anumayamona agi¹a Molekifena tusi¹a muse hutama agai agi alisaga hisaya nona kitetama alitama utama tama¹a omalenea Anumayamona agia Lefanifena tusi¹a muse hutama ka¹nefi kana yana talo hutama ani augafa ya¹yagale musena hutama tamakula amitafa hutama amakia alisaga nehae. Na¹ama haya yafe kame vaya¹mo¹ya humatesugetama kotamilegatila tamavale¹ya Papiloni kola agasetama ame kaiyaga umaigahae.” huno

humaineane.

44 Taginagomo'ya ka'me kotegama mainageno'a Anumaya Koti'a "Ma kava huka talo huo." huno'ma Mosesena huvelimainea kavala huno mono nona kenaleti talo humaleteno kimalenegeni Anumaya Koti'a ani nopi eno amakai'ene me lokaeno kelamage kea hamapai-maineane.

45 Haenaga'a Mosese'a falitege'ya taginagomo'ya ani yuguleti'ma kimalenaya mono nona ali'ya Yosua'ene Yuta vea omainaya vea'nene tua hute'ya mopa'amia ali-mainae. Anumaya Koti'a taginagomogami amaulagafima Isaleli nofi'ma omainaya vea'mo'ya ani mopaletila amanatige'ya ani yuguleti'ma kimalenaya mono nona ali'ya ani mopafi e'ya me malageno anile hanegeni Teviti'a falote humaineane.

46-47 Anumaya Koti'a Tevitina kanale'ya huno ha'maegeni Teviti'a mage humainene "Yekopu Anumaya Kotiga kanale nona kigatesue." huno hianagi ani nona okinegi haenaga'a nafa'ne'amo'a Solomoni ani nona kimaleneane.

48 Kianagi anale'ma mainea Anumaya Koti'a vea'mo'ya amayateti'ma kimalenaya nopina no-maiye. Na'ama humainea yafena nagola Anumaya Koti'a aune kanomo'a mage huno humaineane

49-50 "Anumaya Koti'a mage hie 'Ikapinaga nagai'ni'a kava yagaisua sia'nia hanegi maifaluma hisua yafe naiya male'na maisua yana mopa hanegi hana augafa

no kinategahae? Hana kumate maisue? Nagaya muki'a yana ikapinagama hanea ya'ene ma mopale'ma hanea ya'ene talo humalenoe.' huno humaine.” huno humaineane.

⁵¹ Tamakaya kea ohavi vea'ne mainetama tamaku tamakesafinaga “Anumaya Koti kea ohavigahune.” hutama Alu Aotage Avamu'mona tamakave'no hutetetama tamakinagomo'ya nehaya kava'age nehae.

⁵² Tamakinagomo'ya muki'a Anumaya Kotina amaune vaya'amogamina ali haviya humatenae. “Kanale Fatago Kanoa egahie.” hu'ya amaune vaya'mogamina tamakinagomo'ya ago hamayage'ya falimainayanagi tamakaya ani Kanale Fatago Kanomona ago agesi hutama hayageno fali-maine.

⁵³ Ensole vaya'mo'ya aya'amo'ya kahegi kea ago tamahapaiyanagi tamakaya tamage hutama akavela nomalae. Mani kea Sitiveni'a huno humaine.

Sitivenina yafa ka'lyoteti hayageno fali-maine.

⁵⁴ Hige'ya anile'ma mainaya vea'mo'ya Sitiveni'ma hia kemona havite'ya amaipamo'a tusi amakata aiteno hamai-vaige'ya amavaya mumu mama humainae.

⁵⁵ Na'a nehageno Sitiveni agupina Alu Aotage Avamu'mo'a hiya higeno ikapinaga aulu heno ageana Anumaya Kotina tokiya hale yama'aene Yisasi'a Kotina tamaga ayatega heti-mainegeno age-maine.

⁵⁶ Ageteno mage huno hie “Agegeho naga-gaya agoana ikamo'a ago aihalegeno ikapinagati emainea kanoa vaya'mo atenea kanomo'a Anumaya Kotina tamaga ayatega heti-mainege'na nagaya ne'agoe.” huno hie.

⁵⁷ Huno hianagi melitaluma humainaya vea'mo'ya agai kea ohavisaya yafe amayateti amakesa ailinele'ya ala kenake nehu'ya tusi'a ke ne'vai'ya aiko-ligahe motafa humainae.

⁵⁸ Motafa hu'ya avayu hu'ya kumategati malaga haga'yu hutalene'ya yafa ka'yoteti haga'yu hu'ya aiko-neli'ya “Fatago kava nehune” hu'ya hisaya yafe siota'amia asagi'ya kava kanoa, Solo* aiyafi mo-malena.

⁵⁹ Maletel'ya yafa ka'yoteti aiko-neligeno Sitiveni'a Anumayamotega havigeno mage huno hie “Anumayani'amoga Yisasigae nagu namema'a kagai kayapi nemaloe.” huno humaine.

⁶⁰ Mani kea nehuno ale'ya ayeno ala kegefafiti Anumayamotega mage huno hie “Anumayamogae mama kefo kava'ma nehaya ya'amimona anona'amia hu-o'ama-to.” huno nehuno anile fali-main.

8

Solo'a tusiya huno Yisasina amaku'ama aminaya veala alino haviya humatene.

¹⁻² Sitivenima hayageno falia yafena Solo'a “Kanale kava hae.” huno tusi'a muse humaineanagi nago'a vea'mo'ya Anumaya Koti kema nehaviya vea'mo'ya Sitivenifena

tusi¹ avi atete¹ya ali¹ya mo hevaitetage¹ya ani kanaleti aepa he¹ya Yisasi kema havi¹ya amaku¹ama aminaya vaya¹mogamina Yelusalemuma nemaiya vea¹mogamina ali¹ya haviya humatage¹ya ani vea¹mo¹ya fale¹ya Yutia kotegaene Samelia kotegaene ute ete hage¹ya Aposolo vayala amakai¹amige Yelusalemua mainae.

³ Mainageno Solo¹a Yisasi kema havi¹ya amakupi malenaya vea¹mogamina alino haviya humateno amakai¹ami no¹yagafi haino muki¹a veala amavaleno kina mo humatene.

Filipi¹a Yisasina kanale mono ke¹a nago¹a Samelia kumate mo huhaleno humaine.

⁴ Kinama humatage¹ya nago¹a umainaya vea¹mo¹ya alu kote kote fale¹ya ute ete hu¹ya Yisasina kanale mono ke¹a hamapai-mainae.

⁵ Filipi¹a nagola Samelia hanea kumate tavino mage huno mo hamapaiye “Yisasina Anumaya Koti¹a taugafa aligatigahema hutenea kano emaine.” huno hamanepaiye.

⁶⁻⁷ Hamapaige¹ya muki¹a vea¹mo¹ya agai kea havite¹ya agai¹ama humainea tokiya avame yamo¹a Satani Avamu¹yaga vea¹mogami amakupitila ala amake ne¹ai¹ya hatilavi¹ya ne¹vageno amaiya amaya avayu hulavi-mainea vea¹nene amaiya haviya humainea vea¹nene alino kanale humatege¹ya agete¹ya nagoke amaku amakesa havi¹ya ke¹a ali¹ya amakupi malenae.

8 Amakupi malete'ya ani kumate vea'mo'ya tusi'a muse humainae.

Saimoni'la tokiya avame ya talo nehia kanoe.

9 Muse hayanagi ani kumatela nago kanomo agia Saimoni'e "Nagaya tusi'a ala kano mainoe." huno tokiya avame yana hige'ya muki'a Samelia vea'mo'ya agete'ya tusi'a amama'yo ne'aiyane.

10 Amama'yoa aite'ya ala amakima hanea vea'nene osi amakima hanea vea'nene agai kea havite'ya mage hu'ya humainae "Ma kanoa Anumaya Koti'a ala tokiya'a aminea kanoe." hu'ya humainae.

11 Kasago'ya yupa tokiya avame yama hige'ya agaya yafe tusi'a amama'yo aige'ya agai ke havimainae.

12 Haviyanagi Filipi'a anile eva'yi huno Anumaya Koti'ma kava yagaisia kanale kene "Yisasina Anumaya Koti'a taugafa aligatigahema hutenea kano emaine." huno'ma hia kanale kene havite'ya Yisasina amaku'a amitafa hageno veala tina falematene.

13 Saimoni'enena Yisasina agu'a amitafa higeno tina faletetegeneno Filipi'ene vaine'ayegeno Filipi'a tokiya avame yana higeno ageteno tusi'a ama'yo aimaine.

14 "Samelia nemaiya vea'mo'ya Anumaya Koti kea havi'ya amakupi ali'ya malenae." hu'ya haya kea Yelusalemuma nemaiya Aposolo vaya'mo'ya havite'ya Pita'ene Yoni'ene hunatage'ana ani kumatela elavi-maina'e.

15 Elavite¹ana Anumaya Koti¹ma ani vea¹mogamima Alu Aotage Avamu¹ama amamisia yafe Anumayamotega havige-maina¹e.

16-17 Amakaya Yisasi agile ago tina falematayanagi Alu Aotage Avamu¹mo¹a amakaitela eotavine. Eotavinea yafe Pita¹ene Yoni¹ene anaya amaugafale avate hulina¹age¹ya Alu Aotage Avamula avale-mainae.

18-19 Aposolo kanolatamogania anayama nemala¹age¹ya Alu Aotage Avamula avalageno Saimoni¹a ageteno mage huno hie “Mone lanamisugetana tokiya yana nagaila namisa¹age¹na naya malesugeno vea¹mo¹ya Alu Aotage Avamula avalesae.” huno hanavige.

20 Higeno Pita¹a mage huno hapaiye “Kagaya Anumaya Koti¹a afa¹ama ne¹amamia yafema miya hugahue hukama kagesa havina yamo¹a monika¹aene kagaika¹aene Anumaya Koti¹a alino haviya hugatesie.

21 Anumaya Koti aulagafina kagai kagupina kanale ohunea yafe ani ali¹yana kagai yana omaletafa huno omalene.

22 Menima kefo kava¹ma hana yafena kagu¹a aiyahae huka Anumayamotega havigesanageno ani kagu kagesafima havi kagesama havina yaka¹a aigekateno kefo yaka¹a atalegatesie.

23 Nagaya kagupima agoana kaipamo¹a haviya humainea yafe atu¹age nehigeno kefo yakamo¹a nofi hugatene.” huno kenona¹a hapaiye.

24 Higeno Saimoni¹a mage huno hapaiye “Nehana yamo¹a nagai naugafalela falote ohisia yafe

tanakaya nagaila nunamuna hunate'o." huno hanapai-maine.

²⁵ Pita'ene Yoni'ene Anumayamo ke hamapai'ana mage hu'ana ha'e "Ta'agaya Yisasina ageteta'a agaifena ta'agupi maleno'e." hu'ana hamapaite'ana ete'ana Yelusalemu ugahe kategama va'ana Samelia kola alu kumate kumate u'ana Yisasifena kanale mono ke'a hamapai-maina'e.

Filipi'a nagola Itiopia kotega kanomona Yisasina kanale mono ke'a hapai-maine.

²⁶ Nago ensole kanomo'a Filipifena mage huno me hapaiye "Hetika Yelusalemuti Kasa kumate'ma ne'vaya katega vuo." huno hapaiyana ani kana ka'me kotega umainea kane.

²⁷⁻²⁸ Higeno Filipi'a hetino ani katega via'yamo mogeana nagola anupa kanoa Itiopia kotega kava kano'e muki'a ala sauve aala, Kanatesi'e hu'ya agia ne'ayaya a'mo, mone afeno'yate kava ne'yagaiyane. Ani kanoa Anumaya Koti agi alisaga hugahe Yelusalemu uteno ani yupa eteno noma'alega ugahe hosi afumo'ma avayu huno ne'via kalefi haino maineno Anumaya Kotina aune kano'amo'a, Aisaiya, kae-malenea auta'mafi hapalime hapalime umaine.

²⁹ Ne'vigeno Alu Aotage Avamu'mo'a Filipife mage huno hapaiye "Kagaya ani kalefi mo haisaga humaika agai'ene tokaeka vuo." huno hapaiye.

³⁰ Hapaigeno Filipi'a aiyayeno avate ne'uno mo haviana Aisaiya'ma kae-malenea

auta'mafima hapalimema via kea mo haviteno mage huno hapaiye “Kagaya mani kemona aepa'a havilama nehano?” huno havige.

³¹ Havigegeni ani kanomo'a mage hie “Nago kanomo'ma naveotisiana hana'a hu'na havigahue?” huno huteno Filipifena “Nagaya mainole ehaika nagai'ene emaiyo.” huno hapaiye.

³² Anima Anumaya Koti kema kae-malenea kema hapalia kemo'a mage huno humaine

“Sipi sipi haegahema avale'ya ne'vageno'ma avovoma ohuno ako huno nemaiya avamete'ene sipi sipi nafa'neyagama ayolagefama laga hugahema hia kanomote mo het'i'ya maine'ya avovoma ohunaya avamete kava huno ke ohuno ako huno maine.

³³ Ani kanomofena ‘Afa kano mainane.’ hu'ya agaye hisifa kava hutete'ya fatagoma hia kaiyekea huo'atenagi afa'a hayageno falimainegeni agai'a nafa'nema omainea yafe nago'a vea'mo'ya avage'a ohugahae. Ma mopale'ma mainea kana'amo'a ago ha'no humaine.” huno kaemalenea ke hapalime umaine.

³⁴ Hapaliteni ani kava kanomo'a Filipife mage huno havige “Ani aune kanomo'a tafe mani kea huno humaine? Agai'ahe humainefi nago kanomofe mani kea humaine?” huno havige.

³⁵ Havigegeni Filipi'a aepa heno mani kemo aepa'a hapaiteni Yisasina kanale mono ke'a hapaimaine.

³⁶ Hapai me hapai me katega ne'u'ana nago tite uva'yi hute'ana ani kava kanomo'a mage huno hapaiye “Tina ma hanegi ago kanale mani lina falenategano?” huno havige.

³⁷ Havigegeno Filipi'a mage huno hapaiye “Mani kema havika kagupi malekama kametiti hisanana kanalelagi'na lina falegategahue.” huno higeno ani kanomo'a mage hie “Nagaya Yisasi Kalaisi'a Anumaya Koti nafa'ne maine. Tagai taugafa aligatigahe hutenea kano maine hu'na ali'na nagupi male'na nametiti nehue.” huno humaine.

³⁸ Nehuno hosi afumo'ma avayu nehia kalemo talaiva kanomofe “Male atafa huo.” huno hige'ana Filipi'ene ani kava kanoene tipi tavite'ana Filipi'a tina faletene.

³⁹ Faletetege'ana tipiti'ma ehai'ageno'a Alu Aotage Avamumo'a aupa'a Filipina avaleno vigeno ani kava kanomo'a nago'ene Filipina o'ageanagi katega tusi'a muse hume hume.

⁴⁰ Utegeno Filipi'a Asotasi eva'yi huteno Yisasina kanale mono ke'a muki'a kumate vea'mogamina hamapai me hamapai me uno Sisalia uva'yi humaine.

9

Solo'a Yisasite agu'a aiyahae humaine.

¹⁻² Ani kanafina Solo'a aipafinaga tusi'a hai-vaiteno tokiya'age ke huno “Anumayamo anaga'amogamina hamaesuge'ya falisae.” huno huteno ala mono note hagote kava kanomote uno mage huno havige “Museka'a

nehugi nagaya Tamasigusi kumate u'na Yisasi anaga'amogamima amakenu'nahena amatafa hu'na kina humatete'na Yelusalemu amavale'na egahue. Ani kumate mono note kava vaya'mo'ya nayama hisaya yafe avona kaeka namio.” huno humaine.

³ Ani kotega Solo'a via'yamo Tamasigusi eva'yi hugahema nehiana aupala ikapinagatila tokiya'age hale yamo'a tusiya huno agaite meyevasa humaine.

⁴ Meyevasa higeno Solo'a mopafi asaga hulavino fae-maineno havigeno nagola ala kemo'a mage huno hie “Sologae Sologae na'la higeka nagaila ali haviya nehane?” huno humaine.

⁵⁻⁶ Higeno Solo'a mage hie “Alamogae kagaya lagae?” huno higeno mage hie “Nagaya Yisasi'nae kagayama nagai'ma ali haviya hune-natana kanomo'nagi hetika ala kumate ugeno'o. Nago kanomo'a 'Na'la ma'la hugane.’ huno kaha-paigahie.” huno hapai-maine.

⁷ Hapaige'ya Solo'enema vaiyaya vaya'mo'ya het'i'ya maine'ya anima agema aiya agea haviyanagi vaya'ma o'agaya yafena tusi'la amama'yo aite'ya nagokela kea ohunae.

⁸ Solona mopafiti avale'ya hetitageno aulagama agegali hiana aulagamo'a hani'ali ko'ali higey'a ayate ali'ya Tamasigusi avale'ya umainae.

⁹ Vageno Solo'a tali'a (3) kanama maiyana aulagamo'a ani'la huno asu humaigeno kave'ene ti'ene mosino afa'la oneno maine.

10 Ani Tamasigusia nagola Yisasi anagapiti kanoa, Ananaiyasi'e nehaya kanoa maineanagino Anumayamo'a himonafi mage huno hapaiye “Ananaiyasigae mainano?” huno higeno “E, ma mainoe Anumaya ni'amogae.” huno humaine.

11 Higeno Anumayamo'a mage huno hapaiye “Hetika fatago kane hu'yama nehaya katega uteka Yutasi nopi ufalekama agesanana nagola Tasusi kanomona agia Solo'e nehaya kanoa anifi maineno Anumayamotega nunamu maino nehi-anagika mogegane.

12 Ani kanomo'a himonafima ageana nago kanomo'a eno aulagama agegali hisia yafe anute aya me-malene. Anima himonafima agea kanoa kagayae. Kagaika'a Ananaiyasigae huno himonafina age-maine.” huno hapai-maine.

13 Hapaiyanagi Ananaiyasi'a mage huno humaine “Anumayani'amogae ani kanomofena muki'a vea'mo'ya mage hu'ya hage'na nehavuane Yelusalemuma kagai anaga'ma mainaya vea'mogamina tusiya huno ali haviya hune'amate hu'ya hage'na havi-mainoe.

14 Ala mono note ala kava vaya'mo'ya avona amigeno male'ma kagai kagile'ma nunamu huta kahavinegona vea'nea kina hulategahe emaine.” huno hie.

15 Nage hianagi Anumayamo'a mage huno hie “Afa'a agaitega vuo. Ani kanoa nagaya ago hapali'na hutenoa kanoe. Nagai kea alino visia'yamo Yuta vea omainaya vea'mogami'ene

saue veya¹amiene Isaleli vea¹mogami¹ene nagai kea hamapaigahie.

¹⁶ Nagai fena huhaleno hamane painage¹ya agata aisia ya¹ene kanama haisia ya¹ene eva¹yi hutesia yafe aveligahue.” huno hapai-mainie.

¹⁷ Hapaigeno Ananaiyasi¹a via¹amo ani nopi haino Solo anute aya maleno mage huno hie “Nagana¹nimoga Sologae Yisasi¹a Anumayati¹amo¹a emainana kate¹ma eva¹yima hu-mainiea kanomo¹a kaulagama agegali hisana yafe¹ene Alu Aotage Avamu¹mo¹a kagupima hiya kahaisia yafe¹ene hunatege¹na ne¹oe.” huno hie.

¹⁸ Higeno aupa¹a aulagaletila haleti¹na kana yamo¹a asaga hulavigeno aulaga agetegenono tina faletene.

¹⁹ Kavela netegenono augafamo¹a tokiya vaigeno Tamasi gusi Yisasi anaga¹ma mainaya veapi uno nago¹a kanafina amakai¹ene mainie.

Solo¹a Tamasi gusia Yisasi fena kanale monoke¹a huhaleno humaine.

²⁰ Tamasi gusi maineno aupa¹a muki¹a monono¹yagafi ute ete hia yamo mage huno hama-paiye “Yisasi¹a agai¹age Anumaya Koti nafa¹nea mainie.” huno humaine.

²¹ Mani kema haviya vea¹mo¹ya tusi¹a amama¹yo ne¹ai¹ya mage hu¹ya hae “Mani kanomo¹a Yelusalemu maineno Yisasi agile¹ma nehaviya veala ago hamaeteno ma kumate eno ani¹ama nehaya vea¹ne kina humateno ala monono note kava vayate kaiyeke humatesia yafe amavalegahe emainea kanofi?” hu¹ya hae.

²² Hayanagi Solona hamapaisia tokiya'amo'a melino ala higeno “Yisasina Anumaya Koti'a tagai taugafa aligatigahema hutenea kano emaine.” huno tusiya huno humavelia yafena anima Tamasagusi nemaiya Yuta vea'mo'ya alu amakesa alu amakesa havimainae.

Yuta vaya'mo'ya Solona hae'ya faligahe hageno faleno umaine.

²³⁻²⁴ Amaipamo'a haviya hige'ya aya'aya kana maite'ya Yuta vaya'mo'ya “Hana'a huta Solona haesunageno falisie?” hu'ya hute'ya haesaya yafe nate'ene kege'ene ani kuma'mona fiatega yagai'ya maiyanagi Solo'a mani kea ago havi-mainae.

²⁵ Haviteno mainege'ya nago'a Yisasi anaga'mo'ya nago kegela Solona avale'ya yafateti humalenaya tafile haite'ya ala kamagupi Solona asaga hu'ya aite'ya ani kegi'yafiti malaga atalageno tavimaine.

Solo'a Yelusalemu umaine.

²⁶ Solo'a Yelusalemu umaineno Yisasi anagapi umaigahe hianagi agaifena koli'a nehu'ya Solofena “Yisasi kea nohavia kanoe.” hu'ya amametiti humainae.

²⁷ Hayanagi Panapasi'a aya huno Aposolo anagate Solona avaleno via'amo kategama Anumayamona agegeno kema hapai-mainea yafe'ene Solo'a Tamasigusia kolima ohuno tokiya'age'ma huno Yisasi kema hamapai-mainea yafe'ene Panapasi'a hamapai-mainae.

28 Hamapaige'ya havite'ya Solona avalageno amakai'ene Yelusalemu kumate vaiyatete huno maineno kolia ohuno Yisasi kea tokiya'age huno hamapai-mainae.

29 Solo'a nago'a Kaliki kema nehaya Yuta vaya'enema tokiya'age kema vaiya yafe ke ne'vai'ya haesageno'ma falisia kafe atiyemainae.

30 Ne'ayageno Yisasina amaku'ama aminaya vea'mo'ya ani kema haya kea havite'ya Solona Sisalia kumate avale'ya tavite'ya anileti hutageno kuma aepa'alega Tasusi umaine.

31 Yutia'ene Kaliliene Samelia'enema Yisasifena havi'ya amakupi malenaya vea'mogamina amaipamo'a falu hinage'ya maine'ya kanale'ya hu'ya alitalu huge huge hu'ya amaku'a ali lokiya vai'ya nemaiye. Anumaya Kotima haiya kate'ma vaiyaya yafe Alu Aotage Avamu'mo'a amaya hige'ya kanale'ya hu'ya nemaige'ya kasago'ya vea'mo'ya ete ete hu'ya amakai'ene melitalu humainae.

Pita'a Ainiyasina kali'a alino kanale hutene.

32 Pita'enena alu kumate kumate vaiyatete nehuno Lita kumatela Yisasifena havi'ya amakupi malenaya vea'nene maine.

33 Maineno ageana nago kanoa aiya ayamo'a avayu hulavigeno nemaiya kanoa eiti'a (8) kafufina kaana vai'o'ayeno sipale faeno nemaiya kanoa mogemaine. Ani kanomo agia Ainiyasi'e.

34 Pita'a mogeteno mage huno hapaiye "Aini-asiga Yisasi'e, Anumayatimo'a, ago alino kanale

hugategi hetika fae-nemaina sipaka'a alika hilato huo.” huno higeno aupa'a he'neligeno kanale hutene.

³⁵ Kanale'ma hutegeno maiya yafe Lita vea'nene Saloni vea'nene ani kanomona agete'ya Yisasite amaku'a aiyahae humainae.

Tapita'a fali-mainegeno Pita'a alino hetitene.

³⁶ Yopa kumatega Yisasifena havi'ya amakupi malenaya veapiti nago aala maine. Ani a'mo agia Tapita'e. Kaliki kefina mage hu'ya ani a'mo agia ne'ayayane Tokasi'e hu'ya ne'ayaya a'mo'a tusiya huno kayone'age a maineno muki'a kanafina kave'amienne afeno'amienema omalenea veala amaya huno ne'amamia ale.

³⁷ Pita'a Lita mainegeno ani a'mo'a kali alino falige'ya ani a'mona augafa sese hutete'ya ali'ya hunalagi-malenaya note anale malenae.

³⁸ Malete'ya Yisasifema havi'ya amakupi malenaya anaga'mo'ya Pita'a Litama mainea kea havite'ya Lita kumala Yopa kuma'mona aupa'ale hanea yafe tole kanolatana hunatage'ana u'ana mage hu'ana mo-hapai'e “Museka'a nehu'agi aupa'a ta'agai'ene kumati'alega eno.” hu'ana hapai'e.

³⁹ Hapai'ageno Pita'a anakai'ene via'amo uva'yi hige'ya anima hunalagi-malenaya nopima avale'ya haiyana kasago'ya megusa a'neyaga anile heti'ya maine'ya avi ne'ate'ya amakai'amima fai-linaya kena'amia Tokasi'a amakai'enema afa'a mainea kanafi talo humalenea kena'amia Pitana aveli-mainae.

⁴⁰ Aveligeno Pita¹a ageteno muki¹ama mainaya vea¹mogamifena “Ma nopinagatila hati-lavitama viho.” huno hige¹ya hati-lavi¹ya vageno ale¹ya aye-maineno nunamuna huteno ani a¹ma male-nalega augosa humaineno mage huno hie “Tapitagae hetio.” huno higeno ani a¹mo¹a fali-mainefitila aulaga agegali huno Pitana ne¹ageno hetino sipale maine.

⁴¹ Sipale mainegenon Pita¹a ayana amitenon avale hetiteteno Pita¹a Yisasima amaku¹ama aminaya veafe¹ene megusa a¹neyagaenefe ke hige¹ya aageno fali-mainefitila hetino haegafa higeno avaleno amamine.

⁴² Ani¹ama hia kemo¹a muki¹a Yopa kumatela ute ete hige¹ya kasago¹ya vea¹mo¹ya havite¹ya Yisasifena havi¹ya amakupi male¹ya amametiti humainae.

⁴³ Pita¹a muki¹a yupa Yopa kumatela maineno nagola pulamakamo augafa taga huno talo nehia kanoene nemaiyane. Ani kanomo agia Saimoni¹e.

10

Nago ensole kanomo¹a eno Koniliasina ke mehapai-maine.

¹ Nago kanoa Koniliasi¹e ati kava kanoa Sisalia maineno Itali kumateti vani hataleti¹a (100) ati vayate kava yagai-maineano.

² Ani kanoene anaga¹aene Anumaya Koti kema nehavi¹ya nemaiya yafe “Agayama haiya kava hugahune.” hute¹ya afeno¹amima omalenea veala monea amamite amamite nehu¹ya muki¹a

kanafina nunamuna hu'ya muse hu'ya havinegayane.

³⁻⁴ Nago unena ani kanomo'a heti-maineno himona kana yana ageana nagola Anumaya Koti ensole kanomo'a agaite eva'yi huno mage huno humaine “Koniliasigae mainapio?” huno higeno Koniliasi'a aulu neheno tusi'a ama'yo ne'aino mage huno hie “Ala kanomogae na'a higeka nehane?” huno higeno ensole kanomo'a mage huno hie “Kagayama Anumayamotega havinegana ya'ene afeno'amima omalenea veala hama'maeka amamite amamite hana ya'ene Anumaya Koti'a ageteno kagaifena agesa nehavie.

⁵ Kagaya menia nago'a vayala humatege'ya Yopa kumateti Saimoni Pitana movale'ya eho.

⁶ Ani kanomo'a nago pulamakamo augafa laga huno talo nehia kanoene nemaiye. Ani kanomo'agia Saimoni'e. Noma'a hagelimo agegayalega hane.” huno hapaiye.

⁷⁻⁸ Ani kea hapaiteno ataleno vigeno Koniliasi'a tole ali'ya kanolatama'aene nagola Anumaya Koti kema nehavia ati kano'amo'enefefe ke hige'ya ageno ani ensole kanomo'ma eva'yi huno humainea kea hamapaiteno humatege'ya Yopa umainae.

Pita'a himona kana ya age-maine.

⁹ Katega mo-faete'ya kotige'ya heti'ya Yopa eva'yi hugahe hageno yagemo'a amu'no-ka'no higeno Pita'a nunamu hugahe nomona amega agotofulega haino maine.

10 Mainegeni tusi'a agateanagi kavela yaufa talo tala nehageno nagola himona kana yana age-maine.

11 Ageana ikamo'a aihagalo higeno nagola tusi'a kena kana yana aluga aluga atupale nofi aye-malete'ya atalageno mopafi enelavigeno age-maine.

12 Ageana ani yapina muki'a yaka kafa afua osifa'vea nama vayupala yagaene mainageno elavimaine.

13 Elavigeno Pita'a ne'agegeno nagola age aino mage huno hapaiye "Pitagae hetika ani memeyana heka no." huno hie.

14 Higeno Pita'a mage huno hapaiye "A'ao, Alanimogae ma ma yaga kafa kagai kaufina oni'ya'age humainege'na nagaluma humalenana yamofe tamage hu'na onenoa ya'yaga hane." huno humaine.

15 Higeno nago'ene agea aino mage huno humaine "Anumaya Koti'a ago alino sese humalenea yafena 'Oni'ya'agela ohunegi afa'a alika no.' huno humainea kavafena nago'ene 'Oni'ya'age humaineanagi'na onegahue.' huka ohuo."

16 Ani kavala tali'a (3) yupa huteno aupa'a ani kenamo'a ikapinaga eteno haimaine.

17 Haigeno Pita'a maineno anima agea himonamo aepa'ahe agha havige havige huno nehavige'ya Koniliasi'ma humatege'ya aya vaya'mo'ya Saimoni nofe hamavige hamavige hume hume u'ya ani nona agete'ya fiate meheti'ya mainae.

18 Heti'ya maine'ya ke hu'ya mage hu'ya hae "Saimoni'a nago agia Pita'e kanoa mani nopina

mainefi omaiye?” hu'ya hae.

¹⁹ Hageno Pita'a himonahe aghesa havige havige huno mainegenon Avamu'mo'a mage huno hapaiye “Havio tali'a (3) vaya'mo'ya kagaife megatine'ayae.

²⁰ Mekatine'ayagi hetika afepinaga lavika mogo. Nagaya humatoge'ya emainagi tole kagesa ohavika afa'a amakai'enena vuo.” huno humaine.

²¹ Higeno Pita'a tavino mage huno hamapaiye “Atimaayaya kanoa nagayae. Na'a higetama ne'ae?” huno hama-vige.

²² Hamavigege'ya mage hu'ya hae “Nago kanoa Koniliasi'e ati vayate kava kanogino fatago kano maineanagino 'Anumaya Kotina haiya kava hugahue.' huno humainea kanomo'a hulategeta ne'onageno ani kanomo'a Yuta vea omainea kano maineanagi Yuta vea'mo'ya 'Kanale kano maine.' hu'ya hageno nemaiyane. Nago yupa nagola alu aotage ensole kanomo'a eva'yi huno mage huno hapaiye 'Saimoni Pitafe ke hugeno kagai nopina eno nagola kea kahapaisigeka havigane.' huno higeno hulategeta ne'one” hu'ya hapai-mainae.

²³ Hageno Pita'a kenona'amia mage huno hie “Nopi ehaitama emaiho.” huno hige'ya hai'ya mo faete'ya kotigeno Pita'a hetino amakai'ene vige'ya nago'a Yopa kumateti Yisasife havi'ya amakupi malenaya vaya'mo'ya amakai'ene tokae'ya umainae.

Pita'a Koniliasi notega umaine.

²⁴ Katega nagoke no mo faete'ya ega Sisalia kumate eva'yi hageno Koniliasi'a esayafene huno amakava maineno agai'a nofi vaya'ene anaga'amo'yaenefe ke hige'ya melitalu hu'ya mainae.

²⁵ Mainageno Pita'a ani nopi hai-falegeno Koniliasi'a avate eno aiyafi ape humaineno muse hutene.

²⁶ Musena hutetegeni Pita'a ali hetiteteno mage huno hie “Hetio nagai'enena afa kano mainoe.” huno hie.

²⁷ Pita'a mani kea nehuno Koniliasi'ene kea kea hume nopinaga haino mogeana kasago'ya vea'ne melitalu hu'ya mainae.

²⁸⁻²⁹ Mainageno Pita'a mage huno hie tamakaitamia ago havimainae Yuta vea'mo'ya Isaleli vea omainaya vea'nene maine'ya kea kea huyafena ago nagalu humalenaya kea ago havimainae. Anumaya Koti'a nagaila navelino mage hie “Nago kanohena ‘Oni'ya'age kano mainane.’ huka ohuo.” huno navelige'na agete'na nagaifema ke hanage'na tole nagesa ohavi'na aup'a'a emainogi na'a hige'ka nagaifena kea hanage'na emainoe? huno havige.

³⁰ Havigegeni Koniliasi'a mage huno hapaiye “Tali'a (3) kana ago euno nagasege'na une kanalega tali (3) kiloki noni'afi maine'na Anumayamotega nunamu hu'na havinegogeni aup'a'a nago kanomona kena'amo'a efe'age nehuno alave alave nehigeni naule mehetige'na agoe.

³¹ Agogeni ani kanomo'a nagaifena mage

huno nahapaiye ‘Anumaya Koti'a haavigana kea ago haviteno kagayama afeno'amima omalenea veala hama'maeka amamite amamite hana yana ageteno kagaifena agesa nehavie.

³² Nehaviafe kagaya Saimoni Pitatega vayala humatesanage'ya Yopa visae. Ani kanomona hamo'amo'a Saimoni'e pulamakamo augafa taga huno talo nehia kanomo nona hageli agegayale hanegenyo yoka unemaiye.' huno humaine.

³³ Hige'na nagaya aupa'a kagaitega vayala alimataloge'ya vageka kanale'ya huka emainan-ageta Anumayamo'a ‘Hamapaiyo.’ huno'ma kahapai-mainea kea havigahune huta Anumaya Koti aulagafi melitalu humainone.” huno humaine.

Pita'a Koniliasi nopi Yisasi kea huhaleno humaine.

³⁴⁻³⁵ Pita'a hetino aepa heno mage huno hie “Tamage, havuana Anumaya Koti'a vaya'mo agi'ahepi nofi'ahepi agesa havino notamianagi muki'a nofi vaya'yagafitila nago'a vea'mo'ya Anumaya Kotina amaku'a amite'ya ‘Agaila haiya kavala kanale kava humainaya vea'mo'ya Anumaya Koti'a ani veafe nahaiya vea'ne mainae.’ huno hie.”

³⁶ Huteno Anumaya Koti'a Yisasi Kalaisina hutegenyo kanale kea huno Anumaya Koti'ene alino nagoke taipu falu huta maisuna kea Isaleli vea'mogatina tahapaiya kea havimainae. Ani Yisasi Kalaisi'a muki'a vea'mogatina Anumaya-timo maine.

37 Yoni'a "Kefo yatamihena tamaku'a aiyahae hisage'na tina falelamategahue." huno hama-paitegeno Yisasi'a Kaliliti aepa heno muki'a Yutia kotega kema humainea kavafena tamakaya ago havimainae.

38 Anumaya Kotina Alu Aotage Avamu'amo'ene tokiya'aene Nasaleti Yisasina amigeno Anumaya Koti'a agai'aene tokaeno maineafene huno alu kumate kumate ute ete hia'amo kanale kava huno Satani'ma amatafa hige'ya kalima ali-mainaya vea'mogamina alino kanale humatene.

39 Kanale humategeta tagaya muki'a Yuta vea'ma mainalegaene Yelusalemuene humainea kavala taulagafiti age-mainona ke tamahanepaune. Ani kava hige'ya yafaga yosale asaimalageno fali-maine.

40 Falianagi tole yupa maiteno nago kanalela Anumaya Koti'a fali-mainefiti alino hetitegeno vea'mogati taule mo laveli-maine.

41 Mo lavelianagi muki'a vea'mo'ya agaila o'agenagi tagaya vea'ma hamapaisunafene huno Anumaya Koti'a tagaila ago hapalilategeta mainonafe tagaya fali-mainefiti ali hetitenea kanafina Yisasi'ene tokaeta maineta ti'ene kave'ene ne-mainone.

42 Nemainonanagino Yisasi'a vea'mogamina mage hutama hamapaiho huno humaine "Nagaya fali-mainesaya vea'nene afa'a mainesaya vea'nene kaiyeke humatesuafene huno Anumaya Koti'a Yiasinia hunatege'na emainoe." hutama hamapaiho. huno humaine.

43 Yisasifena muki'a Anumaya Koti amaune

vaya'mo'ya mage hu'ya humainayane
 “Muki'a vea'mo'ya agaife havi'ya amakupi
 male'ya amametiti hisageno agai'a agileti kefo
 ya'amia aige'amateno alitalemategahie. hu'ya
 humainayane.” huno hie.

*Isaleli vea omainaya vea'mo'ya Alu Aotage
 Avamula ali-mainae.*

⁴⁴ Pita'a mani kea yaufa hamanepaigeno Alu
 Aotage Avamu'mo'a elavino muki'a mani kema
 mai'ya nehaviya vea'mogami amakupina efale-
 maine.

⁴⁵⁻⁴⁶ Amakupi efalege'ya amaku amakesafiti
 nohaviya kea alu ke alu kefiti Anumaya Koti agia
 alisaga nehae. Ani kava'ma haya yafe Pita'ene
 emainaya vea'mo'ya Yisasi kema havimainaya
 Isaleli vea'mo'ya havite'ya Anumaya Koti'a
 ago alu vea'mogamina Alu Aotage Avamu'ama
 amamia yafena tusi'a amama'yo aigeno Pita'a
 mage huno humaine.

⁴⁷ “Anumaya Koti'a tagaila Alu Aotage
 Avamu'ama taminea kava huno mani
 vea'nene ago amamine. Tima falematesuna
 kaana ta nagalua hulategahie? Tina afa'a
 falemategahune.” huno humaine.

⁴⁸ Huteno amakaife mage hie “Yisasi Kalaisi ag-
 ile tina falelamatesue.” huno hamapaiteno tina
 falematetege'ya mage hu'ya hapaiye “Tagai'ene
 nago'a kana tagaya maigane.” hu'ya humainae.

Pita'a Yelusalemu uno ali'yama'ahe hama-paimaine.

¹ Aposolo vaya'ene Yutia maine'ya Yisasife havi'ya amakupi malenaya vaya'ene nago'a Isaleli vaya omainaya vea'mo'ya Anumaya Koti kea havi'ya amakupi malenae hu'ya haya kea havimainae.

²⁻³ Havigeno Pita'a Yelusalemu haino maine'ya “Amakoya ano'ya'a taga hisaya yana tusi'a tokiya yane.” hu'ya haya Yuta vaya'mo'ya Pitafena “Kagaya havi kava nehane.” hu'ya mage hu'ya humainae “Na'a higeka amakoya ano'ya lagama ohunaya vaya'yagaenena kavela mo nenane.” hu'ya humainae.

⁴⁻⁵ Hageno Pita'a aepa heno muki'a yama falote'ma humainea yafena hufalote huno mage huno hie nagaya Yopa kumate maine'na nunamuna nehugeno nagu nagesamo'a aiyahae hig'e'na himonafi agoana nagola tusi'a kena kana yana aluga aluga atupale nofi aye-malete'ya atalageno nagaite mopafi elavige'na age-mainoe.

⁶ Agoana ani yapina muki'a yaga kafa afua osifa'vea nama vayupala yapavena anifi mainageno elavi-maine.

⁷ Elavige'na ne'agogeno nagola age aino mage huno nahapaiye “Pitagae hetika ani memeyana heka no.” huno hie.

⁸ Hige'na mage hu'na hue “A'ao, Alanimogae ma ma yaga kafa kagai kaufina oni'ya'age humainege'na nagaluma humalenana yamofe tamage hu'na onenoa ya'yaga hane.” hu'na hue.

⁹ Hugeno nago'ene agea aino mage huno humaine “Anumaya Koti'a ago alino sese humalenea yafena ‘Oni'ya'agela humaine.’ huka ohuka afa'a alika no.” huno humainea kavefena nago'ene “Oni'ya'age humaineanagi'na onegahue huka ohuo.”

¹⁰ Ani kavala tagufa (3) yupa huteno aupala ani kenamo'a ikapinaga eteno hai-maine.

¹¹ Haitege'ya ani kana kano'ale tagufa (3) vayala tagaya mainona note eva'yi humainae. Ani vaya'yaga Sisaliagati nagaitega humatege'ya emainae.

¹² Emainageno Alu Aotage Avamu'mo'a nagaifena mage huno hie “Tole kagesa ohavika amakai'ene tokaeka vuo.” huno hige'na uanagi manile mainaya sikisi'a (6) nafu'naga'ya nakai'ene umainae. Uteta ani kanomo note uva'yi huta noma'afi hai-mainone.

¹³⁻¹⁴ Haunageno agaya mage huno tahapaiye noni'afima ensole kanomo'ma heti-mainege'na agoana ensole kanomo'a mage huno nahapaiye “Kagaya menia nago'a vayala humatege'ya Yopa kumateti Saimoni Pitana movale'ya eho. Ani kanoma esiana kagai'ene muki'a anagakaene Yisasi'a taaugafa aligatisia kea tamahapaigahie.” huno hige'na havue huno tahapaiye.

¹⁵ Tahapaitage'na nagaya aepa he'na kea nehugeno Alu Aotage Avamu'mo'a hagoteno tagai'ma hulatenea kava huno elavino amakai amakupina fale-maine.

¹⁶ Nefalegeno nagesamo'a hao hige'na Anumayatimo'a humainea kele nagesa

havimainoe. Ani kea mage huno humaine “Yoni'a titafateti falemateneanagi haenaga'a Alu Aotage Avamuteti falelamatesigeno tamakupina faleno maigahie.” huno humaineane.

¹⁷ Tagayama Yisasi Kalaisife havita tagupi maleta tametiti humainona yupa Anumaya Koti'a Alu Aotage Avamula tamineanagino ani'a huno amakai'enena Alu Aotage Avamula amamianagi'na nagaya ta'na Anumaya Koti'ma ali'yama alia ali'yana tilesue? Nagaya maleli-otegahue huno hu-maine.

¹⁸ Hige'ya havite'ya kea ohu'ya maine'ya Anumaya Koti' agia alisaga nehu'ya mage hu'ya humainae “Tamage Anumaya Koti'a Isaleli vea omainaya vea'nenefe ‘Tamaipa aiyahae his-age'na agola maige maige hisaya tamahaimula tamamino.’ huno humaine.” hu'ya nehae.

Atioku kumate vea'mo'ya Yisasi ke havi'ya amakupi male'ya amametiti humainae.

¹⁹ Sitivenina hayageno falitege'ya Yisasife havi'ya amakupi malenaya vea'mogamina ali-haviya humatage'ya fale'ya alu kote kote ute ete humainae. Nago'a veala fale'ya Fonisia umaige'ya nago'a veala fale'ya Saipalusi umaige'ya nago'a veala fale'ya Atioku kumate umaine'ya Anumayamo kea Yuta vea'mogamike hamapai-mainagi alu vea'mogamina hamaopainae.

²⁰ Hamaopaiyanagi amakai amu'nopitila nago'a vayala Saipalusiti'ene Sailiniti'ene eu'ya Atioku maine'ya Kaliki vea'mogamina Yisasi'a

Anumayatimofena kanale kea mohamapai-mainae.

²¹ Hamanepaigeno Anumayamo'a tokiya'aleti amaya hige'ya kasago'ya vea'mo'ya amaku'a aiyahae hu'ya Anumayamo ke havi'ya amakupi male'ya amametitia humainae.

²² Amametitia hage'ya Yelusalemu maine'ya Yisasife havi'ya amakupi malenaya vea'mo'ya ani kea havite'ya Panapasina hutageno Atioku umaine.

²³ Anile umaineno ageana Anumaya Koti'a kayone humatea yana ageteno muse huno mage huno hamapaiye “Tamaku tamakesamo'a tokiya'age hinagetama efi efi hutama Anumayatimo'ene tokaetama vaiyatete hiho.” huno hamapaige hamapaige huno maine.

²⁴ Anima hamapaiya kanoa Panapasi'e. Ani kanoa kanale kanogino Yisasi kema havino agupi maleno ametiti higeno Alu Aotage Avamu'mo'a agupina hiya humainea kanogino Yisasifema hamanepaige'ya kasago'ya vea'mo'ya amaku'a Yisasina amitafa humainae.

²⁵ Amitafa hageno Panapasi'a Solofe atiyegahe Tasusi umaine.

²⁶ Uno atiyeno ali-falote huteno Atioku avaleno haige'ana nago kafua Yisasi anaga'ene mo lokae'ana maine'ana kasago'ya vea'mogamina Yisasi kea hamapai'age'ya Atioku mainaya vea'mo'ya hagote kanafi Yisasi anagafe “Kalisiteni vea'mogatamae.” hu'ya amakia malenae. Tagai kefitila ani amakimo'a Kalaisi akave malaya vea'mogatamae hu'ya humainae.

Panapasi'ene Solo'ene hunatage'ana Yelusalemu elavi-maina'e.

²⁷ Ani kanafina nago'a Anumaya Koti amaune vayala Yelusalemuti atale'ya Atiyoku hai-mainae.

²⁸ Haigeno amakai amu'nopitila nago kanomo agia Agapusi'e heti-mainegeno Alu Aotage Avamu'mo'a hapaigeno aune laga huno mage huno humaine “Tusi'a kafu hisaya kana muki'a mopale eva'yi hugahie.” huno humainea kemo'a ani kafuma efalote'ma hia kanafina Kolotiusi'a sauve kano maine.

²⁹⁻³⁰ Ani aunema Agapusi'a laga hia kea havite'ya Yisasife havi'ya amakupi malenaya vea'mo'ya mage hae “Yutia mainaya tafu-taganagamina amaya hisune. Muki'amogata moneti hanesimogata monea alitalu hisune.” hu'ya hute'ya alitalu hute'ya ani monea ali'ya Yisasi anaga'mogamite kava vaya'mogamina amamigahe Panapasigani Sologani hunatage'ana ani monea ali'ana umaina'e.

12

Heloti'a Yemesina haegeno faligeno Pitana nofi hutene.

¹ Ani kanafina Heloti'a ala sauve kanogino nago'a Yisasife havi'ya amakupi malenaya veala alino haviya humatene.

² Humateteno Yemesi'a Yonina nepu'amona aya'aya naepeleti age'ya fakaligeno fali-maine.

³ Falitegeno Heloti'a ageana ani'ama hia kavafena Yuta vea'mo'ya amaipa havi'ya kanale haya yafe Pitana haegahe atafa humaine. Hale

oki kaihame maya imu kiya kanafi ani kavala humaine.

⁴ Heloti'a Pitana atafa huno kina huteteno sik-
isitini'a (16) ati vayamogamifena mage huno hu-
maine “Fo'a (4) maite maite hutama tokiya'age
hutama yagaiho.” huno humaine. Ala imua
Anumaya Koti'ma amakinagomo amaugafama
aligati-mainea yafe amakesa hao hisaya imu kite-
sageno vaya amaufi avaleno kaiyekea huteteno
haegahe humaine.

⁵ Pita'a kina nopi mainege'ya Yisasife havi'ya
amakupi malenaya vea'mo'ya tusiya hu'ya Anu-
maya Koti'ma aya hisiafene hu'ya nunamupitila
havigemainae.

*Nago ensole kanomo'a eno kina nopiti Pitana
avalegeno umaine.*

⁶ Havinegageno Heloti'a “Ega avale'na
kaiyekea hutegahue.” huno nehigeno ani kegela
Pitana tole ati kanolatamogani amu'nopi tole
seni nofiteti aluga aluga ayatalapi ayete'ya tole
ati kanolatamogani anayapi'ene aye-maletageno
faeno mainege'ya nago'a ati vaya'mo'ya heti'ya
ani kina nomo fiate yagai'ya mainae.

⁷ Yagai-mainageno nagola Anumayamo en-
sole kanomo'a eva'yi higeno ani kina nomo
agupinaga tusiya huno aivasa higeno ani en-
sole kanomo'a Pitana haopale ka'yo ne'aino ali-
gafa nehuno mage huno hapaiye “Aupa'a hetio.”
huno higeno hetigeno ayapiti seni nofi'mo'a
atu'maelavi-maine.

⁸ Atu'mae-lavigeno ani ensole kanomo'a mage huno hapaiye “Kenaka'a nefaika kaiya no'ene vaiyo.” huno higeno Pita'a ani'a hutegenno mage huno hapaiye “Siotaka ne'vaika nakave eno.” huno hie.

⁹ Higeno ani kina nopitila Pita'a hati-lavino akave ne'uno tole agesa haviteno aneginagi huno mage hie “Ensole kanomo'ma hia kavala himona ne'agofi afa'a falotega ne'agoe?” huno humaine.

¹⁰ Anakaya va'ana hagoteno'ma yagai-mainea ati kanoa agase'ana u'ana nago ati kanomona mogase'ana u'ana ala kumate'ma ne'vaya fi-ate uva'yi ha'ana tokiya'age aenileti talo humalenaya fitagino kitalako humalenaya fitamo'a agai'a aiyaki-lavige'ana nago nona agase'ana osi kate va'afiti ensole kanomo'a motaleno fanane humaine.

¹¹ Fanane higeno Pitana agu agesamo'a aikalo higeno mage huno hie “Menia nagaya havilama hu'na nehavue Anumayamo'a agai'a ensole kano'a hutegenno Heloti ayapitila melinatale. Yuta vaya'mo'ya nagaila nago'a kava hunategahe amakesa havi havi haya yapitilagi naugafa meligatie.” huno humaine.

¹² Ani agesa havime havime Malia notega umaine. Ani Malia'a Yoni Makina ita'amo'e. Ani nopi muki'a veala melitalu hu'ya Anumayamotega havinege'ya mainae.

¹³ Mainageno Pita'a kumategati ani nomo fitale mekalu kalu nehuno ke higeno nagola ali'ya muna'mona agia Lota'e yakigahe emaine.

¹⁴ Emaineno haviana Pitana alenaga agele

haviteno aipamo¹a havino muse huteno ani fita o²yakino ataleno aiyayeno nopinaga haino mage huno vea³mogamina hamapaiye “Pita⁴a ago fiate me heti-maine.” huno hie.

¹⁵ Hige¹ya “Aifo²nafo ke nehane.” hu³ya hageno “A⁴ao, tamage nehue.” huno hige¹ya “Agaya omaigi ensole kano²a emainegi mogeho.” hu³ya humainae.

¹⁶ Nehageno Pita¹a fitale akalu kalu maino huge huge nehige¹ya fita yaki²ya agayana hige¹ya agete²ya tusiya hu³ya atali talua humainae.

¹⁷ Amama¹yoa ne²aigeno Pita¹a “Kea ohutama maiho.” huno hamapaisia yafe ayateti aigo-sigosi huteno Anumayamo¹ma nofi nopiti avaleno emainea yafena hamapaiteno mage huno hamapaiye “Ani kea Yemesi¹ene nago²a tafu-taganagamina hamapaiho.” huno hamapaiteno hati-lavino alu¹alega umaine.

¹⁸ Utegeno kola otinegeno yagea va¹yima nehiana ati vaya¹mo²ya atali talu hute¹ya “Pita¹a hana²a huno hanate tataleno vie?” hu³ya ala ke nehu¹ya amama¹yoa tusiya huno aimaine.

¹⁹ Heloti¹a haviteno “Pitafe atiyeho.” huno hige¹ya ati ayayana ali falote ohageno ati vaya¹mogamina kaiyeke hune¹amateno “Hamaege¹ya faliho.” huno humaine. Huteno Yutiati tavino Sisalia mo maine.

Heloti¹a ago falimaine.

²⁰ Heloti¹a kava yagai-mainea mopafiti kave¹amia ne²aliya yafe Heloti¹a Taiya nemaiya vea¹nene Saitoni vea¹nene tusiya huno aipa

haviya humatege'ya nago amaku amakesa havite'ya alitalu hu'ya Helotina hagote ali'ya kano'amote Palasatusite mage hu'ya me hae “Falu huta maisuna yafe kagaya Helotina hapaiyo.” hu'ya hageno agaya nago aipa ani vea'nene huteno Helotite emainae.

²¹ Ageno Heloti'a nago kana'a amamiteno ani yupa sauve konagali kena'a faiteno sauve kanomo siale maineno aya'aya ke hamapaiye.

²² Hamanepaige'ya melitalu humainaya vea'mo'ya mage hu'ya nehae “Mopale kanomo hia augafa kea nohanagi Anumaya Koti'a kema nehia kava huka nehane.” hu'ya humainae.

²³ Nehageno “Havige nehae.” huno ohuno Anumaya Koti agima alisaga ohia yateti aupa'a Anumayamo ensole kanomo'a me aikolino kalia amigeno hagifa'yagamo'ya aipa laga hageno fali-mainae.

²⁴ Falitegeno Anumaya Koti kemo'a tokiya'age huteno muki'a kumate ute ete humainege'ya kasago'ya vea'mo'ya havite'ya Yisasina amaku'a amitafa humainae.

²⁵ Panapasi'ene Solo'ene ani monea Yelusalemu kumate ali'ana momamite'ana Yoni Makina avale'ana Yelusalemuti Atioku kumate emaina'e.

13

Panapasi'ene Solo'ene Anumayamo ali'ya alisa'a yafe huyogi'ya hunatage'ana vaiye-maina'e.

¹ Ani Atiokua Yisasi anagapiti nago'a maine'ya amaune laga hu'ya Yisasi ke hamanepaiya vayala

mainae. Ani vaya¹mogami amakia Panapasi¹ene Simioni¹e kanomona nago agia Naisa¹e. Tagai kefina ani agimo¹a “Anupa kano¹e.” hu¹ya ne¹aya agie. Ani kanoene Lusiasi¹a Sailini kanoene Solo¹enena Manaini¹e. Ani kanoa Heloti¹a Kalili kava kanomona afalu¹amo¹e.

²Nago yupa Yisasi anaga¹mo¹ya kavela mosi¹ya maine¹ya Anumayamo agia alisaga nehu¹ya muse hu¹ya havinegae. Havinegageno Alu Aotage Avamu¹mo¹a amakaifena mage huno humaine “Panapasigani Sologania anahaote ali¹yate hunateho. Nagaya nago ali¹yate ago hunatenoe.” huno humaine.

³Hige¹ya kave mosi¹ya maine¹ya Anumayamotega havinege¹ya ananute amaya male¹ya hunatage¹ana umaina¹e.

Panapasigani Sologania Saipalusi kumate umaina¹e.

⁴Alu Aotage Avamu¹mo¹a hunatege¹ana Selusia tavi¹ana tipi kalefi haisaga humai¹ana Saipalusi kotega umaina¹e.

⁵Salamisi va¹yi hu¹ana Yuta vaya¹mogami mono nopi hai¹ana Anumaya Koti kea hamapai-maina¹e. Anakai¹ene Yoni Maki¹a monaya humaine.

⁶Ani Saipalusia ti amulagoyafi hanea kuma¹yagale ute ete hu¹ya Pafosi eva¹yi humainae. Ani kumatela nago Yuta kanomo¹a havige huno “Anumaya Koti aune kano mainoe.” huno nehia kanomo agia Payisasi¹e nehaya kanoa maine. Ani kanomo¹a tokiya¹age

kava'yaga talo huno vea'nea ayemavataga nehiane.

⁷ Ani kanomo'a muki'a kanafina kava kanomo agia Sesiusi Polusi'ene nemaiyane. Sesiusi Polusi'a kanale agu agesaene kanogino Anumaya Koti ke havigahe Panapasigani Sologanife ke hige'ana e'ana hapai-maina'e.

⁸ Hapai'ageno ani havige'age aune kanoma Payisasi'a tokiya'age kava'ma nehia kanomona nago agia Kaliki kefiti Elimasi'e mage huno nehie “Mani kea havika kagupi omalo.” huno hefalaki-maina.

⁹⁻¹⁰ Hefalakeanagi Solo'a nago agia Polo'e agai'a agupina Alu Aotage Avamu'mo'a hiya higeno Elimasina aulagafi age-maineno mage huno hapaiye “Kagaya Satani nafa'nemogae fatago humainea yamona kame kano'a mainane. Savale savala ke'age kano mainananagino kagai kagupina havi ke'age yamo'a hiya humaine. Na'ama hana kanomoga Anumaya Koti kamo'a fatago humainea kama haneanagi kagaya 'Kayag-imainea ka hanegi o'viho.' huka hamanepaine. Na yu ani havi kavaka'a atalegane?

¹¹ O'atalenana anona'a menia havio Anumayamona tokiya'age ayatetila kahaesigeno kaulagamo'a osi kanagano'a asu hisigeka yagea o'agegane.” huno nehigeno aupa'a aulagamo'a anile asu higeno ayate ali'ya kama avelisaya kanohe atiye-maina.

¹² Kava kanomo'a Sesiiasi Polasi'a na'ama hia kavala ageteno Yisasife hia kene tokiya'aenefe ageteno tusi'a ama'yo aigeno ani kea alino

agu'afi maleno ametiti humaine.

Nagola Pisitia kotega hanea kumala Atioku kumate u'ana Yisasi kea hamapai-maina'e.

¹³ Polo'enema va'la kanolatana Pafosi kumala atale'ya tipi kalefi haisaga humai'ya nagola Pamafilia hanea kumala Pega kumate eva'yi hute'ya Yoni Maki'la ne'anataleno Yelusalemu eteno lavi-maina'e.

¹⁴ Lavige'ana anakaya Pega kumala atale'ana nago Pisitia kotega kuma'mo agia Atioku kumate eva'yi hu'ana Sapati yupa Yuta vaya'mogami mono nopi hai'ana mopale maina'e.

¹⁵ Mopale maina'age'ya ani mono note soka vaya'mo'ya Mosese kae-malenea kene Anumaya Koti amaune vaya'mo'yama kae-malenaya kene hapalite'ya nago kanoa hutageno uno ani kanolatafe mage huno humaine “Nelafugatana tagu'amo'ma tokiya vaisia kea tanaku'afima hanesigetannahena huhale'ageta havimano.” huno humaine.

¹⁶ Higeno Polo'a hetino ayana alisaga huno ke ohutama maiho huno amaveliteno mage huno humaine 'Isaleli vaya'mogatamaene nago'la Isaleli omainaya vayala Anumaya Kotina haiya kava haya vaya'mogatamaene haviho.

¹⁷ Isaleli vea'mogamina Anumaya Koti'amimo'a taginagomogamife agai'la vea'ne maisayafene huno hapalimatege'ya Isipi kotega yokala umaiyana Anumaya Koti'la amaya hige'ya tokiya'age vea'ne aitagufe'ya kasago hageno

agai'a tokiya'aleti Isipi kotegatila amavalege'ya atale'ya umainae.

¹⁸ Amavaleno vige'ya foti'a (40) kafu amakai'ene ka'me kotega umaineno veganokano kava'ma haya kava'amihe mailama huno maineno yagaino maine.

¹⁹ Anumaya Koti'a seveni'a (7) nofi vea'mo'ya Kenani nemaiya vea'mogamina hamae ha'no hige'ya faligeno amakai mopa Isaleli vea'mo'ya maisaya yafene huno alino amamine.

²⁰ Amamige'ya fo hataleti fifiti'a (450) kafu ani kumatela mainageno anile Anumaya Koti'a kasago'ya uhagotematesaya vayala amamige'ya amakaya maima maima nehaigeno haenaga'a nagola Anumaya Kotina aune kano'a Samueli'a eva'yi humaineane.

²¹ Eva'yi hige'ya “Ala sauve kanotia lamio.” hu'ya hageno Anumaya Koti'a Solona amamine. Ani kanomona nefa agia Kisi'e. Penisamini nofi kano maineanagino Solo'a foti'a (40) kafu kava yagaimateneane.

²² Kava yagaimateno maineanagino Anumaya Koti'a ne'ataleno Tevitina hutegeno ala sauve kano'amia maineane. Anumaya Koti'a Tevitifena mage huno humaineane

“Yesi nafa'nea Tevitifena nagai'ene nagoke ta'agu ta'agesa haneanagino Teviti'a muki'a nagai'ma nahaiya kavala hugahie.” huno humaineane.

²³ Anumaya Koti'a nayona hulokiya vaino mage huno humaine “Tevitina aginagomopiti tamau-

gafa aligatisia kanoa falote hugahie.” huno humaineanagino ani kanoa Yisasi¹e taugafa aligatisia kano emaine.

²⁴ Yisasi¹a falote ohunea kanafina Yoni¹a Isaleli vea¹mogamina “Kefo yatamihe tamaku¹a aiyahae hutama tina faleho.” huno hamapai-mainie.

²⁵ Yoni¹a ali¹yama¹a alino avaya ayegahe nehuno mage huno humaine “Tamakaya nagaifena ‘Anumaya Koti¹a taugafa aligatigahe hutenea kano emaine.’ hutama nehayanagi nagaya ani kanoa omainogi ani kanoa aupa¹a egahianagi¹na nagaya afa kanogi¹na agai aiyale ayesuana onategahie.” huno humaine.

²⁶ Nafu-naganagatama Apalahamupiti anaga¹mogatamaene nago¹a Isaleli omainaya vayala Anumaya Kotina haiya kava haya vaya¹mogatamaene Anumaya Koti¹a tamaugafa aligatigahe humainea kea muki¹amogatile eva¹yi humaine.

²⁷ Yelusalemu mainaya vea¹mo¹ya kava vaya¹amiene Yisasina agelama ohunae. Muki¹a sapati kanafina amaune vaya¹mo¹ya Yisasina kaiyeke hutete¹ya haesaya yafema kae-malenaya kea hapaliyanagi aepa¹a havilama hu¹ya ohavinae. Yisasina kaiyekema hutenaya yafe humainaya kemo¹a ago falote huno tamage humaine.

²⁸ Kaiyekea hutete¹ya haesageno falisia augafa kefo kavala ohuneanagi Pailatife “Afa¹a haegenofalino.” hu¹ya humainae.

²⁹ Muki¹a amaune vaya¹mo¹ya agaifema humalenaya kemo¹a falote huno ago tamage hige¹ya

yafaga yosaleti augafa'a ali'ya yafakapi mo-hevaitenae.

³⁰ Mo hevaitayanagi Anumaya Koti'a fali-mainefiti alino hetitene.

³¹ Hetitegeno Yisasi'a agai'aenema Kaliliti Yelusalemu hai-mainaya anaga'amo'ya amaulagafiti kasago'ya yupa eva'yi hige'ya age-mainayanagi'ya menia agaifena muki'a Yuta vea'mogamina hamanepaiye.

³² Hamapai-mainaya yafe tagayaene Anumaya Koti'a tamakinago-mogamina hulokiya vaino hamapai-mainea kemona kanale ke tamakaila tamahapaigahe emainone.

³³ Ani kemo'a falote huno tamagama hisiafene huno Anumaya Koti'a tagaila amakinagomogati taulagafi Yisasina ago alino hetitene. Mani kea Yagame Avopi tu (2) molia sapta mage hu'ya kae-malena

“Kagaya menia nafa'ne'nimoga mainane. Meni kano'a nagaya Negafa'na mainoe.” huno kae-maleneane.

³⁴ Yisasi'a fali-mainefiti ago ali hetiteneafe eteno falino komufinaga mo okasalisiafene huno nayona Anumaya Koti'a mage huno humaineane

“Tevitina ‘Ha'no ohu manua kanale manu kami-gahue.’ hu'na humainoa manua tamakaila tamamigahue” huno humaineane.

³⁵ Ani yafe nago kemo'a nago auta'mafina mage huno hu-maineane

“Kagaya kanale'ya huka huyogi-malenana ali'ya kanokamona Anumayamoga atalesanageno augafamo'a komufinaga okasaligahie.” huno humaineane.

36-37 Mani kea Tevitifena ohune. Teviti¹a ma mopale mainea kanafina Anumaya Kotina haiya kava humaineanagino falige¹ya toto¹amogami hevaimatenaya matimatipi augafamo¹a kasali-maineanagi Anumaya Koti¹a Yisasina fali-mainefiti ali hetitenea kanomo augafamo¹a okasaline.

38 Ani yafe nafu¹naganagatama havilama hutama haviho ani kanomo¹ma hulatenea kavafe Anumaya Koti¹a kefo yatamia aigetamateno atalelamatene huta tamahanepaune.

39 Mosese¹ma kahegi malenea kemona akave malesunageno Anumaya Koti¹a kefo yatia aigetateno atalelategahie hutama tamametiti hisayana aigetamateno ataleotamategahigi Yisasife havitama tamakupi maletama tamametiti hisageno Yisasi¹ma fali-mainea yateti Anumaya Koti¹a muki¹a kefo yatamia aigetamateno atalelamategahie.

40-41 Amaune vaya¹mo¹ya mage hu¹ya kae-malena

“Tamakaya kamuge hatagetama vaine¹amataya vea¹mogatama tamakaya mainaya kanafina nagaya Anumaya Koti¹na tusiya hu¹na tokiya¹age avame yana hugahue. Ani yafe vea¹mo¹ya tamahapaisagetama ‘Tamage nehae.’ hutama ohugahae ani yafe tamama¹yoa ainagetama faligahae.” hu¹ya kae-malenayane. Mani amaune vaya¹ma kae-malenaya kea tamakaite eva¹yi hugahigi ka¹ye ho. huno humaine.

42 Polo¹a mani kea huteno Panapasi¹ene hati-

lavi'ana ugahe neha'age'ya alitalu humainaya vea'mo'ya mage hae “Nago Sapati yupa ani monola nago'ene me lahapai'o.” hu'ya humainae.

⁴³ Nehu'ya monola ha'no hige'ya hati-lavi'ya muki'a Yuta vaya'ene Anumaya Koti kema nehaviya anagala Yuta vea omainaya vea'nene Pologani Panapasigania anakave ne'vage'ana mage hu'ana hamapai'e “Tokiya'age hutama Anumaya Koti'a kayone hulamatesia yama tamaminea yapi maiho.” hu'ana humaina'e.

⁴⁴ Nago Sapati yupa muki'a ani kumate vea'mo'ya Anumayamo ke havigahe melitalu humainae.

⁴⁵ Melitalu hu'ya mainage'ya Yuta vaya'mo'ya agete'ya amaipamo'a haviya hige'ya Polo'ma hia kehena “Havige nehie.” hu'ya hu-haviya hute-nae.

⁴⁶ Hu-haviya hunatayanagi Pologani Panapasigania tokiya'age kea mage hu'ana ha'e “Tamakaya Yuta vea'mogatamina hagoteta'a Anumaya Koti kea tamahapaigahe hu'anagi mani kemona tamakave'no hutetama 'Agola maige maige hisuna tahaimu alisuna yafena notahaiyanagita o'aligahune.’ hutama haya yafe tamakaila tamataleta'a Isaleli vea omainaya vea'mogamina mo-hama-paigahu'e.

⁴⁷ Na'a hisu'afene huno Anumayamo'a mage huno lahapai-mainae

'Isaleli vea omainaya vea'mogamina
aye-halimatesayafene hu'na ago
hulamateno. Muki'a mopaene mopaene

mainaya vea'mogamina amaku amamena
aligatisuafene hutama hamapaigahae.'
huno humaineane." hu'ana humaina'e.

⁴⁸ Neha'age'ya Isaleli vea omainaya vea'mo'ya
mani kea havite'ya tusi'a muse hu'ya
Anumayamo kea alisaga humainae. Na'a
nehu'ya Anumaya Kotina haigeno'ma "Agola
maige maige hisaya tamahaimula aligahae."
huno hapali-malenea vea'mo'ya mani kea
havite'ya ali'ya amakupi male'ya amametiti
humainae.

⁴⁹ Amametiti hageno Anumayamo kemo'a
muki'a kotega ute ete humaine.

⁵⁰ Ute ete humaineanagi Yuta vaya'mo'ya ala
amakima hanea a'neyaga mono kema nehaviya
a'neyagamogami amaipaene kava vaya'mogami
amaipaene hu'ya ali hetige'ya aepa he'ya Polo-
gani Panapasiganina ali haviya-hunatete'ya ani
kumategati ananati-talena.

⁵¹ Ananati-talage'ana anakaya "Mani kavala
havi kava nehae." hu'ana ani kumapiti kugukege
yana anaiyafitila aifopo hune'atalete'ana Aikoni-
amu umaina'e.

⁵² Va'anagi Yisasi kema havi'ya amakupi male-
naya vea'mo'ya tusi'a muse hageno Alu Aotage
Avamu'mo'a amakupina hiya humaine.

14

*Pologani Panapasigania Aikoniamu u'ana
Yisasi mono kea hamapai-maina'e.*

¹ Pologani Panapasigania Aikoniamu elavi-
va'yi hu'ana Yuta vea'mogami mono nopi

hai'ana kanale mono ke hamapai'age'ya kasago'ya Yuta vea'mo'yaene Kaliki vea'mo'yaene havi'ya amakupi male'ya amametiti humainae.

² Na'a ha'anagi nago'a Yuta vea'mo'ya “Yisasi kelefena tametiti ohugahune.” hu'ya nehaya Yuta vea'mo'ya havige hu'ya Isaleli vea omainaya vea'mogamina Yisasi anagafe “Kefo kava nehae.” hu'ya hu-atile-male hu'ya amaipa kafa hematenae.

³ Na'a hayanagi Pologani Panapasigania aya'aya kana anile maine'ana tokiya'age hu'ana Anumayamo kea huhala'ageno Anumayamo'a anaya huno agai'a kayone humatesia kea havisayafene huno tokiya'a anamige'ana tokiya'age avame ya'yaga humaina'e.

⁴ Ani kava ha'age'ya ani kumate vea'mo'ya tolefi ali'ya fako hu'ya nago'a vea'mo'ya mage hae “Yuta vaya'mo'ya tamage nehae.” hu'ya hayanagi nago'a vea'mo'ya mage hae “A'ao, Aposolo vaya'mo'ya tamagea nehae.” hu'ya humainae.

⁵ Hute'ya Yuta vaya'ene Isaleli vea omainaya vaya'ene kava vaya'amiene mage hae “Pologani Panapasiganina ali haviya hunateteta yafa ka'yoteti hanaesunage'ana faliga'e.” hu'ya humainae.

⁶⁻⁷ Hage'ana mani kea havite'ana fale'ana Likonia kotega hanea kumatalate Lisitala kumate'ene Tepe kumate'ene u'ana anilega hanea kuma'yagalega umaine'ana Yisasifena kanale mono kea hamapai-maina'e.

8 Lisitala kumatela nago kanoa maine. Ani kanoa atenelegati aiya avayu humai kanoa vaiyatete nohia kanoa anile mopale maine.

9-10 Mopale maineno Polo¹ma hia kea maino ne-navigeno Polo¹a aulu heno ageana ani kanomo¹a Yisasifema havino agupi maleno ametiti hia tokiya¹a hanegeni Polo¹a agupinaga havia kea ago haviteno ala kegefafiti mage huno hie “Kaiya ayepi huka hetika maiyo.” huno higeno aupa¹a halelako humaino hetino ute ete humaine.

11 Ute ete hige¹ya alitalu humainaya vea¹mo¹ya Polo¹ma hutea kavala agete¹ya ala kefiti ailalupe¹ya Likonia vea¹mogami kefiti mage hu¹ya hae “Tagai anumayatia vaya kana hu¹ya tagaitela elavi-mainae.” hu¹ya humainae.

12 Nehu¹ya Panapasife “Nago anumayati maine. Agia Susi maine.” hu¹ya nehu¹ya Polo¹a kasago¹ya kema hia yafe “Nago anumayati maine. Agia Hemesi emaine.” hu¹ya humainae.

13 Susi agima alisaga nehaya nona ani kuma¹mo agegayalega hanegeni ani note kava kanomo¹a ve pulumakaene ta¹mu vailinea ause¹aene ani kuma¹mo hi¹onale alino muki¹a vea¹nene ani tole kanomofe pulamaka he¹ya kae-salamana hunategahe humainae.

14-15 Hunategahe nehage¹ana Aposolo kanolatamogania Pologani Panapasigania mani kea havite¹ana “Havi kava hugahe nehae.” hu¹ana kena¹ania ali hatata hutale¹ana anima alitalu humainaya vea¹mogami amu¹nopi anaiyaye¹ana va¹a¹yamogani ala kefiti mage ha¹e “Nela¹afugatamae na¹a higetama mani kavala

nehae? Ta'agaya vayatafa maino'agi tamakai kana huta'a mopale vaya maino'e. Kanale mono kea tamahapaigahe ta'agaya emaino'e. Afa kava hutama haimula omale mani'mo agi alisaga nehagi ani kavala ne'ataletama tamaku'a aiyahae hutama Anumaya Kotina tamaku'a amitafa hiho. Ani Anumaya Koti'a ofalisia kano maine. Ika'ene mopaene hageli'ene talo humalene. Muki'a ani lipi mainaya kafayagaene ikatega mainaya namaene mopale mainaya afuene vea'nene talo humaleneane.

¹⁶ Nayo kanafina alu nofi alu nofi vea'nemo'ya amakai'ami hamaiya kate vaiyatete mai'ya hageno Anumaya Koti'a kahegi o'amatene

¹⁷ Kahegi o'amateneanagi 'Nagaya ma mainoe.' huno amaveligahe huno kanale kavala humateno ikapinagatila kola lamamino hoyafina kanale kavela lamamino tamaku tamamemo'a muse hisia yana male hiya hulamatene." hu'ana neha'e.

¹⁸ Mani kea ha'anagi ani vea'mo'ya anakaila afu he'ya kae-salamana henategahe nehage'ana "A'ao." hu'ana tokiya'age ke ha'a yafe atalena.

¹⁹ Nago'a Yuta vaya'mo'ya Atiokuti'ene Aikoniamuti'ene anile eva'yi hu'ya alitalu humainaya vaya'mogami amaipamona hu'ya ali hetimatage'ya yafa ka'yoteti Polona haete'ya agayana hige'ya "Ago fali-maine." hu'ya amakesa havite'ya kuma'mona malaga avayu hu'ya mo talena.

²⁰ Mo talayanagi Yisasife haviya amakupi malenaya vaya'mo'ya aya'amo'ya me maigag-

itageno anileti hetino kumatega mo faeteno kotigeno Panapasi'ene Tepe kumala ne'atale'ana umaina'e.

²¹⁻²² Va'a'yamogani ani kumate vaya'mogamina Yisasi mono kea hama-pai'age'ya kasago'ya vea'mo'ya Yisasife havi'ya amakupi male'ya amametiti hage'ana ete'ana Lisitala kumate haite'ana Aikoniamu hai'ana Atioku kumate eva'ana anile maine'ya Yisasife havi'ya amakupi male'ya amametiti humainaya vea'mogami amaku amamema ali lokiya vaisaya kea mage hu'ana hamapai'e "Tokiya'age hutama tamaku'a Yisasina amitafa haya yana muki'a kanafina ani kateke'ya vaiyatete hiho. Anumaya Kotife 'Kava yagailato.' hu'ya nehaya vea'mo'ya ma mopale mainageno kana ya'yagamo'a amaugafale falote hisianagi haenaga'a kanale kumatela ugahae." hu'ana hamapai'e.

²³ Alu mono note alu mono note ute ete hu'ana kave mosi'ya Anumayamotega havige'ya Yisasina amaku'ama aminaya vayapiti kava yagaisaya soka vayala hapali'ana "Kagayae kagayae." hu'ana humatete'ana mage ha'e "Tamaku'ama amitafa haya Anumayamo ayapi tamaya hisia yafe nelamato'e." humatete'ana amatete'ana umaina'e.

Polo'ene Panapasi'ene ete'ana Silia kotega hanea kumala Atioku kumate elavi-maina'e.

²⁴ Elavi'ana Pisitia kola mogase'ana nago Pamafilia hanea kumala Pega kumate eva'yi humaina'e.

25 Pega kumate vea'mogamina Yisasi mono kea hamapaite'ana anileti ne'amatale'ana Atalia kumate tavi-maina'e.

26 Anileti tipi kalefi haisaga humai'ageno anavaleno vige'ana Atioku kumate ete'ana hai-maina'e. Nayona ani kumate maine'ya Yisasina amaku'a aminaya vea'mo'ya “Anumaya Koti'a tanaya hisigetana agai kea mohamapai'o.” hu'ya hunatenaya kumatelagi'ana ani ali'yana ali-vayayete'ana ete'ana umaina'e.

27 Ago eva'yi hu'ana Yisasi anagafe “Melitalu hiho.” ha'age'ya age'ana Anumaya Koti'a anakai'ene tokaeno mainege'ana muki'ama humaina'a kavafena hamapaite'ana Isaleli omainaya vea'nene Yisasife havi'ya amakupi male'ya amametiti haya yafe Anumaya Koti'a fita ago yakimatene hu'ana hamapai'e.

28 Ani Atioku kumatela Yisasi kema nehaviya vea'nenena aya'aya kanagefa anilega maina'e.

15

Kasago'ya vea'mo'ya Yisasina amaku'a aminaya vea'mo'ya Yelusalemu melitalu humainae.

1 Polo'ene Panapasi'ene Atioku kumate Yisasi anaga'ene maina'age'ya nago'a vaya'mo'ya Yutiati elavi'ya mage hu'ya hamapaiye “Mosese'ma ‘Tamakoya ano'ya taga hiho.’ huno humainea kea akave omalesayana Anumaya Koti'a tamaku tamamena aliokatigahie.” hu'ya humainae.

2 Hage'ana Polo'ene Panapasi'ene “A'ao, tamakaya havige nehae.” hu'ana amakai'ene

tusi'a ke vaite'ya ani kema fatago hisaya yafe Polo'ene Panapasi'ene nago'a vaya'ene mo hamavigegahe Aposolo vayategaene mono note kava vayategaene humatage'ya Yelusalemu haimainae.

³ Yisasi anaga'mo'ya humatage'ya katega vayana Fonisia kotegaene Samelia kotegaene alu kumate kumate ute ete hu'ya Isaleli vea'ne omainaya vea'mo'ya amaku'a aiyahae hu'ya Yisasina amaku'a aminaya kea amafu'amakanagamina hamapaige'ya havite'ya tusi'a muse humainae.

⁴ Muse hage'ya Yelusalemu uva'yi hage'ya alitaluma humainaya Yisasi anaga'mo'yaene Aposolo vaya'ene soka vaya'yagaene falu fala humatage'ya muki'a Anumaya Koti'a anakai'ene tokaeno humainea kavafena hamapai-maina'e.

⁵ Hamapai'age'ya nago'a Falasia vayala Yisasina amaku'a aminaya vaya'mo'ya mage hu'ya humainae “Isaleli vea'ne omainaya vea'mo'ya Yisasina amaku'ama aminesayana ani'a hutama amakoya ano'ya taga hiho. Mosese kahegi kemo akave maleho huta kahegi malesune.” hu'ya humainae.

⁶ Hage'ya ani kema humainaya ke fako hugahe Aposolo vaya'ene soka vaya'mo'yaene melitalu humainae.

⁷ Melitalu humalet'e'ya kasago'ya ke-yeso mai'ya hutageno Pita'a hetino mage huno humaine nafu'naganagatama tamakaya havimainae nayona Anumaya Koti'a tamakaipiti nagaifena “Kagayae.” huno “Isaleli vea'ne

omainaya vea'mogamina Yisasi kanale mono kea hamapaisanage'ya havite'ya ali'ya amakupi male'ya amametiti hugahae.” huno humaineane.

⁸ Anumaya Koti'a tagu'afina ago agelama huno agemainea kanogino ageana “Ani vea'mo'ya amaku'a ago namitafa hageno tagai'ma Alu Aotage Avamu'mo'ma taminea kava huno ani veala amamine.

⁹ Nago'ke avamete huno Alu Aotage Avamula amamine. Yisasifenema hu'ya havi'ya amakupi malenayafene huno amakupima hanea kefo ya'amia ago aye ha'mi-talene.

¹⁰ Ago aye ha'mi-talenegi na'a higetama Anumaya Koti'ma humainea kavafena ‘Afa ya kana yane.’ hutama tusi'a kana'age yana alitama Yisasina amaku'a aminaya veatela malegahe nehae. Nayona taginagomo'ya Mosese'ma taminea kea akavela omalenayane tagayaenena menia akave malesuna tagamula omalene.

¹¹ Omaleneanagi ‘Anumayatimo'a Yisasi ali kayone hulateno kefo yatihe huno faliteno tagu tamena aligatimaine.’ huta tametiti nehunanagi ani yateti Isaleli vea'ne omainaya vea'mogami amaku amamena ago aligatimaine.” huno humaine.

¹² Pita'a mani kea hianagi muki'ama alitalu humainaya vaya'mo'ya nago ke kano'a ohunae. Ohage'ana Panapasi'ene Polo'ene Isaleli vea'ne omainaya vea'mogami amu'nopi Anumaya Koti'ma anakai anayapima tokiya'age avame yama humainea yafena hamapai'a'age'ya havimainae.

13 Nehavigeno Yemesi'a hetino mage huno homaine "Nafu'naganagatama nagai kea haviho.

14-15 Anumaya Koti'a ehe kanafima Isaleli vea'ne omainaya veala amaya hugahe via'yamo ani veapitila agai'a vea'ne maisaya yafene huno amavale-maine. Saimoni Pita'a ago tahapaigeta havimainonagi ani kea Anumaya Koti amaune vaya'mo'ya mage hu'ya nayona kae-malenayane

16 'Mani kanamo'a ha'no hisige'na nagaya Anumaya Koti'na Teviti nofi anagala nago no kana hu-mainayanagi'ya tagapema ailav-isayana nagaya ete'na ali'na hetigahue. Ali-haviya hutalenaya nona ete'na kihahue.

17-18 Alisaga hugahuanagi muki'a vea'nemo'ya nagaifena natiyegahae. Isaleli vea'ne omainaya vea'nemogamina nagaya ago hapali-malenoa vea'mo'ya nagai fe havi'ya nati-yegahae. Nagaya Anumaya Koti'na ago nayona tamahapaugetama havimainaya kavafe mani kea nehue.' huno aune kano'amo'a kae-maleneane.

19 Ani yafe nagayama havua nagesamo'a mage nehie Isaleli vea'ne omainaya vayapiti Yisatina amaku'a amitafa humainaya vea'mogamina kana yana o'amamisune.

20 Avo kaeta 'Mage hutama hiho.' huta hampaisune 'Fali-mainaya veafe 'Anumayati mainae.' hu'ya amakisana ne'vai'ya malenesaya kavala onesae. A'ne muna'ne amavayu nehisaya kavala ataleho. Kolamo'a agusafinaga hanesia afuene kola'enena oneho.' huta hamapaisune.

21 Nayona aepa he'ya muki'a kotega Yuta vaya'mogami mono nopina muki'a Sapati yupa Mosese kea hapali'ya nehaviyane. Nehaviyanagi havite'ya akave'ma malenu'yahena akave male-gahae.” huno humaineane.

Isaleli vea'ne omainaya vayapiti Yisasina amaku'a aminaya vea'nefi mani avona kae'ya amaminae.

22 Aposolo vaya'ene soka vaya'ene Yisasi anaga'aene muki'a alitalu humaine'ya kea havite'ya “Kanalele.” hu'ya amakaipiti tole kanolatana hesaga hute'ya hunatage'ana Polo'ene Panapasi'ene Atioku kumate umainae. Anima hunataya kanolatana kava kanolata'ami maina'e. Anakia Yutasi Pasapasi'ene Sailasi'ene hunatage'ana umaina'e.

23 Avona kaete'ya ani kanolatamogani anayap-ina malet'e'ya mage hu'ya kae-malena.

Tagaya Aposolo vaya'ene soka vaya'ene mani avona kaeta Isaleli vea'ne omainaya vayapiti'ima Yisasife havitama tamakupi maletama tamametiti nehaya tafu-taganagatama Atioku kotegaene Silia kotegaene Silisia kotegaene mainaya vea'mogatama “Felugae.” huta avona kaeta nelamamune.

24 Tagayama havunana nago'a vaya'mo'ya tagaipitila nago'a tamakesa ku'mo hutama tole lamakesa havisaya augafa kea mo lamaha-paiyanagi tagaya “Ani kea hiho.” huta hu-o'ama-tenone.

25-26 Hu-o¹ amatenonafene huta melitalu hage¹ta kea huta ha¹ya kiteta tole kanolatana tagaipitila tahau tayamopafi nelahaiya kanolata hunaton-age¹ana Anumayatimo¹a, Yisasi Kalaisina agai ke hamanepai¹a yateti hanaesage¹ana falisa¹a yafena anama¹yoa o¹ai kanolatane, Panapasi¹ene Polo¹ene tamakaitega ugahe neha¹e.

27 Yutasi¹ene Sailasi¹ene hunatesunage¹ana tamakaitega humainona kea anavayafiti mo lamahapaiga¹e.

28-29 Alu Aotage Avamu¹mo¹a tagai¹ene mai-negeta kea kea huteta “Kanalele nago¹a kana yana amayo¹nalela omalegahunagi ma yama¹age akave malesae. Fali-mainaya veafe amakisana vai¹ya atupa kave alisaga hu¹ya malesaya kavela oneho. Kolamo¹a agusafinaga hanesia afuene kola¹enena onesae. A¹ne muna¹ne amavayu nehisaya kavala ohisae. Ani kava¹ma ohisayana kanale¹ya hu¹ya maigahae. Ketia male me ha¹no hie.” hu¹ya kae-malena¹e.

30-31 Kae-malete¹ya humatage¹ya Atioku lavi¹ya Yisasi anaga¹mogamina molitalu humatete¹ya mani avona amamige¹ya hapali¹ya havite¹ya humainaya kehena tusi¹a muse humaina¹e.

32 Muse hage¹ana Yutasi¹ene Sailasi¹ene Anumayamo aune kanolata maine¹ana aya¹aya kea amaku amamema alilokiya vaisaya kea hamapai-maina¹e.

33-34 Ani kea hute¹ana aya¹aya kanagefa amakai¹enena maite¹ana ete¹ana va¹age¹ya ali falu fala hunatetage¹ana hunatenaya vayatega

ete'ana umaina'e.

³⁵ Vage'ana Polo'ene Panapasi'ene Atioku maine'ana nago'a vea'nene ailokae'ana Yisasi kea hamanepai'ana maina'e.

Polo'ene Panapasi'enena nagoke anaipalela omaina'e.

³⁶ Nago'a kana maite'ana Polo'a Panapasifena mage huno humaine “Eteta'a muki'a kumate Yisasi mono ke hamapai-maino'a kumate ute ete huta'a tafu-tagana'ya kanale'ya hu'ya mainafi haviya hu'ya mainafi uta'a mogesu'e.” huno humaine.

³⁷⁻³⁸ Higeno Panapasi'a “Yoni Maki avale-lineta'a ugahu'e.” huno hianagi Polo'a mage hie “A'ao, ani kanomo'a hagoteno ta'agai'enema viana Pamafilia kumate mo nela'ataleno ali'yana o'alino umaineane.” huno humaine.

³⁹ Hige'ana ani yateti tolefi ali'ana fako hu'ana anahaote anahaote umaina'e. Panapasi'a Makina ne'avaleno tipi kalefi haisaga humai'ageno Saipalusi anavaleno umaine.

⁴⁰ Va'ageno Polo'a anona'a Sailasina avalege'ya afu'agana'ya Anumayamotega havige'ya mage hae “Kategama visa'ana Anumayamo'a kayone hulanateteno tanaya hisie.” hu'ya hage'ana umaina'e.

⁴¹ Silia kotegaene Silisia kotegaene ute ete hu'ana Yisasi anaga'mogamina amaku amamena ali lokiya vaimate'ana amaya humaina'e.

16

Timoti'a aepa heno Polo'ene Sailasi'ene tokae'ya vaiye-mainae.

¹ Polo'a Tepi kumate uno Lisitala kumate umaine. Ani kumatela nagola Yisasife havino agupi malenea kanoa maine. Agia Timoti'e. Ani kanomo'a Yuta a'mo nafa'ne mainegi nefa'a Isaleli kanoa omainegi, Kaliki kano mainegeni, ita'amo'a Yisasina agu'a amitafa humainea alagino maine.

² Ani Lisatalaene Aikoniamuenema maine'ya Yisasi anaga'mo'ya Timotifena “Kanale kano maine.” hu'ya humainea.

³ Hageno Polo'a Timotifena mage hie “Ta'agai'ene tokaeta vaiyesune.” Visuna kotega mainaya Isaleli vea'mo'ya kagaila negafa'a Isaleli kanoa omainegi, Kaliki kano maine, hu'ya ago havimainagi havigu ani yafe amaipa haviya huyafene huno nehuno Timotina avaleno Mosese kemo akave maleno agoya ano'ya laga humaine.

⁴ Na'a hute'ya alu kumate kumate ne'u'ya Yelusalemu mainaya Aposolo vaya'ene soka vaya'ene humalenaya kema akave malesaya yafe hamapai-mainae.

⁵ Hamapaige'ya Yisasi anaga'mogamina amametiti humainaya yamona tokiya'age hige'ya muki'a yupa nago'a vea'nea ete ete hu'ya egasago hage'ya amakai'lenena tokae'ya mainae.

Polo'a himonafi nago Masetonia kanoa age-maine.

⁶ Alu Aotage Avamu'mo'a "Esia kotega* nagai ke hamaopaigahae." huno nagalu humateneanagi'ya Polo'agi Sailasi'agi Timotigamina Faligia kotegaene Kalesia kotegaene umainae.

⁷ Misia kotega uva'yi hu'ya Pitinia haigahe hayanagi Yisasi Avamu'mo'a "O'viho." huno nagalu humatene.

⁸ Nagalu humatege'ya Misia kola agase'ya Taloasi kumate elavi-mainae.

⁹⁻¹⁰ Ani kegela Polo'a nagola himona kana ya ageana nagola Masetonia kotega kanomo'a hetino maineno ke huno mage huno humaine "Kagaya hagelina lakaeka Masetonia me laha'mao." huno higeno Polo'a agetegeta Anumaya Koti'a tagaife "Ani kotega utama vea'mogamina Yisaside kanale mono ke mo hamapaiho." huno humaineanagita tagaya aupa'a Masetonia visuna kafe atine'ayone.

Litia'a Anumayamote agu'a aiyahae humaine.

¹¹⁻¹² Taloasiti tipi kalefi haisaga humaunageno tavaleteno aiyayeno fatago huno Samotalesia ti amu'nopi hanea kumate euva'yi higeta mo faeteta natena ufatago huno haigeta Neapolisi hai va'yi huteta mopafi euta Filipai kumate euva'yi humainone. Filipai kumala Masetonia vea'mogamina ala kuma'amie. Nayona Lomu vea'nea e'ya mainaya kumale. Tagaya ani kumate euva'yi huta nago'a kana mainone.

¹³ Maineta Sapati yupa ani kuma'mona kegi'yamo hi'yenale uteta titega lavita anilega Anumayamotega havinegaya kumala hane

huta lavunanagi nago¹a a¹neyaga alitalu hu¹ya mainageta Yisasi kea mo hamapai-mainone.

¹⁴ Hamanepaunageno nagola ani kema maino havia a¹mo agia Litia¹e. Tayataila kumateti alagino haesate oko kena talo huno mone ali¹ya ne¹alia alagi Isaleli vea¹ne omainaya veapiti a maineanagi aluya huno Anumaya Koti agia alisaga nehia alagino ani a¹mo¹a Polo¹ma hia ke maino nehavigeno Anumaya Koti¹a agu¹a alino aiyahae huteno havisia agu a gesa amine.

¹⁵ Amigeno haviteno haenaga¹a muki¹a agai¹a anaga¹aene tina fale-matenae. Tina fale-matetageno tagaila mage huno lahapaiye “Musetami nehue nagai¹fema ‘Yisasina agu¹a amitafa hia a maine.’ hutama hinutamahena nagaila noni¹afi emaiho.” huno tokiya¹age ke higeta agayama hia kea akave malenone.

Polo¹ene Sailasi¹ene Filipai kumate nofi humaina¹e.

¹⁶ Nago yupa Anumayamotega havinegona kumate ugahe katega ne¹unageno nago nofipi maineno miya no¹alia ali¹ya ne¹alia munala katega fotu hunanagi Kefo Avamu¹mo¹a agu¹afi mainegenon aune laga huno haenagama va¹yi hisia yafema havigageno¹a hufalote huno hamanepaiya munalagi¹ya kava vaya¹amo¹ya humainea keletila tusi¹a mone ne¹aliyane.

¹⁷ Ani muna¹mo¹a Polo¹ene tagai¹ene takave ne¹eno keha keha huno mage hie “Ma vayala anafinaga mainea Anumaya Kotina ali¹ya vaya¹amo¹yae. Anumaya Koti¹ma tamaku

tamamema aligatisiafe kanale kate kea tamahanepaiye.” huno humaine.

¹⁸ Nehuno muki'a yupa ani kege'ya maino higeno Polona aipamo'a haviya higeno maiyaha-e huno ani Kefo Avamu'mofe mage huno humaine “Yisasi Kalaisina agai agileti kahanepauve ani muna'mo agupitila hati-lavika vuo.” huno higeno aupa'a ani Kefo Avamu'mo'a ataleno umaine.

¹⁹ Vige'ya ani muna'mo kava vaya'amo'ya agayana hige'ya monema ne'aliya kamo'a ti-lege'ya aepa'a agete'ya Pologani Sailasiganina anatafa hute'ya anavayu hu'ya vea atagu nefaya kumapi kaiyeke hunatesaya vayate anavale'ya umainae.

²⁰ Yasi vayate anavale'ya mage hu'ya mo hama-paiye “Ma kanolatana Yuta kanolatanagi'ana tagai kuma alihaviya neha'e.

²¹ Vea'ne amavaya hu'ana ‘Ma'a hiho.’ hu'ana hulaveli-neli'ageta tagaya Lomu vea'mogata ani kava'ma hisunana tusiya huno haviya hugahie.” hu'ya humainae.

²² Hage'ya melitalu humainaya vea'mo'ya “Tamage nehae.” hu'ya hage'ya Yasi vaya'mo'ya mage hae “Kena'ania ali hatata hutalenetama hegi ka'yoteti hanaeho.” hu'ya hage'ya hanae-mainae.

²³ Hegi ka'yoteti tusiya hu'ya anamulo-nalo hu'ya hanaete'ya kina nopi nofi hunatete'ya ani kina nopi kava kanomofe mage hu'ya hapa-iyae “Ma kanolatatela tokiya'age huka ya-gaiyo.” hu'ya humainae.

²⁴ Na ke hageno haviteno kava ne'yagaiya kanomo'a anavaleno tole ayenalagi-male nopinaga anateteno anaiya nago yosa amu'nopi vaiteno aitalako hunatene.

²⁵ Hunatayanagi anakaya ani kege amu'nona yagame nehu'ana Anumayamotega nunamu hu'ana havinega'age'ya kina nopi mainaya vaya'mo'ya havi'ya mainae.

²⁶ Mainageno anile aupa'a tusi'a imi ne'alino ani kina note ayevasaga hu'ya kimalenaya yosa ali kanage kanagu higeno muki'a fitayagamo'a aiyaki-lavige'ya muki'a kina nopi mainaya vaya'mogami amayakopitila nofi'yagamo'a kaluhelavi-maine.

²⁷ Aikaluhelavigeno kina vayate kava kanomo'a faeno maineleti hetino mogeteno muki'a fitayagamo'a ago yaki-mainegenomege huno agesa havimaine “Muki'a kina vaya'mo'ya ago falae.” huno aya'aya naepe ka'yona alisagino agai'a age'ya fakaligahe humaine.

²⁸ Nehigeno Polo'a ala kefiti mage huno humaine “Kagaika'a kaugafa ali haviya ohuo. Tagaya muki'amogata afa'a mainone.” huno humaine.

²⁹ Higeno ani kava kanomo'a vayafe “Ka'nila alitama eho.” huno hunemaleno aiyayeno ani nopinaga hai-faleno monaketeno kolia huno atali nehuno Pologani Sailasiganina anavate eno anaiyafi mesaga hulavi-maine.

³⁰ Hu-laviteno ani nofipiti anavaleno kumatega via'yamo anakaife mage huno hanavige “Muse-tani nehugi na'a hisugenomege Anumaya Koti'a nagu

namena aligatigahie?” huno hanavige-mainae.

³¹ Hige¹ana mage hu¹ana hapai¹e “Anumayati Yisasife havika kagupi maleka kametiti hisan-ageno Anumaya Koti¹a kagu kamena ali-negatino anagakamogamiene ali-gatisigetama agai anaga maigahae.” hu¹ana hapai-maina¹e.

³²⁻³³ Hute¹ana ani kanoene muki¹a agai¹a anaga¹aene Yisasi mono kea huhale¹ana hamapai-maina¹e. Hamapaita¹ageno ani kegeke¹ya anavaleno amuna sese hunatete¹ya anile aupa¹a ani kanoene agai¹a anaga¹aene tina fale-matena¹e.

³⁴ Tina falemateta¹ageno anavaleno noma¹afinaga umaineno kavela anamiteno tusiya huno agai¹aene agai¹a anaga¹aene Anumaya Kotina amaku¹a amite¹ya amametiti haya yafe tusi¹a muse humainae.

³⁵ Muse hayanagi kotigeno Yasi kanomo¹a ati vaya humatege¹ya e¹ya mage me hae “Ani kanolatana afa¹a anatalege¹ana vi¹o.” hu¹ya humainae.

³⁶ Hageno kina vayate kava kanomo¹a ani kea mage huno Polona hapaiye “Yasi vaya¹mo¹ya nago¹a vaya humatage¹ya e¹ya tanakaife mage hae tanakaya kina nopitila ne¹ataletana tanaipamo¹a kanale nehinagetana afa¹a vi¹o.” hu¹ya me hanapaiye.

³⁷ Higeno Polo¹a ati vayafe mage huno hama-paiye. “Ta¹agaya Lomu kanolata* maino¹agi haviya hula¹ate¹ya ta¹agai kaiyekea havite¹ya fago hu¹ya kaiyekea huota¹ate¹ya vea amaula-

gafina hegi ka'yoteti tusiya hu'ya ta'amulonalo hute'ya nofila hula'atenagi menia na'a hige'ya falaki'ya ta'atalegahe nehæ? Tamagelafa huta'a kesila o'ugahu'agi amakaya amakai'ami male e'ya 'Kina nopitila ataletana vi'o.' hu'ya hula'atesae." huno humaine.

³⁸ Hage'ya ati vaya'mo'ya ani kea ali'ya Yasi vaya'mogami mo hamapage'ya "Lomu kanolata maino'e." hu'ana ha'a ke havite'ya tusi'a koli humainae.

³⁹ Koli hute'ya kina nopi u'ya amahau ke mo hunatete'ya "Havi kava hunagetana ha'e." hu'ya kina nopitila anavale ne'anatale'ya mage hae "Musetani nehune mani no kumala ne'ataletana vi'o." hu'ya humainae.

⁴⁰ Hage'ana kina nopitila atale'ana Litia nopi moga'ana anafu'anakanagamina amakete'ana amaku amamena ali lokiya vaisaya kea hama-paite'ana ani kumala ataletana umaina'e.

17

Tesalonaika vaya'mo'ya Polo'ene Sailasi'ene hanaegahe humainae.

¹ Polo'ene anaga'amo'yaene Amifipolisi kumala mogase'ya Apolonia kumala mogase'ya Tesalonaika kumate uva'yi humainae. Ani kumatela nagola Yuta vaya'mogami mono nona hane.

²⁻³ Haneanagino Polo'a muki'a kanafima nehia kava huno tagufa (3) Sapatu yupa ani mono nopina haino Anumaya Koti kema kae-malenaya

auta'mafitila aepa'a hugafino mage huno hama-paiye “Anumaya Koti'ma taugafa aligatigahema hutenea kanomo'a tusi'a agata aigeno fali-maine. Fali-mainefitila eteno heti-maine. Ani Yisasina Anumaya Koti'a taugafa aligatigahema hutenea kanomofe tamahanepauve.” huno humaine.

⁴ Hige'ya nago'a Yuta vaya'mo'yaene kasago'ya Anumaya Koti agima alisaga nehaya Kaliki vaya'ene amakima hanea a'neyagaene Yisasife havi'ya amakupi male'ya amametiti hute'ya Polo'ene Sailasigani anakave tokae'ya umainae.

⁵ Tokae'ya umainaya yateti Yuta vaya'mogami amaipamo'a haviya nehae. Hige'ya kefo kava nehu'ya felu mailite'ya nehaya vayalagi'ya vaya atagu nefaya kumapi mainae. Maine'ya vaya'yaga amavale'ya melitalu humalet'e'ya ani kumate vaya'mogamina amaku amakesa hu'ya ali hetige'ya Yesoni note u'ya noma'a moyenafa hu'ya Pologani Sailasiganina anavale'ya alitalu humainaya vea'mogami amayapi anategahe haimainae.

⁶ Haite'ya atiyegetayana hige'ya o'aname'ya Yesoni'ene nago'a Yisasi anaga'ene amavayu hu'ya ani kumate kava vayate amavale'ya uva'yi hu'ya mage hu'ya hae “Mani vaya'mo'ya muki'a kotega ute ete hu'ya vea'mogamina mono kea ali haviya hume hume menia tagai kumate emainae.

⁷ Emainageno Yesoni'a noma'afi amavaleno amatege'ya maine'ya ala sauve kanotimo'a, Sisa'ma humainea kea ali haviya nehu'ya mage hae 'Alu sauve kanoti maine. Ani kanomo agia

Yisasi'e. hu'ya humainae.” hu'ya humainae.

8-9 Hage'ya melitaluma humainaya vea'mo'yaene ani kumate kava vaya'mo'yaene ani kea havite'ya amakesa ku'mo hute'ya “Kina nopima o'visayafena monea tamitetama ugahae.” hu'ya hage'ya Yesoni'ene nago'a vaya'ene monea hage'ya amamitage'ya amatalage'ya umainae.

Pologani Sailasigania Pelia kumate u'ana Yisasi mono kea hamapai-maina'e.

10 Aupa'a ani kege kano'a Yisasi anaga'mo'ya Pologani Sailasiganina hunatage'ana Pelia kumate va'a'yamogani Yuta vaya'mogami mono nopi mo haifale-maina'e.

11 Pelia mainaya vea'mo'ya Tesalonaika kumate mainaya veala amakase'ya kanale amaku amakesaene vea'ne mainageno Polo'a Yisasi kea hamapaige'ya havite'ya aluya huno nehamaiye. Havi'ya amakupi maletе'ya muki'a kanafina “Tamage nehifi havige nehie?” hu'ya Anumaya Koti kema kae-malenaya kefina hapali'ya ati ayemainae.

12 Na'a nehu'ya kasago'ya Yuta vaya'mo'yaene kasago'ya Kaliki a'neyaga amakima hanea a'neyagaene kasago'ya Kaliki vaya'yagaene Yisasifena havi'ya amakupi male'ya amametiti humainae.

13 Amametiti hayanagi Tesalonaika mainaya Yuta vea'mo'ya haviyana “Polo'ma Anumaya Koti kema Pelia kumate vea'ma hamapaiye.”

hu'ya haya kea havite'ya anile eva'yi hu'ya alitalu humainaya vea'mogami amaku amakesa meli haviya humainae.

¹⁴ Ali haviya hage'ya Yisasi anaga'mo'ya aupa'a Polona hutageno hageli kahaepatega tavige'ana Sailasigani Timotigania anile Pelia maina'e.

¹⁵ Maina'age'ya avagi hu'ya umainaya vaya'mo'ya Polona Atenisi avale'ya umainageno Polo'a mage huno hamapaiye “Sailasigani Timotiganife ‘Tanakaya aupa'a hutana nagaitega e'lo.’ hutama hanapaiho.” huno hamapaige'ya atale'ya umainae.

Polo'a Atenisi kumate mono ke huhaleno humaine.

¹⁶ Vageno Polo'a anakava maineno ageana Atenisi kumatela kasago'ya yafateti talo humainaya afa anumayayaga malenageno mogeteno aipamo'a tusi'a haviya humaine.

¹⁷ Aipamo'a haviya higeno Yuta vaya'mogami mono nopi haino Yuta vea'nene Anumaya Koti agi alisaga nehaya Yuta vea omainaya vea'nene Anumaya Koti kea huhaleno amakai'ene huge havige humaine. Muki'a kanafina vea'ne atagu nefaya kumapi maineno anifima mainaya vea'mogamina Anumaya Koti mono kea hamanepaino huge havige humainae.

¹⁸ Hamanepaige'ya nago'a Epikuliaene* Sitoikiene* ala havi havi'ya alilinaya vaya'amimo'yaene ke o'vai o'vai nehage'ya alitalu humainaya vea'mo'ya havite'ya

nago'amo'ya Polofe mage hu'ya hae “Ma kanomo'a na ke huliteno nehie?” hu'ya nehage'ya nago'amo'ya Polo'ma Yisasife'ene fali-mainefiti hetimainea kanale mono kema hamapaiya kehe mage hu'ya humainae “Alu kumate anumayahe nehifi?” hu'ya humainae.

¹⁹ Hute'ya agai ke havigahe Aleopagusi Kanisole vayate avale'ya ute'ya Polofe mage hu'ya havigae “Kagayama haegafa kema hamapaina kea havigahe nehunagi tahapaiyo.

²⁰ Keka'ama havunana alu'a augafa kema hanageta havuna kemo aepa'a havisune huta nehune.” hu'ya humainae.

²¹ Muki'a Atenisi mainaya vaya'ene yoka emainaya vaya'ene muki'a kanafina haegafa kema hisaya ke havisaya yafena tusiya huno nehamaiya vayalagi'ya alu kavala ohisaya amakesa nehae.

²² Hageno Polo'a Aleopagusi kanisole vaya'mogami amu'nopi hetino mage huno humaine Atenisi mainaya vaya'mogatama nagaya agoana tamakaya aluya hutama afa anumayamo mono kea tokiya'age hutama nehaya vaya mainae.

²³ Mainage'na nagaya vaiyatete nehu'na agoana yafateti talo humalenaya afa anumayamogami amakima alisaga nehaya afa anumayatamimona agete'na nago yafa folamole mogoana ani yafatela mage hutama kae-malenae “O'agenona anumayamogae.” hutama kae-malenance'na agoa kanomofe “O'agenona kanomo agima alisaga nehune.” hutama

kae-malenaya kanomofe aepa¹a hugafi¹na tamahapaigahugi haviho.

24 Anumaya Koti¹a ma mopaene muki¹a mopafima hanea ya¹ene talo humalenea kanogino muki¹a ikapinaga ya¹ene mopafi ya¹ene kava yagai-mainea kanogino vea¹mo¹ya amayateti kimalenaya nopina nomaiyane.

25 Tagaya tayapitila nago yana ha¹omaegahune. Agai¹a muki¹a vea¹mogami hamaimu¹ene muki¹a yama amaminea kanogita hana¹a huno nago yama¹a omaleneanagita aya hugahune?

26 Anumaya Koti¹a nagoke tototimona hagoteno talo humaleteno ani kanofiti muki¹a ma mopale mainaya nofi veala ali falote humatene. Humateteno “Ma kote kote maiho.” huno amateteno kasago¹ya vaya maisaya kana¹amiene agai¹a humatene.

27 Amakaya Anumaya Kotina amaku amigahena ati yege yege hu¹ya Anumaya Koti aepa¹a havisae huno ani kavala humaineane. Tamage agaya alulega omaigi tagai¹ene nagoke nagoke¹mogatiene tokaeno maine.

28 Maineanagita agai¹age tahaimula tamigeta vaiyatete huta mainone. Ani kehe nago¹a tamakai avoma agelinaya vaya¹mo¹ya mage hu¹ya humainae “Tagai¹enena agai¹a lategeta nafa¹neyaga¹a mainone.” hu¹ya humainayane.

29 Higeta tagaya agai¹a latenea nafa¹neyaga mainone. Havigu lagaya ma lagesa havisunagi “Anumaya Koti aepa¹a tagesafitila yafateti¹ene kapaleti¹ene kanileta yafateti¹ene kanale¹ya huta

talo humalenaya augafa kanoe.” huta ohisune.

³⁰ Nayona Anumaya Koti aepa'a muki'a vea'mo'ya ohavinayanagino Anumaya Koti'a kasago'ya kea ohuneane. Nagi menia muki'a ma mopale veafena tokiya'age ke huno mage hie “Tamaku'a aiyahae hutama nagaitega eho.” huno humaine.

³¹ Anumaya Koti'a muki'a ma mopale vea'mogamina fatago huno kaiyekema humatesia kanafina ago hapalino ani kaiyekele'ma yagaisia vemona ago ali hetitene. Ani vemofe “Vea'mo'ya havilama hu'ya havisae.” huno fali-mainefitila ali hetitene huno humaine.

³² Hige'ya “Fali-mainefiti ago ali hetitenema.” hia kea havite'ya nago'a vea'mo'ya kigi hu'ya akaya atage'ya nago'a vea'mo'ya mage hae “Nago'ene mani kea hugeta havimano.” hu'ya humainae.

³³⁻³⁴ Nehageno Polo'a ne'amataleno umaineanagi nago'a vea'mo'ya agai akave ne'u'ya Yisasife havi'ya amakupi male'ya amametiti hu-mainae. Amametiti humainaya veapitila nago kanomo agia Tionisiusi'e Aleopagusi kanisole kano maineane. Nago a'mo agia Tamalisi'ene nago'a vea'nene amametitia humainae.

18

Polo'a Kolini kumate Yisasi mono kea huhaleno humaine.

¹ Haenaga'a Polo'a Atenisi kumala ataleno Kolini kumate umaine.

² Anile maineno nago Yuta kanoa age-maine. Ani kanomo agia Akuila'e. Kuma aepa'a Potusi hanegi ani kanafina Palisila'a a'amo'ene Itali kumateti emaina'e. Itali kumate kava kanomo'a Kolotusi'a mage huno kahegi malene “Muki'a Yuta vea'mogatama Itali vea'mogami ala kuma'amia, Lomua, ne'ataletama viho.” huno humainea kehe Akuila'agi Palisila'agia atale'ana Kolini umaina'ageno Polo'a anakaitega umaine.

³ Uno monakeana nagoke ali'yake hanegeno kena noma faka'ni'ya mone ne'aliya ali'ya ne'ali'ageno monaketeno anakai'ene tokaeno maineno ani ali'yana ali-mainae.

⁴ Polo'a muki'a Sapati yupa Yuta vaya'mogami mono nopi haino tokiya'age kea huno Yuta vaya'ene Kaliki vaya'ene Yisasife amakupi malesayafe hamapai-maine.

⁵ Haenaga'a Sailasi'ene Timoti'ene Masetoniati eva'yi neha'ana Polo'a alu ali'ya o'alino muki'a yupa Yuta veafena “Yisasi'e Anumaya Koti'a lamaugafa aligatigahe hutenea kano maine.” huno hamapai-maine.

⁶ Hamanepaige'ya agai kea hefalaki'ya huhaviya havaya hutageno Polo'a “Kefo kava nehae.” huno kena'ale hanea kugukege ya'yaga aifopo hune'ataleno mage huno hamapaiye “Tamakaya Anumaya Kotitegati fananema hisayana tamakaitami yanagi nagai yana omalene. Menia nagaya tamatale'na Isaleli

vea'ne omainaya veapi mo hamapaigahue.”
huno humaine.

⁷ Huteno amataleno nago kanoa Anumaya Koti
agi alisaga nehia kanomo nopi uno maine. Ani
kanomo agia Titiusi Yasatusi'e. Ani kanomo nona
Yuta vaya mono nomo avate hane.

⁸ Ani mono note soka kanomo'a Kalisipusi'ene
muki'a agai'a anaga'aene Anumayamofe havi'ya
amakupi malage'ya kasago'ya Kolini mainaya
vea'mogamina Polo'a hamapaige'ya Yisasife
havi'ya amakupi male'ya amametiti hutageno
tina fale-matene.

⁹⁻¹⁰ Nago kegela Anumayamo'a himonafi eva'yi
huno Polofena mage huno hapaimaine “Kolia
ohuka tokiya'age huka kea hamanepaika o'atalo.
Nagaya kagai'ene mainoe. Maigahuanagino
nago kanomo'a hetino ali haviya huokatega-
hayanagi'ya nagai'ni veala kasago'ya mani ku-
matela mainae.” huno humaine.

¹¹ Higeno Polo'a ani kumatela nago kafugi
sikisi'a (6) ikanagi huno ani vayapi maineno
Anumaya Koti kea hamapai-maine

¹²⁻¹³ Hamapaiyanagi Kalio'a “Kaliki kumate
kava yagaiyo.” hu'ya Lomu kava vaya'mo'ya
hutageno kava yagaino mainea kanafina Yuta
vaya'mo'ya alitalu hu'ya Polona atafa hu'ya Yasi
kanomote avale'ya mage hu'ya mo hae “Ma
kanomo'a tagaila Lomu vaya'mogami kahegi kea
atagaeno veafe mage huno nehie 'Ma'a hutama
Anumaya Koti agia alisaga hiho.' huno humave-
nelie.” hu'ya hae.

14-15 Hageno Polo'a kenona'amia hamapaigahe hianagi Kalio'a mage huno hamapaiye “Yuta vaya'mogatama ani kanomo'a tusi'a kefo kava hile'asina kanale hu'na namena mailava hu'na maine'na havule'asinagi tamakaya havige hav-age nehatagetama agilefe nehagi tamakaitami kahegi kehe nahavinegayanagi ani kea ohavi-gahue tamakaitami fako hiho. Nagaya na'a augafa kema haviyafena nonahaiye” huno humaine.

16 Ani kea huteno kaiyeke havi nopitila hemanati-talene.

17 Hemanati-talege'ya Yuta vaya'mogami mono note soka kanomona Sosenesina atafa hu'ya kaiyeke havi kuma'mo avate aiko-neliyana Kalio'a “Aote'yama'ae.” nehuno o'agene.

Polo'a eteno Silia kotega hanea kumala Atioku umaine.

18 Na'ama nehayana Polo'a muki'a kanafima nemaiya afu'aganagamina amataleno Palisila'ene Akuila'ene anavaleno tipi kalefi haisaga humai'ya Senikalia ute'ya Silia ene'u'ya Polo'a Anumaya Koti aufima hulokiya vaino kema humainea yafe aiyolagefa laga humaine.

19-21 Huteno Efesusi uva'yi hute'ya Polo'a Yuta vaya'mogami mono nopi hai-faleno Yuta vaya'ene huge havige nehige'ya mage hae “Mani kumatela aya'aya kana maisane.” hu'ya hayanagi “A'ao.” nehuno amataleno ugahe mage huno hie “Anumaya Koti'a haisige'nahena haenaga'a ete'na tamakaitega egahue.” huno humateteno Palisila'ene Akuila'ene

ne'anataleno Efesusiti tipi kalefi asaga humaino elavi-maine.

²² Sisalia elavi-va¹yi huteno Yelusalemu haino Yisasi vea¹ne moli falu fala hune¹amateno Atioku lavi-maine.

²³ Anile aya¹aya kana maiteno ne'amataleno Yisasi vea¹ne ali lokiya vaimatetele huno alu kumate kumate vaiyatete huno muki¹a Kalesia kumate¹ene Falgia kumate¹ene ute ete humaine.

Apolosi¹a Efesusi kumate mono ke huhaleno humaine.

²⁴ Nagola Yuta kanomo agia Apolosi¹e kuma aepa¹a Alekasatalia kanogino Efesusi uva¹yi humaine. Ani kanoa kanale¹ya huno kea nehavia kanogino maineno Anumaya Koti auta¹mafi hanea kea havilama huno havilinea kanoe.

²⁵ Apolosi¹a Anumayamo kea havilama hulineno aya mukiki huno kanale kava¹age nehuno Yisasifena hamapaiyanagi Yoni¹a tima falemate¹nea yafeke havilinegi Yisasi agile ti falemate kavafena ohavine.

²⁶ Yuta vaya¹mogami mono nopi haino tokiya¹age kea hamapaige¹ana Palisila¹ene Akuila¹ene havite¹ana avale¹ana va¹a'yamogani Anumaya Koti au¹ava yafena moli fatago hu¹ana aveli-maina¹e.

²⁷ Aveli¹ageno Apolosi¹a Akaiya ugahe Yisasi anaga¹amo¹ya aya hu¹ya Akaiya maine¹ya Yisasi kema nehaviya veate avona kae¹ya mage hae "Apolosina avaletama falu fala huteho." hu¹ya kae-malageno anile alino uva¹yi hige¹ya Anumaya Koti kayone yama¹aleti Yisasife

havi'ya amakupi male'ya amametiti humainaya vea'mogamina amaya humaine.

²⁸ Muki'a vea amaufina tokiya'age kea huno Yuta vea'mo'ya havilama ohunayafene huno Anumaya Koti auta'mafiti kea hapalino hama-paino “Yisasi'a Anumaya Koti'ma taugafa ali-gatigahe hutenea kano maine.” huno avopitila hapalino hamapaimaine.

19

Polo'a Efesusi maineno Yoni kema nehaviya vea'mogamina Yisasi kea hamapai-maine.

¹ Apolosi'a Kolini mainegeni Polo'a ago'yalega hanea kuma'yagale vaiyatete huno Efesusi uva'yi huno nago'a Yisasina amaku'a amitafa humainaya vea'nea amake-maine.

² Amaketeno mage huno hamavike “Yisasife havitama tamakupi maletama tamametiti nehaya kanafina Alu Aotage Avamula ali-mainafi o'alinae?” huno hamavigege'ya “A'ao, 'Alu Aotage Avamula maine.’ hu'ya haya kea ohavinone.” hu'ya hae.

³ Hageno Polo'a mage huno hamavige “Hana'li falelamatenae?” huno hamavigege'ya mage hae “Yoni ti falelatenae.” hu'ya humainae.

⁴ Hageno Polo'a mage huno hie “Yoni'a mage nehuno tina falematene ‘Kefo yatamihena tamaku'a aiyahae hisage'na tina falelamategahue.’ huno nehuno veala mage huno hamapai-maine ‘Nagai nakavelaga esia kanomofe, havitama tamakupi maletama

tametiti hiho.’ huno humaineana Yisasife huno humaineane.”

⁵ Huno hige'ya ani kea haviyanagino Efesusi vea'mogamina Anumayatimo'a Yisasi agile tina falematene.

⁶ Fale-mateteno Polo'a ayana amanute malegeno Alu Aotage Avamula amakaite elavino ege'ya amaku amakesafiti nohaviya kea, alu amake alu amake ai'ya Anumayamo avayafiti hamapaiya kea hufalote humainae.

⁷ Ani vayala tuelufu'a (12) vaya mainae.

⁸ Polo'a tagufa (3) ikana Yuta vea'mogami mono nopi ute ete huno tokiya'age kea huno Anumaya Koti kava yagaisia yafe amaku'a ali hetino hamapai-mainae.

⁹ Hamanepaiyanagi nago'a vaya'mo'ya amaku amakesa ailinele'ya tokiya'age ke hu'ya “Havige nehananagita tagupina ali omalegahune.” hu'ya muki'a vea amaufi Yisasi kea hu-haviya hutageno Polo'a ne'amataleno Yisasife havi'ya amakupi malenaya veala amavaleno muki'a kanafina efi efi huno Tilanusi humavenelia nopi mo huhaleno hamapai-mainae.

¹⁰ Tole kafu ani'a huno hamanepaige'ya muki'a Esia mainaya vea'nea Yuta vea'nene Kaliki vea'nene Anumayamo kea havimainae.

Sekeva ne nafa'neyagamo'ya kefo avamu anati-talegahe humainae.

¹¹ Anumaya Koti'a Polo ayapi tokiya avame yana humaine.

12 Nehige'ya vea'mo'ya akasiapiene kenaene Polo aугafale akasasete'ya kali vayate ali'ya vageno kali'amimo'a kanale humategeno amakusafiti Kefo Avamu'yaga hati-lavi'ya umainae.

13 Nago'a Yuta vaya'mo'ya Kefo Avamula vea'mogami amakusafinagati amanati ne'atalaya vaya'mo'ya Kefo Avamula amakusafima mainea veate Yisasi agi ne'aye'ya mage hu'ya humainae “Polo'ma tahanepaiya kanoa, Yisasi, agile Kefo Avamu'moga amakusafinagatila hati-lavika evuo hu'na kahanepauve.” hu'ya humainae.

14 Ani kava'ma nehaya vayala seveni'a (7) ne nafa'neyaga ala mono nopi kava yagai-mainea kanomo nafa'neyaga Sikeva nafa'neyagamo'ya ani kavala humainae.

15 Nago yupa ani kava nehageno Kefo Avamu'mo'a mage huno kenona'amia humaine “Yisasina ago agete'na Polona age-mainogi tamakaya tagatamae?” huno humaine.

16 Higeno Kefo Avamu'ma agusafinaga mainea kanomo'a ani seveni'a (7) vaya'mogamite haiteno asaga hunelavino amakaseno nehamaeno amaугafa tusiya huno alihaviya humateteno kena'amienne ali hatata hutalege'ya amaугafa alapa'age ani nopitila hati-lavi'ya falemainae.

17 Mani kea Efesusi mainaya veala Yuta vea'nene Kaliki vea'nene havite'ya koli nehu'ya Anumayatimona Yisasi agia tusiya hu'ya alisaga humainae.

18 Hage'ya kasago'yamo'ya Yisasifena havi'ya

amakupi male'ya amametiti nehu'ya kefo kava'ma haya kavafena hufalote humainae.

¹⁹ Hufalote hute'ya sesefe ya'amiene tusa hune'amataya ya'amiene analisa ya'amiene ani ya'yagahema kae-malenaya avo'yaga muki'a vea amaufi atafi kaesagali-talenae. Kae-mainaya avoma miya humainaya monema hapaliyana fi-fiti tauseni'a (50,000) kina hapali-mainae.

²⁰ Anima tokiya'age kava'ma humainea kavafena muki'a kotega mo hamanepai'ya Anumayamofena havi'ya amakupi malageno tokiya'age humaine.

Efesusi vea'mo'ya Polona haesaya ke humainae.

²¹ Ani ya'yagamo'a ha'no hutegeni Alu Aotage Avamu'mo'a Polona visia agu aghesa amigeno mage huno hie “Masetonia umaige'na Akaiya ete'na Yelusalemu uva'yi hisua'amo'na Lomu visua nagesa nehavue.” huno humaine.

²² Huteno tole ha'nemaya'a kanolatana Timoti'ene Elasatusi'ene hunatege'ana Masetonia va'ageno Polo'a agai'age anile nago'ene Esia kotega maine.

²³ Ani kanafina Yisasi kea nohaviya vea'mo'ya Yisasi akave nemalaya kehena tusiya hu'ya het'iya ke vai'ya amako'ya ke humainae.

²⁴ Ani kotega vaya'mo'ya yafateti nago akefa amayateti talo hu'ya “Anumayati maine.” hute'ya agia Atemisi'e hu'ya nehae. Hu'ya hageno nago kanomo agia Temitiliusi'e efe mone atafi kaeteno ani moneleti ani akefamo

agima alisaga nehaya nona, osi osi nona talo hige'ya vea'mo'ya miya hage'ya taloma nehaya vaya'mo'ya tusi'a mone ne'aliyane.

²⁵ Ne'aliyanagino Temitiliusi'a muki'a agai'a ali'ya vaya'ene muki'a osi osi Atemisina noma'a taloma nehaya vaya'ene ke hige'ya melitalu hageno mage huno hama-paiye “Vemogatama tamakaya havimainae ani ali'yateti kanale mon-etia ne'alune.

²⁶ Ne'alunanagi ani kanoa, Polo'e, muki'a Efesusi nemaiya vea'nene muki'a Esia kotega nemaiya vea'nenefe 'Amayateti taloma haya anumaya afa yatafa hanegi Anumaya omainae.' huno hige'ya muki'a vea'mo'ya 'Tamage nehane.' hu'ya akave malaya kea ago havitama age-mainae.

²⁷ Polo'ma hia kemo'a tagai ali'yatimo agia alino haviya havaya hutege'ya Esia nemaiya vea'nene alu mopalega vea'nene agima alisaga nehaya Atemisina atalesageno lavisige'ya vea'mo'ya 'Anumayati maine.' hu'ya agia alisaga ohisageno Atemisi agima alisaga nehaya nofena 'Afa yatafa hane.' hu'ya hugahae.” huno humaine.

²⁸ Hige'ya alitalu humainaya vea'mo'ya ani kea havigeno amaipamo'a tusiya huno ata lege'ya mage hu'ya hae “Atemisi'a Efesusi mainona vaya'mogatina tusi'a ala anumayati maine.” hu'ya humainae.

²⁹ Hage'ya muki'a ani kumate vea'mo'ya ala kenake nehu'ya Polo'enema vaiyatete neha'a kanolatana tolea Masetoniati kanolatane

Kaiyusi'ene Alisatakusi'ene anavayu hu'ya alitaluma nehaya kumapi anavale'ya amaiyaye'ya umainae.

³⁰ Vageno Polo'a "Amu'no'amifi kaiyeke mo hisue." huno hianagi afu'agana'ya "O'ugane." hu'ya atafa humainae.

³¹ Atafa hage'ya nago'a Polona kanapa'amo'ya ani Esia kumate Lomu kava vaya'mo'ya ani'a hu'ya agaitega kea atalageno ege'ya mage hu'ya tokiya'age kea hae "Kagaya vea'ma alitalu haya kumapina o'vuo." hu'ya humainae.

³² Hage'ya alitalu humainaya vea'mo'ya amaku amakesamo'a yagalege'ya nago'a vea'mo'ya nago kea hage'ya nago'a vea'mo'ya alu kea hage'ya tusiya hu'ya ala kenakea hage'ya kasago'ya vea'nema alitalu humainaya yamona aepa'a ohavinae.

³³ Ohavige'ya nago'a Yuta vea'mo'ya "Mage huka huo." hu'ya Alekasatana ayetufageno amu'no'amifi mo hetino ani kemo aepa'a hama-paigahe "Afa'a maiho." huno ayana aligosi-gosi humaine.

³⁴ Aligosi-gosi hianagi Yuta kanoma mainea yafe agelama hute'ya nagoke amavayage ailalupe'ya mage hae "Atemisi'a Efesusi mainona vaya'mogatina tusi'a ala anumayati maine." hu'yama mai'ya hayana tole yagemo kanafi ani ke'age'yana mai'ya humainae.

³⁵ Nehageno haenaga'a ani kumate avo kae ali'yate kanomo'a alitalu humainaya vaya'mogamina ali haka'yufeno mage

hie “Efesusi vaya'mogatama Atemisina anumayatimo agima alisaga nehaya nona Efesusi kumate'ma kanale'ya huno kava ne'yagaiya yafena hana vea'mo'ya ohavinae? Ikapinagati elavi-mainea yafana nagaluma humalenaya yafafena kanale'ya huta kava yagai-mainonagi hana vea'mo'ya ohavinae? Muki'amo'ya ago havimainae.

³⁶ Havimainayanagi'ya mani kea hefala okigahagi tamakaya afa'a maiho. Nagola aifo'nafo kavala ohiho.

³⁷ Anavaletama aya kanolatamogania Atemisi agima alisaga nehuna nopitila nagaluma humalenona yana musufa yana ohuna'e. Tagaiti anumayatimona Atemisife huhaviyana hu-o'atena'e.

³⁸ Ala kaiyeke havisia kanomo'a nago'a kanafi kaiyeke havi nopi maineno kaiyekea havigahigi Timitiliasi'ene agai'ene ali'ya ne'aliya vaya'mo'ya 'Kema hane.' hinu'yahena ani kanomote visae.

³⁹ Ugahagi alu yafema hinutamahena kamani vaya'mo'yama alitalu hisagetamahena ani kea fatago hiho.

⁴⁰ Ma yagefima hu-mainona yafena kamani vaya'mo'ya 'Tu nehae.' hu'ya tahavigesageta-hena hana kanomo hetino anima keha keha nehaya yamona aepa'a hamapaigahie?” huno humaine.

⁴¹ Avo kae ali'yate kanomo'a mani kea huteno “Notamilega ataletama viho.” huno hema-natige'ya umainae.

20

Polo'a Masetonia'ene Kalikiene umaine.

¹ Kema ayeso haya kemo'a ha'no hutegeno Polo'a Yisasina amaku'a amitafa humainaya veafe ke hige'ya agaite ageno tokiya'age hu'ya maisaya amaku amakesa alino hapaiteno hu falu fala humateteno amataleno Masetonia haigahe haimaine.

² Ani kotega vai ne'ayeno muki'a kanafina tokiya'age hu'ya maisaya kea hamapaiteno Kaliki kotega elavi-mainae.

³ Elavino tagufa (3) ika emaiteno Silia eugahe “Tipi kale alisue.” huno hiana Yuta vaya'mo'ya agaila haesaya kema haya kea hageno haviteno agha aiyahae huno tipi kalea ne'ataleno “Ete'na mopafi Masetonia kotega agase'na haigahue.” huno humaine.

⁴ Agai'enema tokae'ya haiya vayala Pilusi nafa'nemo agia Sopata'e Pelia kumate kanoene Tesalonaikati Alisatakusi'agi Sekutasigani Tepi kumateti kanoa Kaiyusi'ene Timoti'ene Esia kanolatana Tikikusigani Talofimusiganie na'a vaya'yaga Polo'ene hai-mainae.

⁵ Ani vaya'yaga euhagote'ya Taloasi kumate tagava maigahe eumainae.

⁶ Eu'ya mainageta tagaya Filipai maineta hale oki kaihame nenaya imu ki'ya naya kanamo'a ha'no hutegeta tipi kalefi haisaga humaita faefu'a (5) tau faeta tina lakaeta amakaitega Taloasi euva'yi huta seveni'a (7) yupa ani kumatela mainone.

Yutikusi'a asaga hulavino haegeni Polo'a ali hetitene.

⁷ Sota yupa Anumayamo agile kave negahe alitalu humainonageno Polo'a egama visia yafe huhaleno mono kea tahapaino hume hume ne'vigeno kege amu'nokefa maino humaine.

⁸ Maino'ma hiana anafi kikalo humalenaya nopi maunanagino kasago'ya ka'ni'yaga ayevasa humalageta mainone.

⁹ Mainonageno nago neyana Yutikusi'e akalogate mopale mainegeni Polo'a mono kea aya'ayate maino hume hume vigeno Yutikusina aukalo kalo higeno aula faeno fae latapalino fae-mainefiti anale tagufa (3) ayekalo hu'ya kimalenaya nopitilagino ani akalogapiti asaga hulavino mopafi tavino haegeni falige'ya molisaga hu'ya agayana ago fali-maine.

¹⁰ Fali-mainegeni Polo'enenana lavino mo anu-kilineni mage hie “Atali talua ohiho. Ago fali-maineanagi eteni haimula ne'alie.” huno humaine.

¹¹ Huteno ani nopinaga eteni haino maineni kaihame maya kolino hige'ya nenageni ani kavela neteni aya'aya mono ke amakai'ene huge huge nehigeno kola ali halegeni ne'amataleni umaine.

¹² Vigeno ani neyana eteni haegafa huno maige'ya avale'ya notega ne'u'ya tusi'a muse nehu'ya amaipamo'a kanale humaine.

Polo'a Taloasia ne'ataleni Miletusi umaine.

¹³ Tagaya uhagoteta tipi kale alitonageni Polo'a “Mopafi Asosi utesugetama anileti tipi kalefina

navalegahae.” huno higeta tipi kalefi Asosi mogava mainone.

14 Asosi agava maineta Polona avaleta tipi kalefi asaga humaita Mitilini kumate umainone.

15 Uteta anileti tipi kalefi mo faeteta Kiosi kumate uva¹yi huta ani lipi kalefi faeteta Samosi mo faeteta Miletusi eva¹yi humainone.

16 Polo¹a “Afulea kanahe muse hisaya imu kisaya kana Yelusalemu eva¹yi hisuafene.” huno aya¹aya kana Esia kotega omaisia agha haviteno “Efesusia ago agase¹na ugahue.” huno humaine.

Polo¹a Efesusi soka vayafe maiho huno hu falu fala humateteno agola amataleno umaine.

17-18 Polo¹a Miletusiti vava humateno “Efesusi utama soka vayafe nagaitega esaya ke hampaiho.” huno hige¹ya u¹ya mo hamapaige¹ya agaitega ageno mage huno hamapaiye tamakaya ago agemainae nagaya hagote¹na Esia kotega eva¹yima humainoa kanafina aepa he¹na humainoa kavala ago agemainae.

19 Naugafa ali¹na ohainogi Anumayamo ali¹ya ne¹aluge¹ya Yuta vava¹mo¹ya muki¹a kanafina hu-haviya hunatage¹na tusi¹a avite-mainoe.

20 Avia atoanagi atalia ohu¹na muki¹a lamaku tamamema ali lokiya vaisaya kea atalutamifi¹ene notamifi notamifi¹ene Anumaya Koti kea huhale¹na tamahapai-mainoe.

21 Tamahapai¹na Yuta vea¹nene Kaliki vava¹nenefe “Kefo yatamihe tamaku¹a aiyahae hutama Anumayatimona Yisasife havitama

lamakupi maletama tametiti hiho.” hu'na huhale'na tamaha-pai-mainoe.

²² Tamahapai-mainogi menia agegeho Alu Aotage Avamu'mo'a “Yelusalemu haiyo.” huno nahapaiyanagi'na anilega visuge'yama vaya'mo'ya hunatesaya kavala nagaya ohavinoe.

²³ Ohavinogi muki'ama umainoa kumatela Alu Aotage Avamu'mo'a mage huno nahapai-mainie “Tusi'a kana'age yama hugatesaya yana falote hugateno nofipina kategahae.” huno nahapai-mainie.

²⁴ Nahapai-mainieanagi nagaya falisufi afa'a maisufi afa yatafa hane hu'na nagesa nehavugi Anumayatimo'a Yisasi naminea ali'yama, veafe Anumaya Koti'a tusi'a kayone hulatenea kanale mono kea huhale'na hamapaisua ali'yana ali ha'no hisua nagesa nehavue.

²⁵ Tamakai amu'nopina vaiyatete hu'na Anumaya Koti kava yagai-lamatesia kea tamahanepauvanagi'na menia lamahanepaugi haviho nagaya havimainoe haenaga'a nagaila naukipalela nago'ene onagegahae.

²⁶⁻²⁷ Ani yafe menia tamagelafa hu'na tamahanepauve nagaya kolia ohu'na muki'a Anumaya Koti agu agesafima hanea kea ago tamahapai-mainoafe nago kanomoga Anumaya Kotitegati fananema hisanana tamakaitami yane. Ani kemo'a nagaipina omegahie.

²⁸ Omegahigi tamakaya tamaugafa ka'yetama maiho. Alu Aotage Avamu'mo'a “Kava yagai-mateho.” huno lamaminea vayala,

Anumayamo'a agai'a kolama'aleti miya humalenea sipi sipilelela kava yagaiho.

²⁹ Nagaya nehavue tamatale'nama visuana nago'a vayala, kave'age afela kalamo nehia kava hu'ya tamakai amu'nopi esaya'amo'ya Yisasife havi'ya amakupi malenaya sipi sipiyaga ali haviya hugahae.

³⁰ Ali haviya hugahagi tamakai amu'nopitila nago'a vaya'mo'ya heti'ya havigea mohu haviya mehu haviya nehu'ya Yisasife havi'ya amakupi malenaya veala “Tagai takave eho.” hu'ya amavayu hugahae.

³¹ Ani kava'ma hisaya yafena ka'yeho. Nagaya tagufa (3) kafufina felugaene kege'ene kasalo'nahae hu'na maifalua ohunoe. Avia ne'ate'na muki'amogatamina tamaku tamakesa nagoke nagokemogatamina tamaumonola malogetama havimainagi ani yafe tamakesa ali hao hutama haviho.

³² Menia Anumaya Koti ayapi tamatogeno agai'a kayone hulamatesia ke'amo'a tamakaila alino tokiya'age hulamateteno muki'a agai'a alu aotage vea'ne'amogamima ne'amatea kanale yana tamamigahie.

³³ Nagaya nago'a vaya'mogatama mone afenotamile'ene kukenatamile'ene age'na naha'yea nohuane.

³⁴ Tamakaitamia agayana nayapiti ali'yana ali'na nesua ya'ene nagai'enema lokae'ya nemaiya vaya'mo'ya nesaya ya'ene ali falote huge-tama age-mainae.

³⁵ Na'a nehu'na muki'a yana tamaveli'na

mage hu'na humainoe “Ali'ya alitetama kalima ne'aliya vayala amaya hiho.” Anumayatimo'la Yisasi humainea kea mage humaine “Vea'mo'ya nago yama alisayana muse hugahagi afu'aganana nago yana amisiana tusiya huno musena hugahie. Aminea yamo muse yamo'la ali-mainea muse yana agase-maine.” huno humainea kea tamakesa havi havi hutama maiho huno humaine.

³⁶ Mani kea huteno soka vaya'ene Polo'la ale'ya ayeno Anumayamotega ke huno havige-maine.

³⁷⁻³⁸ Havigetege'ya muki'la soka vaya'mo'ya tusi'la avi ne'ate'ya Polona anuki'ya atako ataka nehu'ya haenaga'ama agai aukipale'ma nago'ene o'agesaya yafe hamaumana halege'ya avia atete'ya tipi kale hanelega avale'ya umainae.

21

Polo'la tipi kalefi via'amo Yelusalemu ugahe humaine.

¹ Amataleta tipi kalefi una'amogata Kosi kumate mo faeteta lina takaeta Lotesi uva'yi huta mo faeteta lina lakaeta Patala uva'yi humainone.

² Uva'yi huta nagola hagelipi kalea agonana Fonisia kotega ugahe nehigeta ani lipi kalefi haisaga humaita umainone.

³ Ne'uta Saipalusi mogonana haoga laya kaiyaga hanegeta ne'ataleta Silia uta tipi kalemola afeno'yaga atalegahe higeta Taiya limo agegayalega lavi-mainone.

4 Anile tatalegeta Yisasife havi'ya amakupi malenaya anagafe momatiyeta ali falote huteta amakai'ene seveni'a (7) kana mainonageno Alu Aotage Avamu'mo'a hamapaige'ya havite'ya Polofena “Yelusalemua o'vuo.” hu'ya hapai-mainae.

5 Hapaitageta amakai'enema mauna kanamo'a ha'noma nehiana katega ugahe nehunage'ya muki'amo'ya a'ne'amiene nafa'ne'amiene tavale'ya kumala atale'ya vageta ti agegayalega hanea kahaepate mo latalegahe hagea tale'ya moyeta nunamu humainone.

6 Nunamuna huteta hufalu fala humateta “Maiho.” humateteta tipi kalefi haisaga humaunage'ya ete'ya no'amilega emainae.

Sisalia kumategati nagola aune kanoa Agapusi'a Polona ke hapai-maine

7 Taili kumala ataleta Tolesesi uva'yi huta Yisasife havi'ya amakupi malenaya anagala hu falu fala hune'amateta amakai'enena nagoke kana kano'a mainone.

8 Maita faeteta amataleta Sisalia uva'yi huta Filipi nopi umainone. Ani Filipi'e kanomo'a Yisasi ke hamanepaiya kanogino Yelusalemu kave amamite amamite hisaya yafe hapali'ya humatenaya seveni'a (7) vayapiti kanogita ani kanoene umainone.

9 Umainonageno ani kanomo'a fo'a (4) vele omainaya muna'ne'a mainayanagino Anumaya Koti'a avayafiti hamapaiya kea hu'ya amaune laga nehaya muna'neyaga mainae.

10 Mainageta lagaya anile tole lagufa kana mainonageno nagola Anumaya Koti aune kanoa Agapusi'e nehaya kanoa Yutiati elavi-va'yi humaine.

11 Takaite eva'yi huno Polo amu'nofila melino agai'a aiya ayate kisalu negino mage huno hie “Alu Aotage Avamu'mo'a mage huno nahapaiye ‘Yelusalemu mainaya Yuta vaya'mo'ya ma kava hu'ya mani amu'nofi'mona nefana aiya ayate kisalu kite'ya vaya'mo'ya haesageno falisiafe Yuta vea'ne omainaya vaya'mogami amayapi ategahae.’ huno hike'na havite'na mani kavala me nehue.” huno humaine.

12 Higeta anima hia kea haviteta tagai'ene ani kumate vea'nene mage huta hapaune “Pologa museka nehunagi Yelusalemua ohaiyo.” huta hutene.

13 Nehunana Polo'a mage huno humaine “Na'a higetama avia ne'atetama nagu nagesa ali haviya nehae? Nagaya Anumayanimona Yisasi nagu'a amitafa humainoafe nagaya nagesa talo tala hu'na Yelusalemu haisuge'ya natafa hu'ya nofipi natete'ya nahaesage'nama falisuana kanalele hu'na nehue.” huno humaine.

14 Higeta haviteta kenona'a ha'lopaita mage huta humainone “Anumayatimo'a havimaineanagino haisia kavala hisie.” huta humainone.

15 Ani kea huteta lagaya ali lalo tala nehuta Yelusalemu haimainone.

16 Haunana nago'a Sisalia lafu-tagana'ya tagai'ene haigeta Yelusalemua hai va'yi hunage'ya nagola Saipalusi kanomo agia

Nasoni¹e agai notega tavale¹ya vageta umainone.
Nasoni¹a nayona Yisasi anagapi maineane.

Polo¹a Yelusalemu hai va¹yi humaine.

¹⁷ Yelusalemua hai va¹yi hunage¹ya tafu-
tagana¹ya tusi muse hu¹ya ali falu fala hulate¹ya
lavale-mainae.

¹⁸ Lavale¹ya vageta mo faeteta Polo¹a tagai¹ene
Yemesi agegahe ne¹unage¹ya muki¹a soka
vaya¹yaga anile emainae.

¹⁹ Ageno Polo¹a “Mainafio.” huno hu falu
fala hune¹amateno Anumaya Koti¹ma aya higeno
Yuta vea omainaya vea¹mogami amu¹nopi ali-
mainea ali¹yafe hamapailama huno hamapaiye.

*Kava vaya¹mo¹ya Polofe “Ala mono nopi vuo.”
hu¹ya hapai-mainae.*

²⁰ Polo¹ma hia kea havite¹ya Anumaya Koti
agia alisaga hu¹ya Polofe mage hu¹ya hae
“Kasago¹ya tauseni¹a vea¹mo¹ya Yisasife havi¹ya
amakupi male¹ya amametiti nehaya Yuta
veapiti Yelusalemu mainaya vea¹mo¹ya Mosese
kahegi kema akave malesaya amaku amakesa
humainae.

²¹ Nehu¹ya kagayama muki¹a Yuta
vea omainaya veapi mainaya Yuta
vaya¹mogamife ‘Mosese kahegi kea ne¹ataletama
nafa¹netamimogami amakoya ano¹ya laga
ohutama nayoma Yuta vaya¹mo¹ya mainaya
au¹ava yana atale ho.’ huka humainana kehenā
hamapaige¹ya ago havimainae.

²² Havimainagi kagayama eva¹yi humainana
kema havinu¹ya hisageta na kava hugahune?

²³ Nago yafe kahapaigahe hunagi kahapaisuna kavala akave huo. Fo'a (4) vayala Anumaya Koti aulagafina hulokiya vai'ya kea humalenaya vayala manile mainae.

²⁴ Mainayanagika muki'a vaya'mo'ya kagaifema ago'ma havimainaya kehema 'Havige nehae.' hu'ya hisayafena kagaife 'Anumaya Koti kahegi kemo akave nemale.' hu'ya hugasayafena ani fo'a (4) vayala amavaleka amakai'enena Anumaya Koti aulagafina oni'ya'age yama omalesia kavala huka kagaika'a monea miya hisanage'ya amayolagefa laga humatesae.

²⁵ Yuta vea omainaya vea'ma Yisasife havi'ya amakupi male'ya amametiti nehaya vea'mogamife tagaya nayona avona kaeta huha'ya gi-malenona kea mage huta humainone 'Fali-mainaya veafe amakisana vai'ya atupa kave alisaga hu'ya malesaya kavela oneho. Kolamo'a agusafinaga hanesia afuene kola'enena oneho. A'ne muna'ne amavayu nehisaya yana ataleho.' huta ago avona kaeta hamapai-mainone." hu'ya humainae.

²⁶ Hageno Polo'a faeteno ani fo'a (4) vayala amavalete'ya amaugafaene amaku'aene sese nehaya kava hute'ya ala mono nopi haigeno Polo'a mono nopi mainaya kava vayafe mage huno humaine "Laugafaene tagu'aene Anumaya Koti aulagafina oni'ya'age otahaisia kava huta sese huteta maineta ma yupa eta tahaote tahaote Anumaya Kotina sipi sipia heta amigahune." huno humaine.

Yuta vaya'mo'ya Polona mono nopi atafa humainae.

²⁷ Ani seveni'a (7) kanamo'a ha'no hugahe nehige'ya nago'a Esiati Yuta vayala elaviya'amo'ya Polo'a ala mono nopi mainege'ya megete'ya muki'a alitalu humainaya vea'mogami amaipa ali haviya hu'ya ali hetimatete'ya Polona atafa humainae.

²⁸ Atafa hute'ya mage hae “Isaleli vaya'mogata laya hiho. Ma kanomo'a muki'a kumate vaya'mogamina mage huno humave-nelie 'Isaleli vaya'ene Mosese kahegi kene mono no'amiene afa ya'yaga hane.’ huno nehuno nago'a Yuta vea omainaya vayala Kaliki kotegati vayala ma ma nagalu humalenea nopina amavaleno ege'ya mani nona ali haviya nehageno oni'ya'age nehie.” hu'ya humainae.

²⁹ Na'afene nago yupa Polo'a Talofimusi'ene ala kumapi vaiyateti neha'age'ya age-mainayanagi'ya Talofimusi'a Efesusiti kano maineanagi'ya amakesafinaga havige nehu'ya “Polo'a ani Yuta vea omainea kanoa tagaila ala mono notifi avaleno haimaine.” hu'ya havige humainae.

³⁰ Hage'ya muki'a ani kumate vea'mo'ya ani kema haviya kemo'a amaipa ali hetige'ya amaiyaye'ya molitalu hute'ya Polona atafa hu'ya mono nopinagatila avayu vaye nehage'ya ani mono nomo fitayaga muki'a ali'ya kimainae.

Lomu ati vaya'mo'ya Polona Yuta vaya'mogami amayapiti movale'ya emainae.

³¹ Polona ago mai'ya nehayageno Lomu ati vayate kava kanomo'a muki'a Yelusalemu vea'moya ke vai'ya tusi'a lu mai'ya nehae hu'ya haya kea havimaine.

³² Haviteno ati kava vaya'aene ati vaya'yagaene amavalege'ya amaiyaye'ya amakaite elavi'ya age'ya ani vaya'mo'ya ala kava kanoene ati vaya'aene age'ya agete'ya Polona nago'ene ohae'ya atale'ya mainae.

³³ Atale'ya mainageno ati vayate kava kanomo'a Polona metafa huno "Tole seni nofiteti aiya ayate kisalu kiho." huno nehuno alitalu humainaya vayafe mage huno hamavige "Mani kanoa ta'e? Hana augafa havi kava higetama ani kavala nehae?" huno hamavige-mainae.

³⁴ Hamavigege'ya nago'a vaya'mo'ya nago'a kea nehage'ya nago'a vaya'mo'ya alu kea nehage'ya mai'ya tusi'a keyeso haya kemona aepa'a havilama ohuno ati vaya'mogamife mage hie "Lagaiti lokiya'age nopinaga avaletama viho." huno humaine.

³⁵⁻³⁶ Hige'ya muki'a vea'mo'ya amakave keyeso hume hume ne'u'ya mage hae "Haesageno falisie." hu'ya hume hume ne'vage'ya ani nomo fiate avale'ya vage'ya muki'a vaya'mo'ya tusiya hu'ya tu hisaya kava hayakehe ati vaya'mo'ya Polona avalesaga hu'ya anale avaleli'ya umainae.

Polo'a agai'a ametiti yamo aepa'a hu falote huno hamapaimaine.

37 Ati v¹aya¹mo¹ya tokiya¹age nopinaga avale¹ya haigahe nehageno Polo¹a ati vayate kava kanomofe mage huno humaine “Nago kea kahapaigahe nehuana kanalepio?” huno havigegen^o ati vayate kava kanomo¹a mage hie “Kagaya Kaliki kea havilinano?”

38 Kagaya Isipiti kanogika muki¹a vayafena ‘Kamani v¹aya¹ene tu hugahune.’ huka huteka tu huge huge nehaya vayala fo tauseni¹a (4,000) vayala ka¹me kotega amavaleka umainana kano mainane hu¹na nagesa nehavugi kagaya ani kano mainapio?” huno havige.

39 Higeno Polo¹a mage huno humaine “Nagaya Yuta kano mainoe. Silisia kotega agi hanea kumala Tasusie kuma aepa¹nia hane. Museka nehugi nagaya alitalu humainaya vea¹mogamina nago kea hamapaisufio?” huno havige-maine.

40 Havigegen^o “Kanalelagi hamapaiyo.” huno higeno Polo¹a ani nomo fiate heti-maineno kema aepa hegahena “Afa¹a maiho.” huno ayana alisaga hige¹ya alitalu humainaya v¹aya¹mo¹ya kea ohu¹ya mainageno Polo¹a amakai¹ami kea Hipalu kefiti Yuta v¹aya¹mogamina hamapai-maine.

22

1 Polo¹a ati v¹aya¹mogami tokiya nomo fiate heti-maineno mage huno hamapaiye “Nafu¹naganagatamaene nenafagatamaene haviho nagaya havi kavala ohunoa ke lamahapaigahe hugi haviho.” huno hie.

2 Hige'ya Yuta vaya'mo'ya amakai'ami kea Hipalu kefiti hia kea havite'ya ke ohu'ya mainageno hamapaiye.

3 Nagaya Yuta kano mainoe. Ita'nimo'a natenea kumala ala kola Silisiae osi kuma'nia Tasusie nateneanagi'na manima mainona kumate Yelusalemu emaine'na ala hu'na Kamalieli'a muki'a taginago-vanagomogami kahegi kemo aepa'a hunavelige'na havimainoanagitama tamakaya meni kanafima Anumaya Koti kema akave malaya kava hu'na tusiya hu'na nagula amitafa humainoane.

4 Nagaya nayona Yisasi akave nehaya veala tusiya hu'na ali haviya humatete'na hamae'na fali-mategahe vene'nene a'nene amatafa hu'na nofiteti kimalu kimatete'na nofipi amavale'na amatenoane.

5 Ani kava'ma humainoa kea ala mono nopi uhagote mainea kava kanoene Kanisole vaya'ene age-mainayanagi'ya tamahapaigahae. Ani vaya'mo'ya nago auta'ma kae'ya namite'ya "Tamasigusi mainaya tafu-taganagamitega alika vuo." hu'ya hage'na ali'na mage hu'na hue "Yisasi akave ne'vaya vayala Tamasigusi momatafa hu'na nofiteti kimalu kimatete'na amakata aisia ya alisaya yafe Yelusalemu amavale'na egahue." hu'na humainoane.

Polo'a agai'ama Yisasina agu'a aminea yamo aepa'a hamapai-maine.

6 Yagemo'a amu'noka'no hige'na Tamasigusi uva'yi hugahe hugeno aupala ikapinagatila tusi'a hale yamo nagaitela meyevasa humaine.

7 Meyevasa hige'na mopafi asaga hu-lavite'na havugeno nagola ala kefiti mage huno hie “Sologae Sologae na'a hige'ka nagaila ali haviya hunenatane?” huno humaine.

8 Hige'na kenona'a mage hu'na hue “Alamogae kagaya tagae?” hu'na hugeno nagaifena mage hie “Nagaya Nasaleti Yisasi'nae. Nagaila maika ali haviya hunenatane.” huno humaine.

9 Hige'ya nagai'enema mainaya vaya'mo'ya hale yama'a agayanagi nagaila kema nahapaiya agea ohavinae.

10 Ohavinagi nagaya mage hue “Alamogae na'a hisue?” hu'na havigogeno mage huno hie “Hetika Tamasigusi ugeno'o. Visanageno'a muki'a ali'yama alisana kea nago kanomo'a kahapaigahie.” huno nahapaiye.

11 Nahapaige'na nehavugeno hale yama'amo'a tusiya huno aye vasa higeno'agino naulaga o'agoge'ya nagai'enema umainona vaya'mo'ya nayate aligeta Tamasigusia umainone.

12 Unana nago kanomo' agia Ananaiyasi'e anile nemaiyanagino tusiya huno Anumaya Koti kahegi kea akave nemalea kanogi'ya muki'a ani kumate'ma mainaya Yuta vea'mo'ya “Kanale kano maine.” hu'ya agia alisaga nehaiya kanoe.

13 Ani kanoa Ananaiyasi'e nagaila navate me heti-maineno mage huno humaine “Pologa nenafugae kaulagamo'a eteno aigali hisie.” huno

higeno naulagamo¹a aigali hige¹na anile aupa¹a ani kanoa age-mainoe.

14 Ne¹agogeno Ananaiyasi¹a nagaifena mage huno nahapaiye “Taginagomo¹ya agima alisaga humainaya Anumaya Koti¹a agai¹a haiya yafema havisana yafe¹ene Fatagoma Humainea Kanomoma ageteka agai avayafiti kema havisanafene huno kagaila hapali-maine.

15 Hapali-maineanagika agaifena huhaleka hamanepaika age-mainana yafe¹ene havimainana yafe¹ene muki¹a vaya¹mogamina hamapaigane.

16 Na¹a hige¹ka agava mainane? Hetika uge¹ya Yisasi agile tina falegatesageno Anumaya Koti¹a kefo yaka¹a aye ha¹mi-taleno.” huno humaine.

Anumayamo¹a Polona Yuta vea omainaya veapi mono kea mo huhalesiafene huno hutene.

17 Hige¹na nagaya ete¹na Yelusalemu emaine¹na ala mono nopi hai¹na Anumayamotega havinege¹na nagola himona kana yana age-mainoe.

18 Agoana Yisasina agogeno nagaifena mage huno humaine “Male mainaya vea¹mo¹ya nagaifema hisana kehena ‘Tamage nehane.’ hu¹ya ohavigahagi Yelusalemua ne¹ataleka kaiyayeka alu kumate vuo.” huno humaine.

19 Hige¹na nagaya mage hue “Anumayanimo-gae nagaya muki¹a Yuta vea¹mogami mono nopi falege falege hu¹na kagaifema havi¹ya amakupi

malenaya veala amavale¹na kina nopi mo humatete¹na ka¹yona ne¹amami¹na humainoa kea mani vaya¹mo¹ya ago havilinae.

²⁰ Havilinagi Sitiveni¹a kagaifema hamane¹paiya kanoma hayageno¹ma falige¹na nagaya avate heti-maine¹na ‘Kanale kava nehae.’ hu¹na hayaya vaya¹mogamina kena¹amile yagai¹na mainoge¹ya hayageno fali-maine.” huno hamapaiye.

²¹ Hige¹ya Anumayamo¹a nagaifena mage huno humaine “Hetika vuo. Nagaya hugatesugeka aya¹aya kotega Yuta vea¹ne omainaya veapi hugategahue.” huno hige¹na havimainoe huno humaine.

Polo¹a “Nagaya Lomu kano mainoe.” huno ati vayala hamapaimaine.

²² “Yuta vea omainaya veapi ugahuema.” hia keleti amaipa haviya nehu¹ya ala kegefafiti Polofena mage hu¹ya hae “Haegenofalino. Na¹a augafa kanomo¹a afa¹a omaigahigi ago haegenofalino.” hu¹ya humainae.

²³⁻²⁴ Ala kenake nehu¹ya siota¹amia asagi ne¹atale¹ya kugukege¹ya kate¹ya haga¹yu hu ne¹atageno ati vayate ala kava kanomo¹a mage hie “Hailagi ataleho.” nehuno ati vaya¹mogamife “Tokiya notifi Polona avaletama haiho. Vaya¹yagamo¹ya ala kefiti¹ma Polona ‘Haegenofalino.’ hu¹ya haya kemona aepa¹ama havisuafe hegi ka¹loteti Polona aikolisageno ani kemona aepa¹a tahapaisie.” huno humaine.

25 Hige'ya avale'ya hegi ka'yoteti haegahe nofiteti kine'atageno Polo'a ani ali'yate kava ne'yagaiya ati kanomofena mage huno havige “Lomu kahegi kemo'a ‘Kanalelagi Lomu nofi kanomona* kaiyeke'a havitama fatago hutama kaiyekea huo'atenetama hegi ka'yotetila haeho.’ huno humaine?” huno hamavige-maine.

26 Higeno ati vayate'ma kava ne'yagaiya kanomo'a anima hia kea haviteno anile ataleneno ala kava kanomote mage huno mo hie “Kagaya hana'a hugane? Mani kanoa fatago huno Lomu nofi kano* maine.” huno hapaiye.

27 Higeno ati vayate ala kava kanomo'a Polote eno mage huno havige “Kagaya Lomu nofi kano mainano?” huno havigeveno Polo'a “E.” huno humaine.

28 Higeno ati vayate ala kava kanomo'a mage hie “Nagaya kamani vayala kasago'ya mone'ni'a miyana amamite'na Lomu nofi kano hapae-mainoe.” huno higeno Polo'a mage hie “Kagaya ani'a humainanagi nagaya ita'ni'mo'a natege'na Lomu nofi kano fatago hu'na mainoe.” huno humaine.

29 Hige'ya hegi ka'yoteti amigahema haya vaya'mo'ya ani kea havite'ya anile aupa'a ne'atale'ya vageno ati vayate ala kava kanomo'a havigeno “Polo'a Lomu nofi kano fatago huno mainege'na nofila huteno.” huno tusi yate kolia humaine.

Polo'a Yuta kanisole vaya'mogami amaulagale kaiyekea huhaleno humaine.

30 Kolia nehuno mo faeteno egamaga Yuta vaya'mo'yama Polofe “Ma kava humaine.” hu'ya humainaya kemona aepa'a havigahe ayapiti nofila kalu hene'ateno ala mono note kava vaya'ene muki'a Yuta vaya'mogami Kanisole vaya'enefe “Melitalu hiho.” huno hige'ya melitalu humaletageno Polona avaleno elavino amu'no'amifi me hetitene.

23

1 Polo'a Kanisole vaya amaulagafi agesagali-maineno mage huno humaine “Nafu'naganagatamae nagaya kanale ka vai ne'aye'na muki'a kanafi'ene meni kanafi'ene Anumaya Koti aulagafina nagu'amo'a nagola havi kavala ohune hu'na nehue.” huno humaine.

2 Higeno mono note'ma uhagote mainea kava kanomo agia Ananaiyasi'e avate'ma heti'ya maiya vayafena mage hie “Avayale ka'yo aikoliho.” huno humaine.

3 Higeno Polo'a agaifena mage huno hapaiye “Kagaya nagaifena 'Haeho.' huka nehananagi Anumaya Koti'a kagaila kahaegahie. Kagaya haviya hia kegi'yamo agupile efe peni falemalenea kana augafa kava nehuka kagu'afina havi omaleka amegati savale kanomogae. Kagaya kahegi kefiti kaiyeke hunategahe nehuka 'Haeho' huka nehananagi ani kea ali ne'atagayane.” huno humaine.

4 Huno hige'ya Polo avate heti'ya mainaya vaya'mo'ya mage hae “Kagaya Anumaya Koti

mono note uhagote mainea kava kanomofena kanale ohunea kea nehano?" hu'ya humainae.

⁵ Hageno Polo'a mage hie "Nafu'naganagatama musetami nehugi nagaya havi kava hue. Agayama mono note hagote kava kano maine kema havimainole'asina mani kea ohule'asinagi. Anumaya Koti auta'mafina mage huno kae-maleneane 'Kava kanotamimofena kanale ohunesia kea ohiho.' hu'ya kae-maleneage'na age-mainoane." huno nehie.

⁶ Huteno Polo'a haviana nago'a Kanisole vayala Satusi* vayalagi nago'a Kanisole vayala Falasia vayalagi hu'ya mainageno haviafene huno mage huno hamapaiye "Nagaya Falasia kanogi'na nenafa'a Falasia kanomo nate-neanagi'na nagaya 'Fali-mainaya vayala hetigahae.' hu'na nametiti nehua yateti kaiyekea hunategahe nehae." huno humaine.

⁷ Mani kema hige'ya havite'ya Falasia vaya'ene Satusi vaya'ene amu'no'amifi tusi'a ke vaite'ya ani Kanisolefitila tolefi ali fako faka humainae.

⁸ Na'afene? Satusi vaya'mo'ya mage hu'ya nehae "Vaya'yagama fali-mainesafitila he'otigahae." hu'ya nehu'ya "Ensole vaya'ene avamu'ene omainae." hu'ya nehayangiya Falasia vaya'mo'ya ani ya'yagahena "Lamage mainae." hu'ya nehayane.

⁹ Anileti ala kefiti tusi'a ke ne'vai'ya nago'a Falasia vayapiti nago'a kahegi kema havilinaya vaya'mo'ya heti'ya mage hae "Ma kanoma agonana havi kava'ma nehia yana omalene. Ensole kanofi avamu'mo'afi hapai-mainesia kea havigu

Anumaya Koti'ene tu huyafenagita afa'a atalesune.” hu'ya humainae.

¹⁰ Nehage'ya kasago'ya kema vaiya yateti ati vayate ala kava kanomo'a Polona aluga alugati avayu hisalega amu'nopiti aiya aya ali akalupeyafene huno ati vaya'mogamife “Lavitama amu'no'amifiti Polona avalesaga hutama tokiya'age notifinaga avaletama moteho.” huno hige'ya movale'ya umainae.

¹¹ Ani kegela Anumayamo'a Polo avate me hetimaineno Polofe mage huno hapaiye “Kolia ohuka kagu kamena ali lokiya vaika maiyo. Kagaya Yelusalemuma maineka nagaifema hamapai-mainana kava huka Lomua mo huhaleka hama-paigane.” huno humaine.

Yuta vaya'mo'ya ke huhayagi'ya “Polona haesunageno faligahie.” hu'ya humainae.

¹² Faete'ya ko'ma neliana nago'a Yuta vaya'mo'ya alitalu hu'ya mage hae “Polona haesunageno falisie. Anumaya Koti aulagafina tamagelafa nehune menia ti'ene kave'ene mosita maineta falisia yupa hataka huta negahune. Haesunageno'ma ofalisiana Anumaya Koti'a ali-haviya hulatesie hu'ya hulokiya vai-mainae.”

¹³ Ani kema hulokiya vai-mainaya vayala foti'a (40) vaya'mo'ya humainae.

¹⁴ Ani vaya'yagamo'ya mono note kava vayate'ene soka vayate'ene u'ya mage hu'ya mo hamapaiye “Lagaya Polona haesunageno falisie

huta menia ti'ene kave'ene mosita maineta falisia yupa hataka huta negahune huta Anumaya Koti aufina hulokiya ne'vaune.

15 Ne'vaunafe menia tamakayaene Kanisole vava'ene ati vayate kava kanomofe ke hutama mage hutama hiho 'Kaiyeke hutegahunagi Polona tagaite avaletama eho.' hutama hige'ya yaufa tamakaitega eva'yi ohune'ya katega avale'ya ne'esageta hayamano." hu'ya humainae.

16 Hageno Polona asa'amo nafa'nemo'a ani kea haviteno ati vava'mogami nopinaga haino Polona hapai-maine.

17 Hapaigeno Polo'a nago'a ati vayate kava kanomofena ke higeno egeno mage huno hapaiye "Ma nafa'nea muki'a ati vayate kava kanomotega avaleka visanageno nago ke hapaisie hu'na nehue." huno humaine.

18 Hapaigeno muki'a ati vayate kava kanomote avaleno vigeno mage huno mo hie "Nofipi kanoa, Polo'a, ke hige'na ugeno 'Ma nafa'nehe nago ke kahapaigahigi kagaitefe avaleka vuo.' huno hige'na avale'na ene'oe." huno hapai-maine.

19 Hapaigeno muki'a ati vayate kava kanomo'a ani nafa'nea ayate alilino avaleno agegayalega anakai'anige umaine'ana mage huno havige "Na'ane ke nahapaigahe emainane?" huno havige.

20 Havigegeni ani nafa'nemo'a mage huno hapaiye "Yuta vava'mo'ya ke hu'ya ha'ya kite'ya kagaifena mage hu'ya kahavi-gegahe nehae 'Ega Polona Kanisolete avaleka esanageta nago'ene

kemo aepa¹a havisune.’ hu¹ya kahavi-gegahe nehae.

²¹ Hu¹ya hugahagi amakai kea havika akave omalo. Ani vayapiti foti¹a (40) vaya¹ene nago¹a vaya¹ene Polona haekahe kafo malene¹ya mage hu¹ya hae ‘Menia ti¹ene kave¹ene mosita maineta falisia yupa hataka huta negahune. Haesunageno ofalisigeno¹a Anumaya Koti¹a ali-haviya hulate-sie.’ hu¹ya Anumaya Koti aulagafina hulokiya vaite¹ya menima kagaya avalekama visanafene hu¹ya kagava mainae.” huno humaine.

²² Higeno muki¹a ati vayate kava kanomo¹a ani nafa¹nemofena mage huno hapaiye “Manima nagai¹ma hufalote huka nahapaina kea nago¹a vayala hama¹opaiyo. Nagi kagaya nagaitegatila ago vuo.” huno hutegenomaine.

Polona hutegenomaine ala kava kanoa Filikisitega umaine.

²³ Tole kanolatana ati vayate kava yagai-maina¹a kanolatafe ke hige¹ana a¹ageno mage huno hanapaiye “Talo tala hutana meni kegela naeni (9) kiloki tu hataleti¹a (200) ati vaya¹ene seveti¹a (70) hosi agupifi ne¹vaya ati vaya¹ene tu hataleti¹a (200) keve nehaya ati vaya¹ene Sisalia ugahae.

²⁴ Polo¹ma maino visia hosi afuene talo tala hutetana aluya hutana kava yagaitana Polona ftago hutana avaletana ala Kamani kava kanomo ayapi mote¹o. Ani kanomo agia Filikisi¹e.” huno humaine.

²⁵⁻²⁶ Huteno avona kaeno mage huno humaine “Nagaila nagia Kolotiusi Lisiasi¹nae tusi kanale

Kamani kava kanomoga Filikisigale mani avona kae'na hu falu fala hunegatoe.

²⁷ Yuta vaya'mo'ya mani kanomona atafa hu'ya hae falisaya kava hayanagi agaya Lomu kanoma mainea ke havite'na ati vaya'niene ani vaya'mogami amayapitila mo-vale-mainoe.

²⁸ Kaiyeke hutesaya kemo aepa'a havigahe Kanisole vaya'amile avale'na lavimainoe.

²⁹ Avale'na lavi-maine'na havuana amakai'ami 'Kahegi kea atagae-maine.' hu'ya hayanagi falisia augafa havi kavala ohune. Nofi hutesua augafa kefo ya'enena tamage huno ohune.

³⁰ Ohunegi nago kema havuana nago'a vaya'mo'ya 'Kesi falakita haesunageno falisie.' hu'ya haya ke me nahapaige'na havite'na aupa'a kagaitega hutogeno vie. Vigi kaiyekema hutesaya vaya'mo'ya kagaitega mo hufalote hu'ya hu fatago hisageka havisane hu'na hamapauge'ya ne'vae. Ke'nia male ha'no hie nagai'ni nagia Kolotiusi Lisiasi'nae." huno avopina kae-malene.

³¹ Ati vaya'mo'ya kava kanomo ke akave male'ya kege Polona avale'ya Atipatalisi kumate umainae.

³² Mo faete'ya nago'a ati vaya'mo'ya ete'ya age'ya hosimo agupifi nemaiya ati vaya'mo'ya Polona avale'ya umainae.

³³ Sisalia uva'yi hu'ya ani avona ala Kamani kava kanomona mo-mite'ya Polona agai aule avale'ya mo hetitena.

³⁴ Mo heti-mainegenoa ala Kamani kava kanomo'a ani auta'ma alino hapalino haviteno

Polona mage huno havige “Kagaya hana kotega kano mainane?” huno higeno “Silisia kano mainoe.” huno humaine.

³⁵ Higeno haviteno mage huno hie “Kaiyekema hugatesaya vaya'ma eva'yi hisage'na kaiyekeka'a havigahue.” huno nehuno ati vayafe “Heloti'ma kimalenea Kamani nopi avaletama kava mo yagaiteno maino.” huno humaine.

24

Yuta kava vaya'mo'ya Filikisi aule Polona kaiyeke hutena.

¹ Faefu'a (5) kanamo'a ha'no hige'ya mono nopi hagote kava kanomo'a Ananaiyasi'ene nago'a vayatamaene nagola ke havino fatago nehia kanoa Tetulusi'ene Sisalia elavi'ya emaine'ya Polona kaiyekema hutegahe haya kea ala Kamani kava kanomona hapaiminae.

²⁻³ Hapaigeno haviteno Polofe ke higeno egeno Tetulusi'a aepa heno Polona kaiyekea hune'ateno mage huno hie “Kanale Kamani kava kanomoga Filikisigae kagayama kava yagai-mainanafena tagaya kanale'ya huta yuna heta mainonageka kasago'ya kanale kavake'ya huka kasago'ya kumate'ma laya hisana kea hanageta aluya huta museka'a humainonane.

⁴ Nago'a kene hugahe huanagi amuseka'a nehunagi menima kahapaisuna kea osi kea havio.

⁵ Tagayama agonana ma kanoa Polo'e tusi'a havi kava'yaga nehuno muki'a kumate Yuta vea'mogami amu'no'amifina hetino ke vaino tu

hisaya ke hamanepaino Nasaleti Yisasi kema nehaviya vea'mogami ala kano'ami maine.

⁶⁻⁷ Maineno tagaiti ala mono nopi hilato ohunea kava hugahe hianagi mo-tafa huta tagaiti kahegi keleti kaiyekea hutegahe hunanagi ati vayate ala kava kanoa Lisiasi'a eno tokiya'aleti tayapiti mevaleno umaine.

⁸ Avaleno emainegi kagaya havigeteka kaiyekema hutesanana muki'ama humainona kea agai'a avayafiti aepa'a hinageka havigane." huno humaine.

⁹ Hige'ya Yuta vaya'mo'yaenena "Tamage nehie." hu'ya nago'ene Polona kaiyekea hutena.

Polo'a Filikisitela kea huhaleno humaine.

¹⁰ Ala Kamani kava kanomo'a Polofe "Kaiyeke huo." huno ayateti avame'name higeno Polo'a mage huno humaine kagaya aya'aya kafufima ani nofi vayatela kaiyekema humatenana yafena havi'na kolia nohue. Naipa kanale yapiti kenonakalela kahapaisue.

¹¹ Hama-vigesanana kahapaisageka havigane nagaya aya'aya kanagefa Yelusalemua hai'na omainogi tuelufu'a (12) kana kano'a Anumaya Koti agi alisaga hugahe Yelusalemua hai'na mainoe.

¹² Hai'nama mauvana nagaya ala mono nopi maine'na nago'a vaya'enena kea o'vainoe. "Nagaitela veala melitalu hiho." hu'na ohunoe. Mono no'yagafi'ene ala kumapi'enena ani kavala huge'ya onagenae.

¹³ Onagenagi menia kaiyekema hunenataya ke-mona ma vaya'mo'ya “Tamage nehune. Age-mainonanagita aepa'a kahapaigahune.” hu'ya hisaya ke'amia omalege'ya nehae.

¹⁴ Nehagi nago yafe kea hu-falote hu'na kahapaisue. Amakayama “Alu kategae.” hu'ya nehaya kama, Yisasi kema nehaviya vea'mo'ya akave nehaya kana, taginagomo'ya ne'vaya kate ne'u'na Anumaya Koti agia alisaga nehu'na muki'a kahegi kene Anumaya Koti amaune vaya'mogami kene havi'na nagupi malenoe.

¹⁵ Nagupi malenogi amakayama haya kea “Anumaya Koti'a fatago hu'ya maine'ya falimainesaya vea'nene kefo kava hute'ya falimainesaya vea'nene ali hetimategahie.” hu'na nametitia nehue.

¹⁶ Ani yafe Anumaya Koti aulagale'ene vea'mogami amaulagale'ene hilato ohunea kavala ohu'na fatago hu'na maisua yafe kava yagai'na nemaouvane.

¹⁷ Mainoanagi'na aya'aya kafua alule mainoanagi menia Yuta nafu'naganagamina nago'a mone amamisua'fene hu'na Anumaya Koti muse ya'ene amigahe Yelusalemua hai-mainoe.

¹⁸ Naugafaene nagu'aene sese hute'na ala mono nopi hai'na amite'na mainoge'ya nage-mainae. Nagai'enena nago'a vayala me-litalu hu'ya keyesoa ohage'na mainoe.

¹⁹ Mauvanagi nago'a Esiati Yuta vaya'mo'ya e'ya me nage-mainae. Amakayake nagaifena “Havi kava nehie.” hu'ya humainaya ke kagai

kaulagale me hunateho.

²⁰ Omesage^lyahena ma ma mainaya vaya^lmo^lya nagayama Kanisole vaya amaule^lma heti-mainoa yupa “Havi kava humaine.” hu^lya humainesaya yafena me kahapaiho.

²¹ Kahapaigahagi nagaya ma yama^lage amakai amu^lno^lamifina heti^lna humainoe “Vea^lma falimainesafitila hetigahae.” hu^lna humainoa keleti meni kanafina kaiyekea hu-nenatae huno humaine.

²² Higeno Filikisi^la Yisasi kema nehaviya vea^lmo^lya haya kea havimaineanagino mage huno hie “Haile. Ati vayate ala kava kanoa Lisiasi^la elavino esige^lna kaiyeketamia fatago hulamategahue.” huno humaine.

²³ Huteno ati vayate kava ne^lyagaiya kanomofe ke higeno egeno mage hie “Polona avaleka nofi nopina mo hutegananagi tokiya^lage huka nofila hu o^lateka atalenege^lya nefu^lya kavela afa^la memi^lya aya hisae.” huno humaine.

Filikisi^la Polona tole kafu nofila hutene.

²⁴ Nago^la kanamo^la ha^lno hutegeno Filikisi^lene a^lamo^la Yuta ale agia Talusila^lene a^lageno Filikisi^la Polofe ke higeno eno Yisasi Kalaisife havi^lya amakupima male^lya amametiti nehaya kea mehanapai-mainae.

²⁵ Mage huno hanapaiye “Fatago hutana mainetana tanaku tanakesale kava yagai hetofa hutana mai^lo.” Anumaya Koti^la haenagama kaiyeke humatesia ke nehigeno Filikisi^la koli nehuno mage huno humaine “Haile. Menia

nenataleka eteka vuo. Haenaga ali'yani'a omalesige'na nago'ene keka'a havigahue." huno humaine.

²⁶ Nehuno agesa mage huno havie "Poloma atalesugeno'a nago'a mone namisifi?" huno agesa nehavino muki'a yupa agaifena ke higeno ege'ana kaiyekea hu'ana maina'e.

²⁷ Hume ne'a'ageno tole kafumo'a ha'no hutegeni Filikisi ali'yate'ma anona'a alimainea kava kanomo agia Polisiusi Fesatusi'e. Filikisi'a masave age'aino "Yuta vaya'mogamina hamaisia kava hugahue." huno Polona nago'ene nofi nopina atalegeno maine.

25

Polo'a "Ala Kamani kanoa Sisafe ke'nia havisie." huno ke humaine.

¹ Fesatusi'a yagaisia kotega ago eva'yi huno tagufa (3) kana maiteno Sisaliati Yelusalemu haimaine.

²⁻³ Haige'ya mono note kava vaya'ene Yuta kava vaya'ene Polofena "Havi kava humaine." hu'ya hapaite'ya mage hae "Museka'a nehunagi taya huka Polona hutegeni Yelusalemu eno." hu'ya humainae. Amakaya katega kafo malene'ya haesageno falisia amakesaleti humainae.

⁴⁻⁵ Hageno Fesatusi'a mage huno humaine "Polo'a Sisalia nofi nopi mainege'na nagaya osi kana kano'a maite'na anilega ugahe nehugi tamakaitami kava vaya'mogatama nagai'ene tavi-mainetama agaya havi kava'ma humaine-siana kaiyekea mo hutegahae." huno humaine.

⁶ Fesatusi'a eiti'a (8) kanao teni'a (10) kanafiga Yelusalemua maiteno eteno Sisalia lavino faeteno ko'ma neliana kaiyekema havi nopi umaineno mage hie “Polona avaletama eho.” huno humaine.

⁷ Kema higeno ege'ya Yelusalemuti emainaya Yuta vaya'mo'ya ava'ale maigagi maine'ya “Tusi'a havi kava humaine.” hu'ya kaiyekea hutayanagi nago'a aepa'a tamage hu'ya hu falote hu'ya haopinae.

⁸ Haopaigeno Polo'a mage huno hie “Nagaya nago'a Yuta vea'mogami kahegi kene ala mono nopi'enena Lomu ala kava kanao Sisa'ene ali-haviyana huo'atenoe. Tamage hu'na nago kanomona havi kavala huo'atenoe.” huno humaine.

⁹ Hianagi Fesatusi'a masave age aino “Yuta vaya'mogamina hamaisifa kava hugahue.” huno Polofena mage huno havige-maine “Kagaya kanale Yelusalemu haisanage'na anilega hai'na kaiyekeka'a havi'na fatago hugatesufio?” huno havige-maine.

¹⁰ Higeno Polo'a mage huno hie “Menima Sisa'a kaiyeke nehavia nopi heti-mainesugeka anile kaiyeke'nia havite'asine hu'na nehue. Kagaya ago havilinane nagaya Yuta vayapina nago kanomona havi kavala huo'atenoe.

¹¹ Nahaesage'na falisua kefo kava'ma humainole'asina kanalelagi'na falule'asinagi manima hunataya kaiyekemo'a tamage huno aepa'ama omalesigekahena amayapina onateganagi ala

kanoa Sisa ayapi natesanageno ani kaiyekea hunatesie hu'na nehue.” huno humaine.

¹² Higeno Fesatusi'a agai'a Kanisole vaya'ene kea kea huteno mage hie “Sisa'a kaiyekea hunatesie huka hanafe Sisatega ugane.” huno humaine.

Fesatusi'a Polofe Yuta vaya'mogami ala sauve kano'amia Agalipana havige-maine.

¹³ Nago'a kanamo'a ha'no hutegenoa ala sauve kanoa Agalipa'ene asa'amo'a Peniasi'ene Fesatusina hu falu fala hutegahe Sisalia eva'yi humaina'e.

¹⁴ Eva'yi hute'ana aya'aya kanagefa maina'ageno Fesatusi'a Polo kaiyekea sauve kanoa Agalipana hanepaino mage huno hie “Filikisi'ma mainea kanafina nago kanoa nofi nopi mainegenoa Filikisi'a anifi ataleno umaine.

¹⁵ Umaineaganagi'na Yelusalemu hai'na mainoge'ya mono note kava vaya'ene Yuta kava vaya'ene agaifena nahapai'ya ‘Kaiyekea huteteka hanageke yana amio.’ hu'ya humainae.

¹⁶ Hage'na mage humainoe ‘Tagaya Lomu vaya'mogata ma au'ava kava nehunane. Nago kanomo'a kaiyeke hutesia vayala amaule mainesage'ya kaiyekea hutetesageno anona'amile ‘Kagaya kaiyekema hugataya kea huo.’ huta hagoteta hisunageno hinageta haviteta fatago hugahune huta humainonane.’ hu'na hamapai-mainoe.

17 Hige¹ya male melitalu hu¹ya mainage¹na faete¹na aupala kaiyeke humate nopi u¹na ‘Polona avaletama eho.’ hu¹na humainoe.

18 Hige¹ya kaiyekema hutaya vayala heti¹ya aepa he¹ya agaila kaiyekea hutayanagi ‘Na¹a kefo kavala humaine.’ hu¹na nagesama havua kefo kavafena ohunae.

19 Ohunagi amakai¹ami mono¹amiheke¹ya agai¹enena ke ne¹vai¹ya nagola fali-mainea kanoa, Yisasi¹e, kanomofe, Polo¹a ‘Ani kanoa afa¹a hetino maine.’ huno hige¹ya ke vai-mainae.

20 Hige¹na ‘Hana¹a hu¹na ani kemo aepa¹a havi¹na fatago hisue?’ hu¹na hute¹na mage hu¹na havige-mainoe ‘Kanale Yelusalemua haisanage¹na kaiyekeka¹a havite¹na fatago hugatesufio?’ hu¹na havige-mainoe.

21 Havigogeno Polo¹a ‘Mainesugeno ala kava kanomo¹a kaiyeke¹nia havisie.’ huno hige¹na ‘Kanalelagi nofi nopi atesugeno mainesige¹na Sisate hutegahue.’ hu¹na humainoe.” huno hie.

22 Higeno Agalipa¹a Fesatusife mage huno humaine “Nagaya ani kanomo kea havigahue.” huno higeno “Kanalelagi egamaga ke¹a havigane.” huno humaine.

23 Hige¹ya mo faete¹ya kotige¹ya Agalipagani Penaisigania kanale konagali kena faite¹ana kaiyeke havi nopi va¹age¹ya ati vayate kava vaya¹mo¹yaene ani kumate kava vaya¹mo¹yaene tokae¹ya ani nopi hai-mainageno Fesatusi¹a Polofe ke hige¹ya avale¹ya emainae.

24 Ageno Fesatusi¹a mage huno humaine “Ala

Sauve kanomoga, Agalipagaene muki¹a melitalu humainaya vaya¹ene haviho. Ma ma agaya kanomofe muki¹a Yuta vaya¹mo¹ya Yelusalemuene ma kumate¹ene maine¹ya tokiya¹age kefiti mage hu¹ya nahapaiye ‘Mani kanoa kaiyeke huteka haegeno falino.’ hu¹ya ala kefiti humainae.

²⁵ Hage¹na nagayama agoana mani kanomo¹a nagola falisia kefo kavala ohune hu¹na hugeno Polo¹a ‘Lomu ala Sauve kanomo kaiyeke¹nia havigahie.’ huno hige¹na ‘Kanalelagika ugane.’ hu¹na humainoe.

²⁶ Huanagi ani kanomo¹a falisia kefo kava¹ma humainea kemo¹a omalege¹na ‘Na keleti kaiyekea huto.’ hu¹na ala Sauve kanomotega auta¹ma kaesugeno visia ke¹nia omalege¹na tamakaite avale¹na ne¹ogi ala kava kanomoga Agalipaga mani kanomo kaiyekea havilama huka havisanage¹na avona kae¹na atalesue hu¹na tanakaite avale¹na ne¹oe.

²⁷ Nagaya havuana nofi kanoa hutesugeno vinage¹na kaiyekema hutesaya kema kae¹na o¹amisuana haviya hugahie hu¹na nehue.” huno humaine.

26

Polo¹a agai¹ma kaiyekema hutaya kea huhaleno Agalipana hapai-maine.

¹ Agalipa¹a Polofe mage huno hapaiye “Kagaya keka¹a huo.” huno higeno Polo¹a ayana ha¹ya huno kaiyeke hutea kenona¹a mage huno humaine.

² Agalipaga, ala sauve kanomogae, menia kagai kaule hufalote hu'na Yuta vaya'mo'yama kaiyeke hunatenaya kemo anona'a hisua yafena muse nehue.

³ Yuta vaya'mogatama nehuna kava'ene ke ne'vauna aepa'a kagaya ago age-mainanafene hu'na tusi'a muse nehue. Na'a humainanafe museka'a nehugi kagaite'ma hisua kehena kasalola okahaenageka ako huka maineka havio.

⁴ Nafa'nema mainolegati Silisia mainoanagi'na haenaga'a Yelusalemuma elavi-mainoana ani nofi veamo'ya kama vai-ne'ayoa yana Yuta vea'mo'ya nage-mainae.

⁵ Nayona nagaya Falasia vaya'mogami kahegi kema akave maloge'ya nage-mainaya yafema kahapaisuge'yahena ani kea kahapaigahae.

⁶ Kahapaigahagi nayoma taginago-mogamifema Anumaya Koti'a "Nago yana hulamategahue." huno hulokiya vai-malenea kele'ma nametiti hua yateti menia kaiyekea hunatage'na heti-mainoe.

⁷ Anima hulokiya vai-malenea kelefena muki'a tuelufu'a (12) Yuta nofi vea'mo'ya amameti-tia nate'ene kege'ene ani yama hulatesiafene hu'ya Anumaya Koti agia ayeme ayeme ne'vae. Ne'vage'na Agalipaga, ala sauve kanomogae, nagaya ani'a hu'na nametiti hua yateti Yuta vaya'mo'ya kaiyekea mai'ya hunenatae.

⁸ Na'a higetama nagaya "Anumaya Koti'a fali-mainaya veala ali hetimatene." hu'nama hua kehena "Havige nehie." hutama nehae?

9 Nayona nagaya “Nasaleti Yisasi agia ali'na mopafi atalesugeno lavisie.” hu'na alu kava alu kavala humatenoe.

10 Mono note kava vaya'mo'ya “Na'lama huo.” hu'ya hunatage'na Yelusalemu maine'ya Yisasina amaku'a amitafa humainaya vea'mogamina amavale'na nofi mo humatenoge'ya kaiyekema humataya yupa “Hamaege'ya faliho.” hu'na humainoane.

11 Yisasi vea'mogamina “Kalaisifena kamuge hatagetama vaimateho.” hu'na nehu'na kasago'ya mono nopi ka'yona mo ne'amami'na nahai-vai'na Yuta vea'ne omainaya vaya'mogami kumapina moli-haviya hune'amatoane.

Polo'a agai'a Yisasina agu'a aiyahae huno aminea ke'a humaine.

12 Ani kava hisuafe ala mono note kava vaya'mo'ya hunatage'na Tamasigusi ugahe umainoe.

13 Ala Sauve kanomogae, yagemo'a amu'noka'no hige'na katega nehaugeno ikapinagati tusi'a vasa yamo'a, yagemona agaseno ala yakefa, huno aivasa hige'na age-mainoge'ya nagai'ma navagi hageta hauna vaya'ene aivasa lahau-maine.

14 Higeta lagaya mopafi asaga hu-lavita tago'ya aye-maineta havugeno Yuta vaya'mogami kefiti mage hie “Sologae Sologae na'a hige'ka nagaila ali haviya nehane? Ani'lama hanana avela hanegeno kagaika'a kagata ne'aiye.” huno humaine.

15-16 Hige¹na mage hu¹na hue “Ala kanomogae kagaya lagae?” hu¹na hugeno mage hie “Nagaya Yisasi¹nae ali-haviya maikama hunatana kanomo¹nagi hetio. Kagaila hugatesugeka nagai ali¹yana alika nagai¹ma nagana yafe¹ene haenagama kavelisua yafe¹ene hamapaisanafene hu¹na kagaitela eva¹yi nehue.

17 Nehuafe Yuta vea¹ne omainaya vea¹mogamitega hugategahugi haenagama ali haviya hugatesaya Yuta vayapiti¹ene Yuta vea¹ne omainaya vaya¹mogami amayapiti¹ene kavale¹na kaugafa aligatigahue.

18 Yuta vea¹ne omainaya vea¹mogamina asuma humainea amaulaga alika kaligali humatesanage¹ya haniki-mainea yapima mainaya yana ne¹atale¹ya amaku¹a aiyahae hu¹ya vasa yapi maisaya yafe hunegatoe. Satani kava yagai-mainea yapina ne¹atale¹ya amaku¹a aiyahae hu¹ya Anumaya Koti kava yagai-mainea yapi maisaya yafe hunegatoe. Nagai¹fe havi¹ya amakupi male¹ya amametiti hisage¹na kefo ya¹amia aige¹amate¹na atalematete¹na alu aotage anaga¹niene amavale¹na amatesuge¹ya maisae hu¹na hunegatoe.” huno humaine.

Polo¹a agai¹ama Yisasi kema hamapaino vaiye-mainea kavafe Agalipana hapai-mainie.

19 Agalipaga, ala Sauve kanomogae ani kema hige¹na ikate age-mainoa yafenagi¹na akave malenoe.

20 Hagote¹na Tamasigusi ute¹na anileti Yelusalemua ua¹yamo¹na anileti muki¹a Yutia

kotega ute ete hu'na Yuta vea'ne omainaya veate'ene mage hu'na hamapai-mainoe “Kefo yatamia ne'ataletama tamaku'a aiyahae hutama Anumaya Kotitega etama kanale au'ava yana hisage'ya tamaku'ama aiyahae hisaya yana agesae.” hu'na hamapai-mainoe.

²¹ Mani kema hamapai-mainoa keleti ala mono nopi mainoge'ya Yuta vaya'mo'ya natafa hu'ya nahaesage'na falisua kavala hunatenae.

²² Hunatenagi Anumaya Koti'a muki'a yupa naya hige'na menia heti'na maine'na ala kava vaya'ene osi vaya'enena tamahanepauve. Mosese'ene Anumaya Koti aune vaya'ene “Na'a yana ma'a yana falote hugahie.” hu'ya humainaya ke'age hamapai-mainoe.

²³ Mage hu'ya humainayane “Anumaya Koti'ma taugafa aligatigahema hutenea kanomo'a augafa agata aisigeno faligahie. Fali-mainesifiti muki'a veala amakaseno uhagotelamateno hetiteno hale yama'a hanesia kea Yuta vea'nene Yuta vea'ne omainaya vea'nene hamapaigahie.” hu'ya humainayane huno humaine.

Polo'a Agalipafe “Anumayafena havika kagupi maleka kametiti huo.” huno hapaimaine.

²⁴ Polo'a na ke higeno Fesatusi'a ala kefiti mage huno hie “Pologae aifo'nafo ke maika nehanagi alu avo alu avoma maika nehapalina ya'yagamo aifo'nafo kavala hugatene.” huno humaine.

25 Higeno Polo'a mage huno hie “Fesatusigae, ala kava kanomogae, aifo'nafo kea nohugi kela-mage nehue.

26 Nehugi nagayama hua kemo'a ala Sauve kanomoga Agalipagae havilinanage'na hufalote hu'na nehue. Nagaya havuana muki'a ani kavala falaki'ya ohunagi ani kavala ago age-mainane.

27 Ala Sauve kanomoga, Agalipagae, kagaya Anumaya Koti amaune vaya'mogami kea ago havika kagupi maleka kametiti nehano? E, kagupina ago alika malana yana nagaya ago havilinoe.” huno hapaiye.

28 Higeno Agalipa'a mage huno hie “Menima hana keleti aupa'a nagaya Yisasife havi'na nagupi malegahue huka nehano?” huno humaine.

29 Higeno Polo'a mage huno hie “Aupa kana kano'afi aya'aya kana mainesanano nagaya hua augafa kava huka Yisasife havika kagupi malesanafe Anumayamotega ke hu'na havi-negoe. Kagai feke'ya mani kea nohugi muki'a ma kanale'ma maine'ya nagai kema nehaviya vea'nene'fefe nagaya mainoa augafa kava hu'ya maisae hu'na Anumayamotega havinegogi nofipi maisaya yafena nonahaiye.” huno humaine.

30-31 Hige'ya ala Sauve kanoa Agalipa'ene nago kava kanoa Fesatusi'ene Penaisi'ene amakai'enema mainaya vea'nemo'ya heti'ya alule umaine'ya kea kea mohu mehu hute'ya mage hae “Mani kanomo'a nofila hutete'ya haesageno falisia augafa kefo kavala ohune.”

hu'ya humainae.

³² Hayanagi Agalipa'a Fesatusina mage huno hapaiye “Mani kanoa, Polo'e, ‘Sisa'a kaiyeke'nia havisie.’ huno'ma ohunele'asina ‘Nofipitila atalegeno vino.’ hu'na hule'asine.” huno humaine.

27

Polona Lomu kumate visia tipi kalefi avale'ya atenae.

¹ Polofe “Lomu kumate tipi kalefi ugane.” hu'ya hutel'ya avale'ya nago'a nofipi mainaya vaya'ene amavale'ya ati vayate kava kanomo ayapi amatenae. Ani ati kanomo agia Yuliusi'e. Ani kanoa Sisa'a, Sauve kanomo, ati kano'a maineane.

² Nagaya Luku'nae Alisatakusi'ene Polo'ene umainone. Alisatakusi'a Masetoniati kanoe. Osi kuma'amo agia Tesalonaika kanogino tagai'ene vigeta nago Atalamitiumu kumate tipi kalefi haisaga humaunageno tipi kalemo'a Esia ko'mo haopalega haigahe higeta hai-mainone.

³ Nehaunageno kotigeta ega Saitoni kumate hai va'yi hunageno Yuliusi'a Polona ali kayone hune'ateno “Kanalelagika vayakamogamitega visanage'ya ali kanale hulamatesae.” huno tatalegeta umainone.

⁴ Umaigeta Saitoni kumala ne'ataleta yasimo'a tusiya huno alino halage higeta yasimo'a osi'ma hisiafe nago hagelimo amu'nopi hanea kuma'mo aupate eumainone. Ani kuma'mo agia Saipalusie.

⁵ Hagelipi Silisiaene Pamafilia kuma'ene mo-gaseta Maila euva'yima hunana ani kuma'mona ala agi'a Lisia eumainone.

⁶ Maila mainonageno kava humainea ati kanomo'a nago Alekasatalia tipi kalea ageteno ani tipi kalemo'a Lomu ugahe higeno tavalegeta ani tipi kalefi haisaga humaita eumainone.

⁷ Tipi kalefima unana aiyayeno o'unegi kasago'ya kanagefa hako hako huno vigeno osi yasi kano'a aligeta Nitusi umainone. Yasimo'a osi higeno nagola timo amu'nopi hanea kotega Kaliti ko'mo aupate unana Salamone kumala aupa'ale hane.

⁸ Kaliti limo agegayalega hako hako huta unana nago kuma'mo agia Kanale Ti kahaepatele hu'ya nehaya ti agegayalega euva'yi humainone. Ani agegayalega ala kuma'mo aupate Lasie huno hane.

⁹ Hako huta una yafe aya'aya kanagefa katega ne'unageno Yuta vaya'mo'ya kave monesiya kanamo'a ago falote hianagi timo'a ayamufa aigeno Polo'a ani vayafe mage huno hamapaiye,

¹⁰ “Nagaya nagesa havuana tipi kalefina kasageke huta ne'visunageno afeno'yatiene tipi kalene tagaitiene tusiya huno alihaviya tahaugahie.” huno hamapaiye.

¹¹ Hamapaiyanagi ati vayate kava kanomo'a ani kea havino agupina omaleanagi tipi kalemo ka'yoma'ale'ma ne'alia kanomo kene tipi kalemo nefa kene havino akave malenegi Polo'ma hia kea havino akave omalene.

¹² Akave omalege¹ya ani kumala tusi¹a yasima alia kanafinagi¹ya kanale hu¹ya maisaya kumala omalege¹ya tipi kalema ne¹aliya vaya¹mo¹ya ke huge havige hute¹ya “Ani kumala ne¹ataleta Finikisia, Kaliti kuma¹mo haupalega nagola tipi kalema malesuna kumafe avame huta vi-sune. Ani kumatela yasima alisia kanalela mo maigahune.” hu¹ya humainae.

Tusi¹a yasimo hage lina ali haviya humaine.

¹³ Amuko yasimo¹a ako huno alige¹ya “Kanalelagita ugahunagi afa¹a vigetao.” nehu¹ya tipi kalema atafa hulino nemaiya yana alisaga hute¹ya ani lipi kalea Kaliti limo agegayalega eumainae.

¹⁴⁻¹⁵ Ene¹vageno Kaliti kumateti tusi¹a yasimo¹a alino egeta “Eteta ani kumate ugahune.” huta hunanagi ani yasimo¹a tipi kalea melino haviya huno aiyahae huno atalegeno ani yasimo¹a ayetufegeta emainone.

¹⁶⁻¹⁷ Onana nagola hage limo amu¹nopi hanea kumala osi kuma¹mo avate eumainone. Ani kuma¹mo agia Kautae. Ne¹onageno yasimo¹a osi¹a alino laga higeta tusi ali¹ya aliya¹amo¹ya hevayu hu¹ya osi tipi kalea alisaga hu¹ya ala tipi kalefi malene¹ya ani ala tipi kalemoma kofa-nafa ohiseafene hu¹ya nomo aiyafi nofila kitafa humalena. “Yasimo¹a ayetufesigeta Afe-lika ko¹mo ti kahaepatega mo haviya hugahune.” hute¹ya anale asai-malenaya kena yasimo¹ma ayetu-nefea kena kalu he¹ya afepi maletageno yasimo¹a ayetu-fegeta emainone.

18 Ne¹eta mo faonageno ko¹ma neliana timo¹a ayamufa¹age hige¹ya ani lipi kalefima hanea afeno¹ya¹yaga ali¹ya kalemo¹a yo¹yo huno visi-afene hu¹ya hage lipi haga¹yu haga¹yu hutalenaē.

19 Tagufa (3) kanale tipi kalemo ali¹ya yama¹a amakai¹ami amayapiti ali¹ya tipi haga¹yu haga¹yu hutalenaē.

20 Kasago¹ya kanagefa yagene ka¹nefi¹enena o¹agogeno limo¹a tusiya huno ayamufa aigeta taugafa aligatisia yafema tametiti nehuna yana ago ataleta “Ani lipi fanane hugahune.” huta maita humainone.

21 Nehu¹ya vaya¹yaga aya¹aya kanagefa kavela one¹ya maigeno Polo¹a amu¹no¹amifi hetino mage huno hie “Nafu¹naganagatama tamakaya havi kava hutama hagote¹nama tamahapauva kea ‘Kaliti kumala o¹atalesune.’ hu¹na hua kea ohavinaē. Tamakayama havile¹asina ma ma ali haviyama hulatea yana falote ohigeno afeno¹yatienena o¹va¹yagile¹asine.

22 Nagi menia tamahanepauve kolia ohutama tokiya vaitama maiho. Tagaipitila nago kanoa ofaligahigi tipi kale¹age haviyana hugahie.

23 Nagaya Anumaya Koti nafa¹ne mainoanagi¹na muki¹a kanafina agia alisaga hume hume ne¹ogeno meni kegela agai¹a ensole kanomo¹a navate me heti-mainē.

24 Heti-maineno mage huno nahapaiye ‘Pologae kolia ohuo. Kagaya Sisa aulela mo hetigananagino Anumaya Koti¹a muki¹a mani lipi kalefi kagai¹enema ne¹vaya vaya¹mogamina

amaugafa aligatigahie.' huno nahapaiye.

²⁵ Nahapaiyafe tamakaya muki'amogatama kolia ohiho. Anumaya Koti'a nahapaiya avamete huno ani kate hugahie hu'na nagupi male'na nametiti nehue.

²⁶ Nehuanagi yasimo'a ali haviya hisigeta nagola ti amu'nopi hanea kumate vailagailita ughahune." huno humaine.

²⁷ Ani tipi kalefina tole sota onageno timo'a ayamufa'age higeta Metiteleniani hage li amu'nopi onageno kege amu'no hige'ya tipi kalefi ali'ya vaya'mo'ya "Kumate uva'yi hugahe aupa nehune." hu'ya humainae.

²⁸ Hute'ya augelifipi amegafi hu'ya nofi'mo atupale tumo tumo yana kana'age ya ayete'ya atalageno tipinaga lavitege'ya alisaga hu'ya agayana augelimo'a aya'aya'amo'a foti'a (40) mita humaine. Nago'ene osi'a utonage'ya ani'a hu'ya tipinaga ani nofila atalet'e'ya agayana ti augelimo'a teti'a (30) mita humaine.

²⁹ Hige'ya "Havigu yafa agupifi visunageno yafamo'a tahaiyafene." hu'ya koli hute'ya fo'a (4) tipi kalema atafa hulino maisia yana tipi kalemo ai'a kapiti tipi atalageno lavi-mainegenon yagemo'a aupa'a eva'yi hisiafene hu'ya nunamuna humainae.

³⁰ Nehu'ya tipi kalefi ali'ya vaya'mo'ya koli hu'ya "Faleta ughahune." nehu'ya osi tipi kalea ali-talageno lipi lavige'ya mage hu'ya vayala ayemavataga hae "Tagaya kalema atafa hulino maisia yana agosisinapalega atalenone." hu'ya

ayemavataga humainae.

³¹ Hageno Polo'a ati vayafe'ene amakai'ami kava kanomofe'ene mage huno hamapaiye “Mani vaya'yagama ala tipi kalefima omaisayana tamakaila tamaugosamo'a fanane hugahie.” huno humaine.

³² Nage hige'ya ati vaya'mo'ya osi tipi kalema atafa hulinea nofila taga hutalageno osi tipi kalea tipina umaine.

³³ Yagemo'a eva'yi hugahe aupa higeno Polo'a muki'a vaya'mogamife mage huno hie “Tole sotana koli hutama kavela mositama onenagi menia kavela neho.

³⁴ Lokiya'age ke nagaya tamahanepauve ‘Kavela neho.’ hu'na nehue. Kavela netetama tokiya aligahae. Tamage lamahanepauve muki'amogatama kanale hutama uva'yi hugahae. Nagoke kanoa fanane ohugahae.” huno humaine.

³⁵ Mani kea nehuno maya alino amaulagale Anumayamotega muse nunamu huno havigeteno kolino nemaine.

³⁶ Nege'ya agete'ya amaipamo'a kanale hige'ya amakai'enena ani'a hu'ya kavela nemainae.

³⁷ Tagaya lipi kalefima mainona vayala tu hataleti seveti sikisi'a (276) vaya mainone.

³⁸ Kavela nemamu hute'ya tipi kalemo'a kana'agela ohisie hu'ya viti avinayaga tipi ali'ya atalena.

Tipi kalea ago alino haviya humaine.

39 Yagama va'yi hige'ya agayana no'agaya kotega uva'yi hute'ya agayana nagola timo'a moyetagena humainea yatela kanale ti kahaepa hanege'ya agete'ya “Lipi kalemo'a anile aupa'a visie.” hu'ya humainae.

40 Hute'ya tipi kalema atafa hulino nemaiya nofila heka'no hutalet'e'ya ali'ya moli kagi meli kagi nehaya ka'yote kimalaya nofila ali'ya kale'yo humalet'e'ya yasi alisia kena anale male'ya atafa humalageno tipi kalemo'a aiyayeno ti agegayalega ugahe nehie.

41 Vianagi tipina kahaepamo'a ago'yagefa hai-mainea kahaepate haino anifi mo vailino ago'yamona atafa huno tokiya'age huligeno kanagela ohuno hanegeno timo'a tokiya'age huno ai'a katega aino kofanafa humaine.

42-43 Kofanafa hige'ya ati vaya'mo'ya nofi'ma humatenaya vayafena “Hamaesunage'ya falisae. Havigu nago kanomo'a tipiti faleno visigi.” hu'ya hayanagi ati vayate kava kanomo'a Polo'a ofalisia agesa nehavino “Na'a ohiho.” huno hune'ama-teno muki'a tipi nagosa ne'aiya vayafe “Nagosa aitama ti agegayalega viho.” huno humaine.

44 Higeta muki'amogata tipi kalemo'ma haviya hia yosamo ayamufa alita agupile maiteta ayetufeta ti agegayalega umainone.

¹ Tagaya kanale huta eva'yi hune. Eva'yi huna ko'mo agia Malata kumale hu'ya tahapaigneta havimainone.

² Ani kumate vaya'yagamo'ya kanale'ya hu'ya ali kayone hulatageta mainonageno kola aiteno yasi'age hige'ya ata kae-maleta'ya me lavale'ya ata mo lota hulatenae.

³ Polo'a ata haefusa ha'ya alino ata kaeyana nagola vaya'ma nehaeya osifa'vemo'a ata haefusa ha'yafiti augafa leno amuko higeno hatilavino Polo ayapi menilage-lage humaine.

⁴ Menilage-lage hulinege'ya anile maiya vaya'mo'ya agete'ya mage hae “Mani kanoa vaya hamaeno hevai-ne'amatea kanogino hage tipina ofalianagino fatago Anumayamo'a anona'a alisiafe haeyanagino ago faligahie.” hu'ya hae.

⁵ Hayanagi Polo'a ani osifa'vea alino aye- tafaino atafi ataleteno agaila augafa alino haviya ohigeno afa'a maine.

⁶ Afa'a maige'ya anile maiya vaya'mo'ya augafa halegino asaga hulavino falisiafene hu'ya aya'ayate agava maiyanagi nagola havi yamo'a agaitela falote ohige'ya ete'ya alu amakesa havi'ya mage hae “Agaya nago Anumaya maine.” hu'ya havimainae.

⁷ Va'yima huna mopamona aupa'ale hanea kumatela ti amu'nopi kotega kava kanomo mopae. Ani kava kanomo agia Pupiliusi'e. Ani kanomo'a lavaleno noma'alega mo lateneno tagufa (3) kanafi kave yagita huno nelamino yagai-latene.

⁸ Yagai-lateneno Pupiliusina nefa'a amuko

kaliene ai'amo'a tolo ya agea kaliene alino mai-negeno Polo'a mo-geteno Anumaya Kotitega hav-igeno augafale aya malegeno ani kali'amo'a falu hu-tene.

⁹ Falu hutege'ya nago'a ani kumate kali vaya'mo'ya ageno Polo'a kali'amia alino kanale humatene.

¹⁰ Alino kanale humatege'ya tagaila kanale kava hulatageta maineta haenaga'a uгахema huna-nage'ya tagaila nesuna yama aupa huna yana tamite'ya tipi kalefi ali'ya latenae.

Polo'a Lomu kumate uva'yi humaine.

¹¹ Tagaya tagufa (3) ika ani kotega maiteta nago tipi kalea, ala yasima alia kanafinagi'ya Malata kumate maiya tipi kalea, Alekasatalia kumateti emaiya tipi kalefi asaga humaita umainone. Ani tipi kalemo ago'yalela tole kuyave netalamogani anamena talo humalenae.

¹² Ani tipi kalefima onana Sailakiusi kumate eva'yi huta tagufa (3) kana mainone.

¹³ Sailakiusi kumala ataleta kagita kagita Legiumi eva'yi huta faenonageno yasimo'a alino aepa hegeta nagoke taula mo faeteta Puteoli eva'yi huteta hati-lavita lipi kalea agola ne'ataleta mopafi emainone.

¹⁴ Puteoli nago'a mainaya tafu-taganagamina amakonage'ya mage hae “Tagai'ene nagoke sota maigahae.” hu'ya hageta anile maigeta Lomu kumatela umainone.

¹⁵ Katega ne'onage'ya Lomu kumate mainaya tafu-tagana'ya “Katega ne'ae.” hu'ya haya kea

havite'ya e'ya nagola Apiusi maketie nehaya kumate me fotu hage'ya nago'a vaya'mo'ya “Tali'a (3) Natu Vaya'mo'ya Nefayaya No'yaga Hane.” hu'ya haya kumate fotu hunageno Polo'a ani vay-ala amaketeno Anumayamotega muse nehigeno agu'amo'a tokiya'age humaine.

¹⁶ Lomu kumate'ma unana ala kava kanomo'a Polofe “Kanalelagika kagaika'a nopi mainesageno nago ati kanomo'a kava yagaigategahie.” huno humaine.

Polo'a Lomu kumate Yisasi kanale mono kea huhaleno hamapai-maine.

¹⁷ Polo'a tagufa (3) kana maiteno ani kumate mainaya Yuta soka vaya'yagahe ke hige'ya melitalu hageno mage huno hamapaiye “Nafu'naganagatama nagaya tagaiti nofi vaya'mogami'ene taginagomo'ya humainaya kava'ene ali'na haviyana ohunoanagi Yelusalemu nofila hunatete'ya Lomu vaya amayapi natenae.

¹⁸⁻¹⁹ Lomu vaya'mo'ya ke'nima haviyana nagaipina nago'a nahaesage'na falisua ke'nia omalege'ya natalegahe hayanagi Yuta vaya'mo'ya ani kehena 'A'ao' hu'ya haya yafe nago'ma visua kani'a omalege'na 'Sisa kaiyeke'nia havisie.' hu'na humainoanagi nagai'ni nofi vayala kaiyeke humatesua yana omalene.

²⁰ Mani kema tamahapaisuafene hu'na ke hugetama age'na tamahanepauve Isaleli vaya'mo'ya amametiti hu'ya agava mainaya

kanomofe havi'na nagupi malenoa yateti nofla hunatenae.” huno humaine.

²¹ Hige'ya ani soka vaya'mo'ya Polofe mage hae “Nago'a Yutia vaya'mo'ya kagaifena avona kae'ya tamigeta ohavinone. Nago'a vayatimo'ya tagaite e'ya ke hagea nagola havi kava'ma humainana kea me lahaopainae.

²² Tahaopainagi muki'a kotegati vaya'mo'ya Yisasina amaku'a aminaya vea'mogamifena ‘Havi kava mai'ya nehae.’ hu'ya hagea ago havimainonagi menia kagaika'a kagu'afiti hisana ke havigahune.” hu'ya humainae.

²³ “Na kanale havigahune.” hu'ya hapali-malete'ya ani kanalela muki'a vaya'yaga Polo'ma mainea nopi me-litalu hageno Polo'a natema aepa heno Anumaya Koti'a kava yagai-matesia kea hamanepaino Anumaya Koti'ma Yisasina hutegeni emainea kanomo kea Mosese kae-malenea kefiti'ene Anumaya Koti amaune vaya'mo'ya kae-malenaya kefiti'ene amakaila amaku'a alino hetisige'ya Yisasife havi'ya amakupi male'ya amametiti hisayafene huno huge huge nehigeno yagemo'a lavi fale-maine.

²⁴ Polo kea nago'a vaya'mo'ya haga ne'ya amakupi malenagi nago'a vaya'mo'ya amakupina ali omalenae.

²⁵ Alu amaku amakesa havi'ya mohu mehu hute'ya ugahe nehageno Polo'a mage huno hamapai-maine “Alu Aotage Avamu'mo'a tamage huno Aisaiyana hapaigeno Aisaiya'a, aune kanogino, taginagomogamina mage huno tamage

hamapai-mainene.

²⁶ Kagaya mage huka vea'mogamina mo hamapaiyo "Tamakaila tamakesamo'a havime havime haigahayanagi ani kemona aepa'a havilama hutama ohavigahae. Tamaulagamo'a kasago'ya yupa ageme ageme haigahayanagi nago yana agelama hutama o'agegahae.

²⁷ Mani kemona aepa'ama havisaya amaku amakesa omale vea'ne mainae. Mani kema ohav-isayafene huno amakesamo'a ago tile-mainene. Amaulagamo'a ani'a huno 'O'agesae.' huno ago asu humaine. Mani kea amakesamo'a havisigeno amaulagamo'a agesigeno amaku'a aiyahae hu'ya nagaitega esage'na ali hilato humateyafene.' huno hige'ya." kae-malenayane.

²⁸⁻²⁹ "Anumaya Koti'a mani kea tamakinagomogami'ene tamakayaenefe lamahapai-mainenanagi tamakaya lamakave'no hutenanagi haviho Anumaya Koti'a anima lamaku tamamema aligatisia kea Yuta vea'ne omainaya veafe ago humateneanagi'ya ani vea'mo'ya havigahae." huno humaine.

³⁰ Polo'a nago nona miya huteno ani nopi tole kafu maineno agaitegama aya veala kanale'ya humatene.

³¹ Hune'amateni Anumaya Koti kava yagaimatesia kea huhaleno hamane'paina Anumayati Yisasi Kalaisi kanale mono kea huge amavelige huno kea hulokiya vaino hige'ya nago'a vea'mo'ya "Na kea ohuo." hu'ya kahegi

Aposolo 28:31

clxv

Aposolo 28:31

o'atenaē.

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 18 Apr 2025 from source files dated 31 Aug 2023

55807fd5-1005-5405-89da-5533a7950c65